


# BWÀKABUULWIBWÀ, NSHAPÌTÀ

## MWINÂYÌ CITUPÀ II

 Ndi ne disànkà dyàbûngi dyà kusanganyibwa cyàkàbìdì mwab'ewu mu dindà emu. Mwva ànu munkaci mwà dyela meeji mùshindù ùdì nêjè ewu. . . Mpindyewu, kàdi bu ne tuvwa mu Colorado, nêjè ewu ùvwa mwà kwikala wa mupeepèle menemene ne wa bukulakula, ne kuulu kùdì mwà kwikala bu ku bipidì makumi ànaayi mwinshì mwà cijèngù, nènku's nudi bafwányine kumwela mupùùya ne, *hhuuu*, mùshindù awu, e kumataye panshi bu lupwishi. Ne mufwanyine kwikala nàнку муvù wà mashika mujimà. Kàdi mpindyewu, bu mùdì muneemu emu, mu eci ci. . . bu mu munkoloji, pankaci pàà bipaapu, mpindyewu bìdì bulelèlè ne citaleela ne bitotàkàna ne bibì, nènku—nènku mbimwènèke ànu bu ne mwva—mwva njinga ànu kukwàta njila kuya, ku Arizona, bwà kwindila too ne pààlwà muvù wa bintu bitòloka awu ki pashìishe mémè kwalukìla.

<sup>2</sup> Mùshindù awu ki utùdì twètù bwònsò tukwàcika kùdì cimpumpu, twishi ne bikwàbò mpindyewu bìdì ànu panshi apa kàdi nebyùminyine ne mashika ne pashìishe kwengulukabi, ne pashìishe kuuminyina ne pashìishe kwenguluka. Kàdi pàdìbì bibànda ke twètù kubikokela ku mweyelu, ne mimimu yìbanga kutusunsuma, mitù ne kayishàadi, ne masaamà ne bisaamà ne tuyaayi tukamòne. Nènku, ekèlekèle, ekèlekèle, ncikondo kaayipu's, mmwaba kaayipu's wè.

Kàdi kùdì Buloba dyàmwàmwa dyà musùlu,  
Dìdìbo babùkìla ne ndilenga bwà kashidi,  
Nènku netufike ku Mwelelu awu ànu ku  
diitabuuja;

Ku umwe ku umwe tudi tukafika ku ciibi aci,  
Bwà kusòmbelamù pàmwè ne bàdì kabàyi  
bafwa,  
Dìngà ditùkù nebàdidishè tungonga twà ngòlò  
atu bwèbè wèwè ne bwànyì mémè.

<sup>3</sup> Ki patùdì twalukila Kumbèlu bwà kushààla dìbà adi, kí mmwòmò anyi? Kì ditùkù ditùdì bindile ndyòdì adi.

<sup>4</sup> Mpindyewu, makèèlèlè dilòòlò awu ncyà bushùwà ne mwva musankishiibwe kùdì mayiisha malenga awu ne bikwàbò bìmvwà muumvwe byà kùdì bânà bèètù abi. Pat Tyler ùdì penyì, ùdì munda emu mu dindà emu anyi? Pat, kaa, ncìvwa mukumòne to wa bwalu musòmbe ànu mwaba awu kùyi nànsha musokome to. Nènku—nènku ncìvwa—ncìvwa mukumòne musòmbe mwaba awu to. Musangu wà kumpàla

wúmvwaku ne Pat. . . wa kuumvwa Pat ùyiisha; ngakasànka ne diyiiisha adi, ndi mutwishiiibwe ne twètù bwónsò twakasànka.

<sup>5</sup> Ne pashiishe mwanèètù mutekète udi mufile bujaadiki bwà kapyà bwà diyiiisha kampànda mwab'ewu awu mu bushùwà bwà bwalu aci cyàkumvwika ànu bu cingoma cyà mwambuyi cituucika's. Mwanèètù kampànda, mvwa mutwilangane nendè, ngwa ku Ohio. Ùdi kaaba aka mu dindà emu anyi? Mwab'ewu mwaba kampànda anyi? Mwanèètù Neville wàmbi mùvwàye utuuta wambakaja ne lukasa lwónsò.

<sup>6</sup> Pashiishe Mwanèètù J. T. Parnell. Nènku—nènku ndi ngeela meeji ne bushùwa kí mbakafikaku kùdì Mwanèètù Beeler to. Nènku yéyè, Mwanèètù Parnell ùdi apa anyi? Mwanèètù Parnell, Mwanèètù Beeler? Ncyéna mutwishiiibwe to, mvwa ndyambidila ne umvwa mumòne m'Mwanèètù Beeler.

<sup>7</sup> Makènkè aa, eci cidi. . . Piibakàbo tabernacle mupyamùpyà, Ndi ntèkemenà nebàlongolole bintu mùshindù mushiilàngàne, mushiilàngànakù ndambù. Ewu ke wetù wa kumpàla, wa patùcivwà tubangilaku's. Nànku awu twètù bapeta mupyamùpyà, mòna's, tudi baswè ikaleku mushiilangane ndambù ne ewu; kwenàku mwà kumòna to; ndi muswè bwà tabernacle ikaleku mwibaka mwinameku mùshindù ewu, mu batèeleji's. Udi utàngila buludi mu batèeleji bèèbè amu dībà dyónsò. Ne pashiishe nangàngà mu masangisha à dijingulula, udi ànu mwà kunyunguluka. Nwamònu's, ùbàngata ànu mùshindù ewu, wàtwa kumpàla wàtwa paanyimà. Nènku dībà adi, nànsha bikèngela bwà wèwè kubiikidisha bàdì mu kaacisàsà kakesè abu, s'mbimpè be.

<sup>8</sup> Mwanèètù Littlefield ewu, Billy yéyè kaaba aka, mmumbiikile makèèlèlè dilòlò awu nènku yéyè neàtume macinka à tabernacle ùmvwà mulambule kuntwaku, udi baamaanyimèèla. . . Mwanèètù Wood, bìdì bilomba mfranga, ngeela meeji, ndola nkàmà yitàanu ànu bwà maanyimèèla kumuzolaye. Nènku yéyè—yéyè neàtume aci ne mushinga nè bikwàbò byònsò byà bintu byà mudimu ne mabaya à malekà ne mikamba biyaayamu abi. Nènku neàtutùminebi, ne yéyè mwine mmuswè kulwa; nènku mmwambe ne neàye kùdì beena nzùbu yà mabaya abu ne bikwàbò bwà kumòna ní ùdi mwà kubàfikisha ku—ku dipwekesha mushinga ndambù mùvwàbo benze bwà wendè awu amu. Tabernacle mulenga kumòna wa dikèma, kàyì mupitèpite bunène to, kàdì's nkazùbu kalenga kaa dikèma.

<sup>9</sup> Ki mèmè kumwambila, kwamba ne: “Ne—nèmfilè cyôci aci kùdì balubuludi ne balami panùdì ànu nutuma kùdì Billy nènku—nènku dībà adi netùbalekelè bamòne mfranga yidì yibàkèngela bwà kutwadijabù lwìbaku lwàbò.”

<sup>10</sup> Kwambaye ne: “Pànwàtwadija, néndwe, muvwale cinsàlabeeta bwà kushààla ànu neenù mu cikondo cyònsò

aci.” Mwanèètù Littlefield mmulùme wa ngàsà wa dikèma, muntu wa ngàsà, wa maalu malenga wa dikèma.

<sup>11</sup> Mpindyewu, nukaadi bwònsò badyūmvwè badilongolola, bwà kutwàdija Cidimu Cipyacipyà mpindyewu anyi? Amen! Kupàtuka ànu buludi mu Cidimu Cipyacipyà. Tudi baswè kucitwàdija mu mùshindù mwímpè, biikale tukwàcila Mukalenge mudimu. Mbanganyi bàdi babiike mu dindà emu ne baMusàkidile bwà cidimu cyà kale ne byònsò byà mu cyòci, ne baMulòmbe bwà: “Àpwakù mwoyi bìdi bishàale paanyimà”?” Nènku, tuvwa benze nànkù ku luseke lwà bulaalu patwàjuuku, nènku pashiishe kulwa ku mèèsà kùtù pa ciibidilu cyoshelu cyà dikù, bàtu bànyungùlukila mèèsà ne bàsambila.

<sup>12</sup> Nènku tutu misangu yònsò tuteeta bwà kucivwija ciibidilu cyà kusambila bufùku kumpàla kwà twètù kuya kalàala. Ndi ne ciibidilu, aci, kacya ànu ngakudimuna mucimà. Cyà kubiika mu dindà, ne kuulu kutàmbe kufiika ne mabungi mapite búngi bwà mèmè kwenda, ncyèna—ncyèna mumanyè kunyaayà to. Kàdi bu mèmè ànu mwà kuMulòmbe bwà kunkwàtaye ku cyanza ne kundombola mu ditùkù dijimà adi.

<sup>13</sup> Nènku ndi mvùluka, ànu dyàmwàmwà dyà mùsèèsù ewu, pàncivwà nsongàalùme wa citende, Billy Paul ùvwa ne bidimu bitwè ku bisàtù, anyi binaayi, ne tuvwa basòmbèle ànu dinsambwà dyà mùsèèsù ewu. Nènku bufùku kampànda ùvwa ujinga màyi à kunwà, pààwù miikale mu cikukù, kabalù kàà màyi kàvwa mu mbekeci. Ki mèmè kwamba . . .Kaa, mvwa mucyòke be, mvwa mukwàte mudimu mukolè ditùkù dijima ne muyiishe citùpà cyà bufùku. Ki—ki yèyè ne: “Papa, ndi—ndi muswè kunwà màyi.”

<sup>14</sup> Ki mèmè kwamba ne: “Billy, bwela ànu mu cikukù amu, àdi pa kaamèèsà kakesè apu.” Mèmè ne . . .

<sup>15</sup> Kukàtamukayè, kudivingayè kwisù, ne kutàngilayè kuntwaku, e kwamba ne: “Papa, ndi ncìina bwà kuya.” Nwamònu anyi?

<sup>16</sup> Ki mèmè kwamba ne: “Èè, aci’s . . .kakwena bwalu to.” Mèmè ne: “Dyele ànu lubilumù’s, munanga wanyì, ùnwa màyi. Papa’s mmucyòke be.” Ànu ntàntà mukesè cyanààna, bu ne ku dididiishì dyàdya.

Ki yèyè—yèyè kwamba ne: “Kàdi ndi ne bwòwà bwà kuya, papa.” Nwamònu anyi?

<sup>17</sup> Èè, mèmè kajuuka ne kakwacikwètù aku. Nènku ki wèla umpya ku cyanza, kàdi’s cìvwa cintu cìmpè; katùvwà banji kwela bidya binaayi anyi bitaanu to kudibyankulaye ku tààpì mwaba ùvwa Meda mukolòpe mu nzùbu, ne kùvwa citùpà cyà tààpì wa mukolàkàne, nènku s’nudi bamanyè mùshindù utùbi’s. Nènku kutòndokayè, kadi mvwa mumukwàte ku cyanza, ne dîbà adi kunguuminyinayè bikolè menemene ku cyanza. Ki dîbà adi mèmè kwimana ndambù mwaba awu, ki mèmè kudyàmbidila

ne: “Nzambi, ncyà bushùwà.” Nwamònu anyi? “Ncyèna muswè kwela cidya nànsha cimwè Wèwè kùyi munkwàte ku cyanza to, bwalu ncyèna mumanyè ne ndìbà kaayi dīngààselemukà to.” Nudi numòna anyi? “Kàdi dībà dyònsò dīndi ànu mwà kumvwa cyanza Cyèbè cinène, ne cyà bukolè aci kacya cyàmpya, ndi mumanye ne Wèwè neundame nànkù mu bikondo byà wànyi. . .” Nwamònu anyi?

<sup>18</sup> Pa nànkù ndi nteeta kucyenza ciibidilu, cyà—cyà kulama cyanza cyànyi mu Cyèndè. Nènku misangu mikwàbò ntu mwenze bintu bitù bimweneka bicimbakane ku mmwènenù wanyì mèmè mwine, bintu bidì bimwèka bidì kabìyi bipetangana ne meeji à buntu; kàdi bu twètù ànu mwà kucilekela kwà tàlàlàà, ndi njandula ne ki cintu cimwèpele civwà mwà kwenjibwa bwà kwikalaci cijaalàme.

<sup>19</sup> Nudi bamanyè's, bintu bidì kabìyi bimweka bijaalàme ebi, pìikalabì ne Nzambi ngùdi mùkulombolamù, nebìikalè ànu bijaalame mwaba kampànda, nudi numòna's, bwalu Yèyè mmumanyè mwà kulombola. Pa nànkù, bu mudibi ne Yèyè ke wetù ngàsà udi mukùmbàne mu byònsò, ne byònsò bitùdi naabi dijinga anyi bitùdi tucyùka bidì munda Mwèndè, dībà adi tùteekàayi ku luseke bikwàbò byònsò pa kuumusha Yèyè ne tùkwatè ku cyanza cyà Nzambi cìdi kacìyi cìshintuluka.

<sup>20</sup> Tuvwa ne ciibidilu cyà kwimba musambu kampànda mwab'ewu, ncìtu mwanji kuwùmva bàwimba kàbidì to kukaadi ntàntà mule. Mpindyewu, ncyèna mwà kwimba ne kùdi. . . Ncyèna ngeela meeji ne kùdi beenyi munkaci mwètù emu to. Pa nànkù ndi. . . Ki bwà cinyi ntu nteeta tuumisambu tukesè etu, nudi bamanyè's, bwalu ntu ànu muyinangè. Nènku Gene, wèwè mudìdinga ànu mulekele eci cipìcile mu mukàbà wa mèyi awu ciyè munkaci mwà bantu bwònsò! Mwà ne ciibidilu cyà kwimba kaamusambu kakesè mwab'ewu:

Cikondo ncyùle ne dishintuluka dyà  
cìmpicìmpi,  
Cintu nànsha cimwè pa buloba kaciyèna mwà  
kushààla kaciyi cinyungishiibwa to.  
Ibàkilà ditèkemena dyèbè pa bintu byà  
Cyèndèlèlè,  
Kwàta ku cyanza cyà Nzambi cìdi kaciyi  
cìshintuluka!

Mbanganyi bàà kunùdi bàkaadiku bumvwè musambu awu? Kaa, ndi muwìnangè, kàdi nwènù? Tùteetàayi cìtùminyì cyàwù cimwè:

Kwàta ku cyanza cyà Nzambi cìdi kaciyi  
cìshintuluka!  
Kwàta ku cyanza cyà Nzambi cìdi kaciyi  
cìshintuluka!

Ibàkilà ditèkemena dyèbè pa bintu byà  
 Cyendèlèlè,  
 Kwàta ku cyanza cyà Nzambi cìdì kaciyi  
 cìshintuluka!

Tùteetàayi citùminu kampànda:

Pààjikà lwendu lwètù,  
 Ne twètù bashààle ne lulamatu kùdì Nzambi,  
 Cisòmbelu cyèbè cilenga cyà cibàlakana mu  
 Butùmbi,  
 Ki cyàmòna musùukà wèbè mwambwibwè  
 awu!

Kwàta ku cyanza cyà Nzambi cìdì kaciyi  
 cìshintuluka!

Kwàta ku cyanza cyà Nzambi cìdì kaciyi  
 cìshintuluka!

Ibàkilà ditèkemena dyèbè pa bintu byà  
 Cyendèlèlè,

Kwàta ku cyanza cyà Nzambi cìdì kaciyi  
 cìshintuluka!

<sup>21</sup> Tujuukilaayi kuulu mpindyewu bwà katancì kakesè cyanàànà bwà disambila, bu nwènù mwà kuswa, patùdì twela cìmwè cyà ku byanza byètù muulu kùdì Nzambi ne tuwimba cyàkàbìdì apa ne:

Kwàta ku cyanza cyà Nzambi cìdì kaciyi  
 cìshintuluka!

Kwàta ku cyanza cyà Nzambi cìdì kaciyi  
 cìshintuluka!

Ibàkilà ditèkemena dyèbè pa bintu byà  
 Cyendèlèlè,

Kwàta ku cyanza cyà Nzambi cìdì kaciyi  
 cìshintuluka!

Kwàlakanyi mabanji à pàtupù à pa buloba ebu  
 to,

Àdì ànyangukà lùkàsà aa,

Ibàkilà ditèkemena dyèbè pa bintu byà  
 Cyendèlèlè,

Byòbì kabyàdyàkujiminakù to!

<sup>22</sup> Taatù wa mu Dyulu, patùdì biimàne kuulu apa, Mukalenge, tudi banangè ànu kwimba misambu yà kale ayi, yiyaaya ne mu ndondo wa bitùpà byà munda mwà mwoyi wètù ne bipàtula patòoke cyakwidi cyà dinanga dyètù Kùdì, wèwè Nzambi udi ne mwoyi. Nènku patùdì beelè byanza byètù muulu apa, Mukalenge, mu dindà emu, cìvwa ncìvùlukilu cikesè cyà ne “Ukwate byanza byètù, Mukalenge.” Ànu mùmvwà ndonda bwà Billy Paul, mùshindù ùvwaye mumpyè ku cyanza cyànyì amu, nùnkù’s mmudishinde bu ne ncìvwa mumukwàte to. Nènku, Éyi Nzambi, mmisangu búngì munyì yitùvwà mwà

kwikala twètù aba badishinde bu ne Kùvwa mutùkwàte ku cyanza's! Pàndi ngeela meeji muvwaye yéyè, kàyì mamwèndè, wa bwalu muciiikale mwànà mukesè wa mu dibòko . . . ne mùshindù mene . . . mùvwabi ne mu nsòmbelu wendè, ne njila yàkalondaye, ùvwa mufwànyine kwikala mushipiibwe kale, kàdi kùvwa Cyanza cinène civwà mwà kufika mwaba ùvwa cyànyì mèmè kaciyì mwà kufika nànsha, bwà kumukwàta. Mpindyewu, tudi ne kusakidila kwàbùngi bwà bwalu abu.

<sup>23</sup> Ndi ne disànkà dyàbùngi dyà kumanya, Mukalenge, ne patùdi tuumvwa musùukà wètù munkaci mwà kutàpulukungana ne mubidi ewu, bwà ne kùcidi cyanza citùdi mwà koolola ne kukwàtakù, cyàtulombola dyàmwàmwa dyà musùlu. Tudi tuKusakidila bwà maalu aa, ditwishiiibwa edi, ditwishiiibwa dibènèshiiibwe ditùdi naadi, Lwongò lwà musùukà, lùdi lutulama bashimate kamùngùlù patùdi twendela mu lwendu elu anyi twendela mu mazuwa pa mbù munène wa mwoyi apa.

<sup>24</sup> Nènku tudi tulòmba, Taatù, bwà ne ànu mwàkamba mwedi wa kasàlà ne: “Mwanèètù mubùle ditekemena ne mudiine ne màzuwà mu màyi ewu, pa kumòna dishimata dyètù (bajaalame), pa kumòna nànkù, wàkolesha kàbidi mwoyi, anyi wàpetulula kàbidi bukitù ne kuteeta cyàkàbidi”; mumanyè ne Nzambi udi udikumbanyina mu byònsò awu, twètù batànkakane anyi badishinde, cyanza Cyèndè cinène aci cidikù bwà kutùkwàcisha. Ngàsà Wendè mmukumbàne.

<sup>25</sup> Mpindyewu tudi tulòmba, Nzambi, bwà twikalèku, mu dindà emu, mwà kubanga Cidimu Cipyacipyà mu miyenga, timba ne tusànka, ne bamanyè ne Nzambi neàtulombòlè mu lwendu lwònsò lwà mwoyi ne dyàmwàmwa dyà musùlù wà lufù, ùtùbweja mu Buloba bulaya abu. Mèsù ètù mmatàngile dyàmwàmwa dyà nkwaaka mibinduluke yà Yadena mu dindà emu, kùdi mpàta yà—yà bitemu ne mpàta yà micì ànu mibishi yisampila, nènku tudi tulòmba, Nzambi, bwà misùukà yètù yibàkuleku cikèèna—kumòna aci ne kayicilekèlèdikù to. Dìngà ditùkù pààkèngelabi bwà twètù kupweka ku musùlu awu kùvwaye mukòsòlwele aku, mu mùshindù wa ne, bu Eliyà wa kale awu, Mùzàbi wa Nzambi newùtuutè musùlu wa lufù ne twètù netwèndelèpu katùyì ne bwòwà nànsha. Enzàku nànkù, Mukalenge.

<sup>26</sup> Tùkwàcishèku patùdi tuseemena ku Dìyi Dyèbè apa. Éyi Mukalenge, ndi ndòmba bwà Nyumà Mwimpè Webè alaabeku Dìyi edi. Ncyà bushùwà ne katwèna bakùmbane bwà kudilongesha to, bu mutùdi katùyì mulongeshi to. Tudi bamanyè ne mùshindù wùmwèpelè wutwikalàku bakùmbane bwà kuDìmanya ngwà Mulongeshi munène wa cikunda awu ùlwa kwangata kaaba Kèndè—Kèndè kàà cisòmbedi mu myoyi yètù, ne—ne ùkòokèsha meeji ètù mu mùshindù wa ne (ne mmwènenù yètù) mu mùshindù ne netwikalè...Yèyè

neàtǔmvwìjè Mifùndu Minsantu. Tudi beyèmene aci kakùyì tuseku to.

<sup>27</sup> Nènku anji elààyiibi meeji pa bwalu abu, Nzambì, kaa, mùshindù mwine ùdìbi bilenga bilayà bwà Taatù udi ne mwoyi wa mùshindù awu, uvwa wa ku. . . udi dilediibwa diine dyà Cyendèlèlèlè, udi mufwànyìne kutuuluka ku bukwabantu bàà cifwàkà ne kutukwacisha, ne uvwa mwà kulwa ne Dìyì Dyèndè ne kuDìfidila mukana mwètù ne mu myoyi ne mu maci bwà twàmòna mwà kuDìtèèleja ne kwikala ne mwoyi, bwà kutùpikula ku mulawu utùvwà katùyì ne citùvwà benzè bwà dilwa dyàwù to, Taatù, bwalu byàkenjiibwa kùdì bukwabantu ne twètù tudi ndelàngànyì yà—yà babàkè bàà kumpàla abu. “Nènku tudi balela mu mpèkaatù, bafwimba mu bubì.” Kàdi Nzambì mwakane ne wudi ne mwoyi mmumanyè ne katwèna ne citùvwà benzè mu bwalu abu to, kàdi mmwenze njila wa dipàndukila ne mutupe dyèsè dyà kulwa. Mùshindù mene utùdì ne disànkà dyà mutùdì balwè ku Nzùbu wa Taatù's!

<sup>28</sup> Tudi tulòmba mpindyewu, bwà Wèwè kubènesha èkèleeziyà wetù ewu, Mwanèètù Neville, mpaasàtà wetù—wetù wa bukitù ewu, musadidi Webè mudìpwekèshe awu. Tudi tulòmba bwà balami bèètù ne balubuludì bèètù, bwà Ùbàpèèshèku cidimu cyà citàmbe bunène cyà ku bìdìbo bapetè. Enzaku nàнку, Mukalenge. Ubape matùkù àbùngì à mwoyi. Ubape dikandà, Mukalenge, mbasadidi Bèèbè. Swaku bwà kushààlabò misangu yònsò ànu ne bukitù ku mwaba wà mudimu. Beneshàku beena kwitabuuja, bi—bidimba, bânà Bèèbè bananga bàdì bàlwa mu nzùbu ewu aba. Nzambì, tudi tunana musùùkà wà yònsò wa kùdìbo udi usambuka cibweledi cyà nzùbu ewu. Tudi tuwùnana m'Bwèbè Wèwè, Mukalenge. Tùkwàcishèku bwà kwikala bambi bàà mùshindù awu bìikalà mwà kutwàla Dìyì ne bupwekele menemene ne mu bulelèlè menemene, ku Nyumà Mwímpè, bwà baamònaku mwà kujinga kwikala bu Wèwè, Mukalenge. Enzaku nàнку. Ondopa babèèdì ne beena ntàtu bàdì bàlwa abu. Ne pa buloba bujimà, enzàku nàнку mu nzùbù yònsò wa Nzambì.

<sup>29</sup> Ndekeelu wa byònsò, paWàjikija, Mukalenge, swàku bwà tubweleku mu biibi Byèbè, tusòmbela ku mèèsà à mwakidilu mulenga à Nzambì, ne tudya ne tushààla ne mwoyi pàmwè mu bikondo bidì kabiyì bijika abi. Patwàmba kufikila kwine aku, swàku bwà twikale ne bukolè bwà mubidi ne dikànda, musangeelu, disànkà, bukolè ne ngulu, ne mabènesha à Nyumà Mwímpè atulombole. Tudi tulòmba mu Dìna dyà Yesù. Amen. Nudi mwà kusòmbaayi.

<sup>30</sup> Ndi ngàanyisha mijiki mímpè yà mu dindà emu ayi. Ne. . . Ndi mfuma ku dibwela, pa dǐbà, nyiikilangana ne mulundà wanyì mwímpè, Mwanèètù Skaggs, ne—ne Mwanèètù Gene udi paanyimà pààpa wàwa, ne mukwàbò mwanèètù ku ciibi; too ne mungapeci mwà kuumvwa citùpà cyàwù, kàdi ùvwa umvwika mulenga wà dikèma mu byamù byà méyi.

<sup>31</sup> Mmunyì munùdi nusànkila Dibuulula? Ndilenga anyi? Mémè ndi ngiitabuuja bikolè ànu mùdi mwanàanyi mukèsè wa bakàji, Sarah, udi paanyimà pààpa wàwa, bikaadi bilwe “dibìnduluka” bwànyi mémè, bìdi ànu—bìdi ànu dibìnduluka dyangàtangane’s. Nudi bamanyè’s, mvwa njinga bwà twìkalakù ànu naabi mpindyewu too ne ku ngondo mwisâtù anyi ngondo mwinâyi, ànu bwà kwasa ntenta munène mutàmbe upita too ne paanyimà apa ne kulwa mwab’ewu mundaamuunya ne kuzola bimfwànyi abi ne dizola dijimà adi, nènku kubibandisha ne kupiwekesha byenze bu mùdi ridô yà ku màdìdishi, nudi bamanyè’s, bu mûntù misangu yònsò mujingèjìnge cikondo cyà kwikala ne tabernacle munène mutàmbe mwaba kampànda mwaba úndi mwà kupwekelela ne kukoka edi dizola kudipwekesha, kuya naadi too ne kwàka kwà cibumbà cyà ku cyambilu eku; ne mabuulula ne dyandamuna bìdi Mukalenge mumpèeshe, kàdi kwangata mucì ne kupicilamu ne kupwekesha bikondo ebi. Dìbà adi patùdi tujikija ne aci, tubandisha cikwàbò aci, tupwekesha cikwàbò aci mùshindù ewu ne kubanga ne cyòci aci, ne kucilongesha too ne kundekeelu. Kaa, aci’s ncifwànyine kwikala ànu bu dyulu dikesè, kí mmwòmò anyi? Kusòmba ànu movù mujimà wà mashìka awu, kuùpicisha ne Mukalenge.

<sup>32</sup> Bìmpè be bwà kwikala pàà nkààyeebè Nendè! Nudi bamanyè’s, tuvwa ne ciibidilu cyà kwimba musambu ne: “Kùdi bikondo bìndi muswè kwikala ànu pàà nkààyaanyi ne Kilistò Mukalenge wanyì, ndi mwà kuMwambila ntàtù yànyi yònsò nkààyaanyi.” Nwamònu’s, ki mùshindù wa kwenza ngwòwò awu. Bàvwa ne ciibidilu cyà kwimba, Roy Davis, úvwa ne ciibidilu cyà kwimba kaamusambu kakesè ne: *Kupèngama bwà Kusambila ne Yesù*. Byònsò biikale ànu bifunkuna. . . byònsò byùdi mwà kutàngila bìdi misangu yònsò ànu bikamata buludi mu njila wa Yesù Kilistò, kí mmwòmò anyi?

<sup>33</sup> Mpindyewu, mu bikondo byà èkèleeziyà bitùvwà bàakule abi, matùkù mwandamukùlù à ndekeelu mu disangisha. . . Pashìshe makèlèlè dilòlò ngeela meeji ne tudi bafikè ku mvensà mwi2 wa nshapità mwi4 wa Bwàkabuulwibwà. Ne ndi ngeela meeji ne nwènù bwònsò nuvwa kaaba aka makèlèlè dilòlò bwà—bwà kumuvmvwa. Nànku awu ndi. . . pàmwàpa mémè mufike ku mvensà umwe anyi yìbìdi yèndè mu dindà emu. . . Anyi ntoo ne penyì piikala Mukalenge mwà kulombola, ncyèna mumanyè to. Ndi mupwèke too ne ku mvensà mwi6 anyi wa 7 kaaba aka, ànu kaacyena-bwalu kakesè cyanààna kafùnda mwaba wùndi mwà kwalukila mu bitùpà bishìlèshìlàngàne byà Mifùndu ne kujoomona bintu abi, ne kùmvwà mulonge makèlèlè awu.

<sup>34</sup> Nènku mpindyewu, tudi tujandula ne, tuvwa bashìle makèlèlè dilòlò awu, ngeela meeji, ku mvensà mwi2, kubangila ku mwi3, ngeela meeji ne ki mùvwàbi. Nènku tuvwa ànu bashìle pa “Dìyi dyà Mpungi.” Aci kí ncyà bushùwà



anyi: “Mwadi wà Dîyì”? Ngǎnjì ncibalè cyònsò bwà twètù kwalukila mpindyewu:

*Paanyimà pàà cyôci eci mêmè kutàngila, ne, m̀onaayi, ciibi cyunzulula mu dyulu: ǹenku d̄iyi dyà kumpàla dingàakuumvwa òvwa dyenze bu dyà mpungi wàkulangana naanyi; uvwa wamba ne: Banda kuneeku, ǹenku ǹenkuleeje bintu...bidì ne cyà kwikalaku pashìshe.*

*Ne dyàkàmwè mvwa mu nyumà: ǹenku, m̀onaayi, nkwasà wa butùmbi wàkatèèkiibwa mu dyulu, ne kampànda musòmbe pa nkwasà wa butùmbi.*

*Ǹenku ewu uvwa musòmbe pa nkwasà wa butùmbi... ewu uvwa musòmbe awu uvwa mufwànàngane ne... d̄ibwe dyà yaspa ne...dyà sardwànè: ǹenku k̄uvwa muanzankòngòlò munyungulùkile eku ne eku kwà nkwasà wa butùmbi, mu cimfwànyì cyà diikala dyà màyi à matàmbà.*

<sup>35</sup> Mpindyewu, dileesòna dilenga dyà dikèma edi, kaa, dilenga dyà dikèma’s! Ǹenku mu dindà emu, kumpàla menemene kwà mêmè kupweka, mvwa mufike kaaba aka ku mvensà mwi6 eku, mêmè kudyàmbidila ne: “Kaa, ekèlekèle, ncyèna mwà kupita aci to, bwalu cintu kampànda ncyèci mu mvensà mwi6 ewu Cindi muswè bwà bantu bwònsò bàtèelejè bimpè menemene, patwàfikà ku *nyama eyi*.” Mumvwija mashìlèshìlàngàne à nyama eyi mwab’ewu, tulingaja mèsù paanyimà ku cibangidilu, umwe nnyama wa mùshindù kampànda, ne nyama mikwàbò yinaayi ayi nyà mukwàbò mùshindù. Umwe nnyama, mu cyena Ngelikà, byenzè bu ne “nyama wa cisuku.” Mukwàbò ewu yèyè kèna mukudimuna bimpè mu Roi Jacques amu to, bwalu k̄i *nnyama* to, bidì “m’Bifùkiibwà bidì ne mwoyi.” Ne mùvwà Bifùkiibwà abi, cìvwàbyo, kacìvwa n̄i mmuntu anyi kacìvwa m’Mwanjèlò to. Pa ǹenku cidi “m’Bifùkiibwà bidì ne mwoyi,” ne mùvwàbi ne mpàlà yinaayi ne binaayi. . . Kaa, ekèlekèle, tudi tulwa ne cyôci aci buludi ku Èvànjeeliyò, ne kucyàlujà buludi ne kucishikika leelù ewu cipwàngàne ànu mùdibi kaaba aka emu. Ǹenku, vùlukàayi ne, *inaayi* ùdi nombà wa pa buloba. Nwamònu anyi? Ǹenku cidi ànu dileesòna dilenga be mwaba awu, ǹenku awu ndi—ndi mutwishìbwe menemene ne katwàkubwelaku mu cyôci aci to; pàmwàpa netùbwelemu. Kàdi mbilenga byà dikèma be!

<sup>36</sup> Dìbà adi, bu Mukalenge mwà kwanyisha, dìbà adi p̄ikalàbi ne tudi pabw̄ipi, pàmwàpa mu dyàlumingu dilwalwà tudi mwà kuteeta cyàkàbidì cyôci aci; kuteeta, bwà kupweka, kumòna n̄i tudi mwà kujikija nshapìtà mwi4 ewu kumpàla kwà twètù kuumuka. Katwèna banji kumanya menemene mwaba utwàbangila wà kumpàla to.

37 Mpindyewu, tudi tusangana ne *paanyimà*: “Paanyimà pàà maalu aa.” *Paanyimà* mbwena kwamba ne “Paanyimà pàà bikondo byà èkèleeziyà bimanè kujika.”

38 Dìbà adi bààkatumina Yone dīyī bwà kubànda kuulu ne: “bànda kuneeku,” mbwena kwamba ne “bàndila too ne apa.” Wàkamuleeja cyònsò cìvwà ne cyà kwenzeka pa buloba bwà—bwà cikondo cyà Èkèleeziyà. Pashìishe paanyimà pàà bikondo byà èkèleeziyà bimanè kujika, tudi tusangana dībà adi ne Yone ùvwa cìfwànyikijilu cyà mwena kwitabuujà mulelèlè yònsò ewu wikalabu mwà kutumina dīyī kùdì Kilistò bwà kubànda Muulu. Neyà bushùwà anyi? Mutumina dīyī ne: “Bànda kuulu eku.”

39 Nènku tudi tusangana ne Dīyī dyàkaakula nendè adi dīvwa n’Dīyī dyà mpungi, dijīkuke, disungùlùke, ne dīvwa n’Dīyī dīm̀wèdīm̀wè dyàkaakula nendè panu pa buloba adi. Nwamònu’s, pàvwàYe ànu munkaci mwà biteekedi byà myèndù mwandamutekète byà ngòlò abi, Ùvwa wàkula ne. . . anyi wàkula *kuumukilamù*. Kaa, ndi munange aci’s ne: “wàkwila mu biteekedi byà myèndù.” Nwamònu’s, Yèyè ùvwa mu biteekedi byà myèndù, mwikàle wakwila ne Èkèleeziyà Wendè mu byòbi. Pashìishe pàvwà cikondo cyà èkèleeziyà cijike, Yèyè wàkashiyà buloba ne wàkabànda e kubwela mu Maulu ne Wàkabìikila Bapikula Bèndè kuulu aku. Kaa, abi kī mbilenga anyi? Ndì—ndi. . . Kaa, cidi cyèzà ànu ne mwoyi wànyì ùtumpikè’s.

40 Kàdì nwavùlukaayi ne, patùdì tutwàla maalu aa, ndi muswè nangàngà bwà bàcìdì bakùdīm̀wineku mucimà bu mùdì Mwanèètù wa bakàjì Ina ewu, anyi, ne Ina, èyowà’s we, ne bayendè, ne Rodney ne—ne mukàjèndè, ne Charlie ne bakwàbò abu, bwà kuumvwabo ne maalu aa, ne bààbùngì bàà ku nwènù bansonga bàcìdì babwelelākù mu Mukalenge aba, bàdì kabàyi banji kwenda ntàntà mule mu njila ewu, baMulabule nàka ne bamòne ne Yèyè mmwìmpè ne wa ngàsà. Mpindyewu, mònaayi eci, ne bintu bitùdì twakula ebi, citùdì tuteeta kwenza nkushindamija diitabuujà dyènù, bwà ne pàdì Nzambì wàmba cintu kampànda cìdì ne cyà kwenzeka. Kacyèna ànu mwà kupangilaku to! Nànsha byòbi ne. . . Bìdì mwà kumweka ànu bu ne bìdì mu ntàntà wa mùliyò mujimà wà kilòmèetà. . . ne kabiyì mwà kwenzekaku to, kàdì Nzambì neàbyendeshe ànu bimpè ne neàbìfikishè ku dyenzeka. Nènku Yèyè ùtu wenza nànkù bwà kukwela diteeta.

41 Tàngilàayi cyàkambilàYe Abraham. “Angata mwanèbè wa balùme ùbandè lwà ku lusongo lwà kakùnà eku ùmushipe,” paanyimà pàà yèyè mumane kumwindila munda mwà bidimu makumi àbìdì ne bitaanu. Ki kwambaYè ne: “Bànda nendè kuneeku ùmushipe.” Kàdì mmunyi. . . ? “Nènkuwijiè taatù wa bukwàbisàmbà.”

42 Nènku Abraham, ne bidimu lukàmà; mukàjèndè, ne makùmì citèemà; mwiine awu mwanààbù umwèpelè. . . Piinè

apu Abraham ùkaavwa wìpacila ku bidimu lukàmà ne dikùmi ne bitaanu. Ki kwambayè ne: “Mmunyi mwikalàye, mmunyi—mmunyi mùdici mwà kwikala? Pìikalàbi ne mèmè ewu, muntu mununu, mununu ànu mündi emu, ne mwindile munda mwà bidimu makumi àbìdi ne bitaanu. . . Udi mumpèeshè mulayi pâmvwà ne bidimu makumi mwandamutekète ne bitaanu, kàdi’s ki mèmè ewu ne lukàmà bulubulu. Ne Sarah ùvwa ne makumi àsambòmbò ne bitaanu, kàdi patùdi twakulangana apa ùkaadi ne makumi citèemà. Munyi? Paanyimà pàà twètù bamanè kupeta mwine mwànà ewu. . . Ne Wèwè kungambila kale wàwa, kùkaadi bidimu makumi àbìdi ne bitaanu pàncìvwà ne bidimu makumi mwandamutekète ne bitaanu apu ne, mvwa ‘ne cyà kupeta mwànà awu’ paanyimà pàà mèmè mumane kusòmba ne Sarah bidimu byònsò ebi, mvwa nkumba ne yèyè ùvwa kàyì mwà kwimita to. Nànku mmunyi dībà adi’s? Kàbìdi, Wèwè kumpèesha dimiinu ne kumuvwija mukùmbàne mwà kwimitaye, ne pashiishe kulwa kutùpèesha mwànà ewu. Ne tudi bamukoleshe mwab’ewu too ne ku bidimu dikumi ne bitaanu, ne ku mwine mwànà ewu Wèwè wákamba ne Newikalè mwà ‘Kubènesha bàà Bisàmbà byà bendè ne ditùnga dyònsò pa buloba,’ ne kumvwija taatù mene wa bàà Bisàmbà byà bendè, kumvwija taatù. Pashiishe mu bikondo bicìlwalwà, Mukalenge, ne Neùmvwije taatù wa ditùnga ne ditùnga dyònsò mwinshì mwà maulu ànu ku mwànà ewu. Nènku ku mwànà ewu kùvwa mwà kulwa Mupikudi, ne ku Mupikudi awu uvwa mwà kupikula bukwbàntu bujimà. Neùcyènzè bishi, Mukalenge?” Aci kacìvwà meeji à Abraham to, kacìvwà lukonko lwà Abraham to. Ditumikila! Kaakamba ne: “Newènzè ciine aci bishi?”

<sup>43</sup> “Ki ncintàngile mèmè to. Wèwè ngwákacyàmba, pa nànku ndi mumanyè ne Díyì Dyèbè ndyà cyà bushùwà, bu Wèwè mwà kulama Díyì Dyèbè bwànyì mèmè ne mwikàle mwà kundeeja aci pâmvwà ne bidimu makumi mwandamutekète ne bitaanu apu; pawàkambìikila ne kwamba ne: ‘Tapuluka ne enza lwendu uye mu buloba bwenyi,’ ndi mu buloba ebu kukaadi bidimu makumi àbìdi ne bitaanu. Muumuke, muntu mununu, musòmba ne mukàjì ùndi musòmba nendè kacya ànu pàcìvwaye mwànà wa bakàjì apu, wa bwalu mwikale mwakunyàànyì wa bakàjì mukwàtatwànyì. Nènku pashiishe ndi musòm-. . . cikondo cyònsò eci. Ne Wèwè kumpa mwànà ewu Ùvwà mulaye; mèmè kumupeta bu mufùmine ku bafwè. Nènku Wèwè mwambe bwà ‘kumushipa,’ Udi ne bukòlè bwà kumujuula kàbìdi ku bafwè.” Kaa, ekèlekèle! Ki mùshindù ngwòwò awu, ki cyòci aci. Ne Yèyè wàkacyènza.

<sup>44</sup> Nènku mmwenze ànu utùmikila Nzambì mu kaabujimà, kukokaye nsukì yà Izàkà kuyumusha mu mpàla, kupatula keelè bwà kushipa. . . mwanèndè mulela, mwanèndè umwèpelè mulela. Nzambì ùvwa uleeja citebelu, mwikàle ùtùleeja. CyàkenzelàYe aci ncinyì? Kabìvwà bikèngela bwà kucyènzaYè

to. Kàdi Yèyè wàkacyènza mu mùshindù wà ne wèwè ne mémè, bwà twamòna mwà kutàngidila pa bintu ebi mu ditùkù dyà mîdimà dyà dikwacisha bwôwà edi mùdi myoyi yà bantu myûle tètè ne bubì, bwà twamònakù mwà kumanya ne Nzambì ùtu ùshààla mukwàte ku mulayi Wèndè. Nànsha byôbì bimwèka kabìyi bikùmbàne bìshi, nànsha byôbì bifwànyine kwikala byà kabìyi mwà kwenzeka bìshi, Nzambì ùcidi ànu ushààla Nzambì ne Ûtu ùshààla mukwàte ku mulayi wònsò wùvwàYe mufile awu.

<sup>45</sup> Ki cîndi nteeta kunwàmbila patùdi biimane kaaba aka mu mudimu wa dyondopa ewu. Nwimana apa, nwamba ne: “Ndi nsaama.” Nènku nwènù. . .Aci kakùyi mpatà to, udi usaama. Kàdi Nzambì ùtu ushààla mukwàte ku mulayi Wèndè! Pashiishe Yèyè neàtùùluke. Mpindyewu, nwamònu’s, Yèyè wakenza difuta dyà cibawu mwab’ewu bwà Yèyè—bwà Yèyè kukwondopa. Ki cidìYe mwenze. Mpindyewu, cintu cimwèpelè cidìYe ukulòmba bwà kwenza nkwiatabuuja cyôci aci, kushààla mukwàtekù ànu mwakenza Abraham amu.

<sup>46</sup> “Èè, ngàngàbuka mmwambe ne nêngiikale—nêngiikale kàbidì ne mwoyi ànu ditùkù dimwè cyanàànà.”

<sup>47</sup> Kabyèna ne bwalu to. Abi mbîmpè, s’ki cyònsò cidì muntu awu mumanyè, s’ki cyà citàmbe bwîmpè cidìye pèndè mumanyè. Mmuniyì mùvwa Abraham mwà kupeta mwànà ewu paanyimà pàà mumanè kumulààdika kaaba aka, ne Dìyi dyà Nzambì dimwambile bwà “kuya kashipa nsongààlùme awu”? Mmuniyì mwàcyènzayè’s? Kí ng’aci cidì ne bwalu to. Nzambì ngudi mwambe bwà kucyènza ne aci’s ncikòse bwalu. “Nêngùmvwè bîmpè bìshi pààbì ngàngàbukà mwàmbe ne ncyèna mwà kuumvwa bîmpè?” Ndi. . .abu kí mbwànyì. . .kí mbutàngile to; bwalu bùdi nkwangata Dìyi dyà Nzambì. Nènku pàdi ànu aci cikubuulwila ne neùmvwè bîmpè, pa dîbà adi vùluka—vùluka ànu ne neùmvwè bîmpè. Kakwena cintu nànsha cimwè cidì mwà kukupangisha to. Ncyà bushùwà. Nwamònu anyì?

<sup>48</sup> Nànku pààkatùmikila Abraham mu kaabujimà. . .Yèyè neàcyènzè bìshi? Cikondo cyà ndekeelu, tusunsa tùtaanu twà ndekeelu kulwatù, tusunsa tùsàtù twà ndekeelu, tusunsa tùbìdì twà ndekeelu, kasunsa kàmwè kàà ndekeelu, tusùnsukila makumi àsàtù twà kasunsa twà ndekeelu, kasùnsukila kàà kasunsa kàà ndekeelu, pàkaavwa cyanza cimana kujuula bwà kuumusha mwoyi wà nsongààlùme, Nzambì kwamba ne: “Imànyikà ànu mwaba awu. Imànyikà ànu mwaba awu, wamònu’s. Ndi mmòna ne wèwè udi uNgeeyemena bulelèlè. Mpindyewu, ndi mwenzè cyôci eci, Abraham, ànu bwà kuleeja Branham Tabernacle mu matùkù àcilwalwà, nwamònu’s, cidì munkaci mwà kwenzeka aci, bwà ne bàdi ne cyà kuNgeeyemena. Kabèènakù ne cyà kuNgeela mpatà nànsha kakesè to. Ngeeyèmènaayi Mémè!”

<sup>49</sup> Ànu bu pa diine dîbà adi, yèyè. . .Ki mulambu ewu pwàà,

yêyè kàakacyènzakù cyanààna to. To, kàakacyènzakù cyanààna, bwalu ànu pa dîbà adi mene mù—mùkòòkò kudilawu bee bee, cimpàngà cikesè cyà mùkòòkò cìvwa ciswikila mu cipèèlà amu ku nsèngu aku. Nènku mmisangu búngì kaayi yitùdì bayiishèyìishe cyôci aci. Cimpàngà cyà mùkòòkò aci cyàkafika mwaba awu bishi? Mmunyi, munkaci mwà nyama yònsò yà cisuku ayi? Mu kilòmèètà lukàmà ne makumi àsambòmbò kule ne bantu, munkaci mwà nyama yà ntambwe, mibwàbwà, mbwà yà diitu, ne mîshindù yònsò yà nyama yà cisuku muntwamu, lwà kuulu kwà mukùnà aku kùdì kakùyì ní mmâyi anyi mashinde, cìvwàci cyènza kuntwaku ncinyi? Nzambi ngwàkacifuka, kucitèèka ànu mwaba awu.

<sup>50</sup> Ne pa kuMumòna mu matùkù ètù atùdì ne mwoyi aa! Mpindyewu, mu dindà emu nebikèngele bwà ngènze bintu byàbúngì byànyi—byànyi sungasunga anyi kubyamba, bwà kufika ku cîndì muswè kwamba aci. Ki bwà cinyi ndi ncîshîndamija mu mùshindù úndì ngenza ewu, kumpàla kwà kubanga cyôci eci. Ndi muswè bwà nwènu kuumvwa ne bintu bìdì byumvwika byànyi byà sungasunga ebi, kí mbwena kwamba ne mbyànyi sungasunga to. Mbitwàdìbwemù ànu bwà kufila cileejilu kunùdì bwà diitabuuja dyènù dyàmòna mwà kwikishiladi kakùyì tuseku to mu diitabuuja dîdì mu Kilistò adi, wèwè udi mufwànyine kwikishila pa mulyi Wèndè. Bwalu Nzambi ùtu ùshààla mukwàte ku mulyi Wèndè ànu bipwàngàne ne mwàbì mwònsò, mpindyewu mwikàle ùtùleeja.

<sup>51</sup> Nènku tàngilàayi *Yehowàh-yilè* ùmwèùmwè awu, mwàkaMubìikila Abraham amu, udi mu cyena Ebèlù ùmvwija ne “Nzambi neàDilongolwèlè Yèyè mwine mulàmbù.” Nzambi ùdì mwà kwenza nànu. Yèyè wàkenza njila Wèndè. Pìikalabi ne Yèyè wàkamba . . . Wàkambila Noà . . .

<sup>52</sup> Wèwè udi wamba ne: “Èè, aci’s cìvwa ànu ng’Abraham.” To. Yèyè mmwambe munda mwà bikondo byònsò, ne Úcidi ànu munkaci mwà kwamba.

<sup>53</sup> Wàkambila Noà kale wàwa, mutwàbwelamu mu dindà emu, ne: “Mòna’s, mvùla neàlokè.” Mòna’s kakùvwà . . . kacya kakùvwaku divuba mu dyulu to. Musùlu mutàmbe bunène wa mâyi ùvwa nditàmba dyàkamyaminà naadi Nzambi buloba adi, kasùlù kakesè kàà mu mwaba kampànda. Ki cìvwà musùlu mutàmbe bunène wà mâyi ùvwaku’s.

<sup>54</sup> Mpindyewu, bantu bàdì bàmba ne: “Kacyapu mmunyi mwikalaku mâyi kampànda mwà kufùmina muulu mwàmwa? Ndejàâyibi kùdìwu muulu mwàmwa mùdì dîbà dyòsha amu, pìikalaku kakùyì nànsha kamata muulu amu.”

<sup>55</sup> “Pìikalàbì ne Nzambi mmwambè ne: ‘ibàkà bwâtù, bwalu mvùla ùlwalwà,’ bwànyi mbwà kwibaka bwatù ne kudìlongolola, bwalu ùlwalwà. Yèyè ùdì Yehowàh-yilè, Udi mwà kulongolola mâyi kuulu aku.”

56 Nènkú cintu címwèpelè cyàkènzàYe nkulekela muntu, mukùtàkàne, muntu mucimbàkàne awu, wènza menemene ne maalu èndè à mamanya awu, bwà kufikisha ku dyenzeka címwàYe mumanyè ne ki címwà mwà kwenzeka aci. Nzambì kacya kátu mubutùle buloba to; muntu ngutu ubùtula buloba. Nzambì kátu ubùtula cintu nànsha címwè to, Nzambì ùtu uteeta bwà kulaminyina bintu byònsò. Muntu ngutu udibùtula nkaayèndè ku dimanya dyèndè, ànu mwàkènzaye mu budimi bwà Edènà ku mucì, ne bikwàbò. Nànku awu mukoleshi wa maalu kampànda ùdi ùtwa byanza pa bukolè kampànda bwà kapwishipwishi, mwaba kampànda, ùdiye ubùpetela awu.

57 Bàvwa—bàvwa díbà adi mwà kukwàta naabù mudimu, bwalu díbà adi bàvwa mwà kwenza naabu bintu bitùtù kacya katùyìku buumvwe bàteela nànsha. Katwèna banji kuya kumpàla kutambidila to. Bidi mwà kwangata bidimu bisàtù anyì binaayi, anyì bipìte apu, kumpàlà kwà twètù kucyènza, bwà kwenza cyàkènzàbo aci. Bààkiibaka bipaapu byà misàkà ne lupìngù lunène lwà mutù wà ntambwe ne bikwàbò. Katwènakù nànsha mwà kwenza aci to. Katwènakù mwà kubyènzuluka to, kakwèna mùshindù wà twètù kucyènza to, amba ànu twètù bapetè bukolè bwà tupwishipwishi. Bukolè bwà kasòloonyi, bukolè bwà nzembu, kabyènakù mwà kujuula nànsha dímwè dyà ku mabwe manènaanènàale awu to, kabyènakù mwà kubijuula panshì to. Ne àmwè à kù wòwò àdi bule bwà ntàntà wa kupita mìsèèsù yìbìdì, bitwè ne muulu mu lupeepèlè, ne bujitu bwà mìllyàlà yàà kilò. Bàvwa bààfikisha too ne kuulu aku bìshi? Nwamònu's, bàvwa bamanyè.

58 Kàdi bàvwa baàlekelela, muntu kampànda mulekelela bùmwe bwà maabombe à tupwishipwishi awu bùtaayikila mu lumwenu lwà mukwàbò muntu, kale mu matùkù awu, bwalu: “Ànu mwàkadibi mu matùkù à Noà,” ànu mwàkadibi amu, dishidimuka dyà mùshindù awu adi, bantu bàà meeji matwè bàà mùshindù awu abu; “ànu mwàkadibi mu matùkù à Noà, ki mwikalàbi kàbìdì, ki mwikalàbi kàbìdì ku dilwa dyà Mwànà wa muntu.” Dyenzulukà dyà címwàku's! Nwamònu anyì?

59 Mwab'ewu kí nkwanjì kwenza matùkù to kujuulabo cikezudi cyà màyi cyà cyena-leelù, címwa cisanganyibwa mwinshì—mwinshì lwà mu Mexique emu kumpàlà kwà mvùla wa Noà. Nuvwa bacimòne anyì? Címwa mu cibèjibeji, mùvwà cikezudi cyà màyi ànu mùdì citùdì naaci mpindyewu eci, címwà citùkinyijìbwe mwinshì mwà buloba menemene; cintu kampànda cyà tupwishipwishi címwa cicijingile. Kutaayikaci ne kumwangalaka mùshindù awu. Nwamònu anyì?

60 Mpindyewu, “ànu mwàkadibi mu matùkù à Noà,” bantu bàà meeji matwè, bantu bàà meeji matwè ne makolè àbo à tupwishipwishi ne bikwàbò byònsò, bàvwa mwà kwibaka bipaapu byà misàkà ne mpìngù minène yà nyama yà ntambwe ne bikwàbò. “Ànu mwàkadibi mu ditùkù àdi, ki mwikalàbi kàbìdì.”

Kàdi bìdi bikèngela bwà mudimu wùkòsolojiibwè mu ditùkù edi, bwalu kùdi ne cyà kwikala cisàmbà Cyambwibwe ciikala mwà kuumushiibwa. Ànu bu Henòkà, kùdi ne cyà kwikala bantu bàtùntumunyiibwe. Tudi mu musùmbà awu mu dindà emu, bantu bàdi batùntumunyiibwe bu mwàkambudiibwa Noà pa nkwaaka wa màyi.

<sup>61</sup> Kàdi vùlukàayi ne, kumpàla... Kanùpu eci mwoyi to! Kumpàla kwà dimata òmwè dyà mvùla kumatadi, kumpàla kwà kwikalaku cintu cìmwè mu dyulu, kumpàla mene—mene kwà Noà kujikijaye bwàtù abu, Henòkà wàkangaciibwa Kumbèlu. Henòkà wàkambwibwa kàyi mumòne lufù to, kutwàdijaye ànu kwendakana ditùkù kampànda, ne—ne dikòkiibwa dyà kùdi buloba kupangiladi kumulaminyina kwàdi panshi. Ki kudisanganaye ne dikàsà òmwè dibànde ndambù, ne dikwàbò dikàsà òmwè ditambe kubanda ndambù, ne dikwàbò dikàsà òmwè ditambe kubanda ndambù, nènku katanci aka, yèyè kwamba ne: “Buloba, wàwawèè.” Kubandaye ànu mutàngile mu Butùmbi.

<sup>62</sup> Nènku Noà mmwenze ànu ukènzakana kàdi kàyi mwà kupeta Henòkà mwaba nànsha òmwè to, yèyè kukenzakana kàdi kàakamanya kùvwa Henòkà muyè to, ki kwambayè ne: “Dìbà dyàkànyì dyà kwibaka bwàtù mpindyewu.” Nwamònu anyi? Ki kuditwayè ku mudimu wà bwàtù bwà kukambula bàshàadilè abu.

<sup>63</sup> Ncintu cìmwècìmwè aci cidi cyènzeka mwaba ewu mene. Èkèleeziyà wàkangaciibwa muulu mu Dyulu, ne mpindyewu Yone mmubàndishiibwe Nendè bu cifwànyikijilu cyà babilishiibwe ku lufù, bu mutùvwà bacyàngate makeèlèlè dilòòlò awu. Ne kujandula ne Dìyì òmwècìmwè dyàkamutùminà dìyì bwà kutàngilaye paanyimà pa buloba adi, divwa n’Dìyì òmwècìmwè dyàkamutùmina dìyì bwà kubandaye adi.

<sup>64</sup> Kaa, mwena Kilistò yònsò! Ànu Dìyì diine adi, Charlie, dyàkakutùminà dìyì òmwècìmwè dyàkutùminà dìyì ne: “Bànda kunu!” Kwènaku ne disànka bwà bwalu abu anyi, Mwanèètù Evans? Dìyì dyàkamba ne: “Kùdimukà,” Dìyì òmwècìmwè adi kwambadi ne: “Bànda kunu!” Kaa, ekèlekèle! Mwaba awu, dibiiikila kaayi’s wè! Mbwalu bulelèlè kaayi’s wè! Dijikùke, disungùlùke bu mpungi ne: “Kùdimuka, uNkwacile mudimu! Bànda mwaba ùNdi ewu.”

<sup>65</sup> Mwaba awu tudi bamumòne uleeja mpàla wa aba bàakafwà, Mòsà bwà kuleeja mpàla wa bansantu bafwè; babilike. Eliyà, ne cisùmbù cyèndè mu ditùkù dyà ndekeelu, ne cisùmbù cyèndè cyà Bambwibwe biimàne mwaba awu. Bwònsò kumpàla kwà Mukalenge Yesù! Yone ngwàkabuulula aci . . . Yesù wàkabàmbila ne kàvwa—kàvwa mwà kufwà to, ne bwàbù mbunganyi bu yèyè mwà kushààla ne mwoyi too ne kudimòna dyà dilwa Dyèndè. Ki bayiidi kutùulabo dìyì.

66 Kaa, mvw'a kujinga ngiikalapu mwà kwondola menemene, menemene mpindyewu's, bwà tusunsa tukesè, bwà èkèleeziyà. Muntu yònsò ewu's mmumanyè. . . Ne muntu yònsò ewu's ùtu ne nsòmbelu wa—wa pàà nkàâyende ne Nzambi. S'mbwalu bwà muntu-nkaaya, maalu à Nyumà àdi àkubweja mu myaba yùdi kùyiku mwà kudidìngà nànsha mwà kwakula bwàyi to.

67 Ngámònu cyòci eci mu mudimu wànyì mukesè wa bwambi, mupwekèle, ne kùdi misangu yàbùngì yindì ngàmba cintu kampànda kàdi ncìyi mumanyè ne mbwà cinyi ndi mucyàmbè to, ne kacýena cimwèka cimpè to (Kàdi nànsha nànkù, muntu kampànda neàmbe cintu kampànda.), kàdi nèntangilè bwà kumòna ne cintu aci necilwe ànu cipwàngàne menemene mu cyòci aci ne mwàci mwònsò. Nzambi neàcifikishe ku dyenzeka's! Pàndi muswè kwamba cintu kampànda, nèngàmbe ne: "Èè, mpindyewu, anji indila kakesè. *Mulúmyànà* awu, *kampànda*, *cikampànda* eci necyènzeke lwà mwab'ewu, mpindyewu aci—aci cìdi ne cyà kwikala ànu mùshindù awu." Èè, mu bushùwà bwà bwalu, ncyèna—ncyèna mumanyè ne mbwà cinyi ndi mucyàmbè to. Kàdi katancì aka, bìdi ànu mùshindù awu. Nzambi ngudi ucyènza!

68 Mpindyewu, pààkambà bayiidi aba ne: "Kaa, Yesù wàkamba ne 'muntu ewu kí mmufwànyine kufwà to.'" Yesù kàakambakù aci to.

Yesù wàkamba ne: "Bwènú mbunganyi pìikalaye mushààle ne mwoyi too ne paNgààlwà?"

69 Kàdi pa kumòna bayiidi batùùla díyi adi, díbà adi Yesù kwololaye cyanza e kwangata Yone ne kumubandisha ne kudyanjila kumulabwija cintu cyònsò nkòòng, kumònaye kààdyosha kàà Dilwa dyà Mukalenge. Yone wàkamòna Èkèleeziyà, wàkamòna ndekeelu wa cikondo cyà Èkèleeziyà, wàkamòna ndekeelu wa beena Yudà, wàkamòna Dilwa Diibìdi, wàkamòna bulondyanganyi bwònsò abu.

70 Kàdi tàngilàayi cyàkakèngelabi bwà Nzambi kwenza; kumusabishabo mu màfutà munda mwà mèbà matwè ku makumi àbìdi ne ànaayi kuntwaku, bwà kubafikisha ku dimòna ne yèyè ùwva wa Nzambi, ne Nyumà wa Nzambi ùwva mulaabe mu—musùukà. . . (cyà pambèlu aci, cyà ku buloba, anyi mwònsò munwàcìbùikila amu, mubidi wa buntu awu), ùwva mutàmbe kuwènzeja mu Bunzambi mu mùshindù wà ne mafuta àwva asaba ne luuya lukolè munda mwà mèbà makumi àbìdi ne ànaayi awu kaàkamufyondola nànsha dikòbà to. Bateeta kupatula Nyumà Mwîmpè mu muntu ku dimusabisha pèèkù; kanwèna mwà kwenza aci nànsha. Pashìishe kumwela mu cisanga cyà Paatèmò, ki kufundaye Mukàndà, ne kwalukilaye ne kuyiisha munda mwà bidimu mulongolongo. Hmm. Hmm.

71 Mu bushùwà bwà bwalu, mpindyewu, byàkakèngela bwà kwambulayè dína dibì ne: "Yèyè ùwva mwena lubùku, ùwva



muloji.” Mbanganyi bàdi bamanyè ne Yone wàkabùikidiibwa ne mmuloji? Kakùyì mpatà to! Yesù wàkabùikidiibwa nàнку, yèyè pèndè. Nwamònu anyi? Nwamònu’s, bàà pa buloba kabèèna ne cidibo bamanyè pa bintu ebi to. “Yèyè ùvwa mubadi wa meeji à bantu.” Nwamònu anyi? Bààkamba ne “Yèyè ùvwa muloji wa dikèma mu mùshindù wà ne wàkakika ne màfutà awu, bwà ne màfutà kaikadiku mwà kumwòsha to bwalu ùvwa muàkikè,” ànu bwalu kàvwa yèyè ùpetangana ne mmwènenu yàbò yà cyena Kàtòlikè ayi to. Kwàjiki.

<sup>72</sup> Yèyè ùvwa musadidi wa Nzambì uvwa. . . mudipwekeshe, ùvwa ne kaacitanda kakesè kuntwaku kàvwaye mulame. Kàvwa mwà kutwala bintu binène byà kale abi to, ki Nzambì ànu kumulama ne kumulaminyina. Ki mwàkènzàYe nàнку: Martin Munsantu ne—ne Irénée, ne bwònsò munda mwà bikondo byònsò abi.

<sup>73</sup> Ne Yèyè ùdi munkaci mwà kwenza cintu cimwècimwè aci leelù ewu, ùtùluka buludì. Mpindyewu, kanùpu mwoyi eci to, cyà ne Nzambì wàkalaya dinyukushiibwa dinène, ne byenzedi binène, byà bukolè. Mpindyewu, fùndaayi eci pa tubèji twènù tunùdi nufùnda atu (Nwamònu’s. Nwamònu anyi?), ne cidì muntu ubiikila ne “ncyà bukolè ne cinène aci,” Nzambì Yèyè ùdi ucibiikila ne “Ncikùtākàne!” Kàdi cidì muntu ubiikila ne “ncikùtākàne,” Nzambì ùdi ucibiikila ne “Cinène!” Kanùpu aci mwoyi to, nwamònu’s, kanùcipu mwoyi to. Aci necinùkwàcishèku mu bidimu bicilwalwà, bwalu tutu bindile cintu kampàndà cyà citàmbe bunène dībà dyònsò. Ne tudi munkaci mwà kupeta cyà citàmbe bunène dībà dyònsò, kàdi bantu bàà pa buloba kì mbacimanyè to. Anyi kabàvwa bacimanyè mu matùkù à Noà to, anyi kabàvwa bacimanyè mu matùkù à Yone to, mu matùkù à Yesù, mu matùkù à bapostòlò, mu matùkù à Irénée, ónsò à ku matùkù awu, bóbò kabààkacimanyaku to.

<sup>74</sup> Nànsha mene Jeanne d’Arc, s’ùvwa mukàjì mukesè, munsantu. Pàvwàye ànu mwànà wa bakàjì, Nzambì kwakula nendè mu bikèèna—kumòna, ne Mwanjèlò kwakula nendè. Nudi bamanye cyàkambà èkèleeziyà wa Kàtòlikè anyi? “Mmuloji.” Kàdi kumutèèkabo pa dikunji dyà cyoshelu ne kumwòshabo kufwàye, mwàhènzàbo kùdi baansaserdòsè bàà cyena Kàtòlikè amu; kumushebeya, kukòsabò cibawu cyà lufù lwèndè bu “muloji,” nènku Jeanne d’Arc wàkafwà bu muloji. Paanyimà pàà bidimu bitwè ku nkàmà yibidì, kusanganabò ne yèyè kàvwa muloji to, ùvwa muiyidi wa—wa Kìlistò.

<sup>75</sup> Bààkènzela bansantu bwònsò cintu ànu cimwècimwè aci. Yesù wàkamba ne: “Nganyi wa kunùdi ùdi baatatwènù kabàyi bakèngeshe? Nganyi wa ku baprófetà ukààdikù mulwè uvwabò kabàyi babènge?” Yèyè ne: “Bimanu bilaaba lupemba naanyi’s nwè.” Yèyè ne: “Nudi—nudi nupweka ne—ne nulengeja pa mpàla pàà nkità yà baprófetà, kàdi’s nwènù mene’s kì bàdi

babèèlemù's." Hmm! Ekèlekèlè! Ekèlekèlè! Nwamònu anyi? Yéyè kààkabàlaabakù maanyi to. Hmm! Yéyè wàkabambila ànu nàka.

<sup>76</sup> "Lukongo lwà nyoka elu," mwàkamba Yone, "nganyi wánùdimwiji bwà kunyeema ciiji cicolè cilwalwà? Kanùbangi kwamba ne nudi ne Abraham bu taatù wenù to." "Twètù tudi beena malongolodi kampànda, manène."

"Udi mwena Kilstò anyi?"

<sup>77</sup> "Kaa, mèmè's ndi Méthodiste. Ndi Presbytérien. Ndi mwena Mpenta." Aci kacyènamu to nànsha kakesè. Aci kacyèna ne cyà dyenzamù kutàmba—kutàmba—kutàmba—kutàmba—kutàmba mudi nèjè kàyi bwalu ne nesèsè yà dìbà to. Nwamònu anyi? Kacyèna bwalu naaci to. Pawikala mwena Kilstò, udi musadidi wa Nzambì mulediibwe cyàkàbìdì.

<sup>78</sup> Mpindyewu, mpindyewu, pàakalwà Yone, tuvwa bacimòne makèlèlèlè dilòlò awu. Mpindyewu, vùlukàayi ne, panùdì nufika ku cyòci eci... Bwà dyumvwija dyà bwalu, mèmè—mèmè ngánwàmbìdì dìbà adi. Nwavùlukaayi ne, bàà pa buloba bàdi munkaci mwà kupeta dinyùkishiibwa dyà ditàmbe bukolè ditùbo kabàyi banji kupetakù to, mpindyewu mene, èkèleeziyà wa pa buloba.

<sup>79</sup> Mpindyewu, vùlukàayi ne, kakùyì mpatà to, mu matùkù à—à Yone, matùkù à Yesù, kùvwa mafestò manène ne baakudi banène mu matùkù àbo awu, bantu banène bàà mamanya à mu mitù, nènku bàvwa bakoka makumi à binunu ne binunu byà bantu. Kaayifa mmufwànyine kwenza cinyi bu yéyè mwà kubiikila ci—cisangilu? Yéyè's ùvwa mwà kufikisha Yelusàlèmà mujimà awu, ùvwa mwà kukùngwija Izalèlèlè yònsò pàmwè, kuumukila ànu eku ne eku. Ne bwònsò bwàbò bàmba ne: "Kaa,"

"Mpindyewu, bu Kaayifa mwà kwamba bintu *kampànda*, abi's nebiikale binène byà dikèma."

"Kaa, udi witabuuja Mifundu anyi, Laabi, Révérend, Docteur, Mwepiskòpò? Udi witabuuja Mifundu anyi?"

"Cyà bushùwà, mèmè ndi ngiitabuuja Mifundu, mèmè's ndi mumanyi wa dibàla mumanyike bimpè!"

<sup>80</sup> "Èyo. Mpindyewu, Bible mmwàmbe mwaba ewu ne nekùlwe cikondo cikalàku, 'Mikùnà yònsò neyitupikè bu twàna twà bimpàngà byà mikòokò, mabeji wònsò neàtuutè bikàshì, ne myaba yònsò mitùmbùke neyipwekeshiibwè ne yìvwijiibwa mipwekeshiibwè, myaba yònsò ya mipwekèle neyibandishiibwè ne yìvwijiibwe mitùmbùke. Ne necyènjiibwe ku díyì dyà ewu udi wela lubila mu cipèèlà.' Udi witabuuja aci anyi, Laabi, Révérend, Docteur, Mpaasàtà?"

"Cyà bushùwà, mèmè ndi ngiitabuuja aci!"

"Necyènzekè munyi?"

<sup>81</sup> “Kaa, Nzambi neātume muntu wa bukolè pa buloba dīngā ditūkū. Kaa, yèyè’s neikale munène. Yèyè neikalè dīyī dyà ewu udi wela lubila mu cipèèlà, anyī yèyè neādyanjidile Maasiyā uvwa ne cyā kulwa awu. Nènku pàälwāye, kakūyī mpatā mu meeji àanyi to ne yèyè neātūülukè mu Dyulu ne neātūülukè ku ntempèlū. Yèyè neātūülukè buludī ku ntempèlū eku, wamba ne: ‘Mpindyewu, netwàngatè beena Loomò bwònsò ne kubātuuta too ne ku lufū. Kwajiki. Netùyobeshè beena Loomò bwònsò abu.’ Ne—ne pashiishe neāmbè ne: ‘Tūülukàku, Maasiyā!’ Ne Maasiyā neātūülukè, nènku netūfwimbe kùpèkupè yètū yònsò kuyisaka...anyī myelè yètū yā mvitā netūyenze nsesu ne kùpèkupè, nènku kakwàkwikala kàbidī mvitā to.” Nènku, uh-huh, ki dyumvwija dyàbò ndyòdī adi’s.

<sup>82</sup> Kàdi cyàkenzekà ncinyī pààkalwaci? Cyàkenzekà ncinyī? Kakuvwaku dileejibwa dyà Dyulu, divwàbokū bamònè to; divwakū, kàdi kabààkadimòna to. Kabààkadimòna to. Nwamònu’s. Ndībā kaayi dyàkatupikā mikùnā yònsò bu twānā twā bimpànga byā mikòòkò? Ndībā kaayi dyàkapwekelelā myaba mitumbūke yònsò ne dyàkabàndā myaba mipwekele? Muiyishi kampānda wa kale wa kwísū kushitākàne wàkalwa ùpatukila mu cipèèlà wa bwalu kàyī mumanyè nànsha i to. Bilondèshile maalu-malonda, wākaya mu cipèèlà pāvwaye ne bidimu citèemā kàdi kàkamwenekaku kàbidī to too ne pàkaavwāye ne bidimu makumi àsātū. Úvwa ùdyàngana ànu ne mpasu ne bwíci bwā mpàta. Mpasu ayi’s mbedi, mbedi yèbè yā milemile ayi.

<sup>83</sup> Bātu bāyīdya díbā dyònsò edi. Èè, nudi mwā kuyisumba ànu muneemu emu mu...Kanwediku meeji ne mmbibì to, bwalu nudi mwā kuyisumba ànu muneemu emu mu makājinyī à byākudyā nwènū naayi dijinga, bānā bàā mbulūbulū, bwíci bwā mbulūbulū, mpasu, nyoka yā nkānga, cyònsò cinùdī baswè aci, nwamònu’s.

<sup>84</sup> Pa nānku ùvwa ùdyàngana ànu ne mpasu ne bwíci bwā mpàta. Ncyākudyā kaayipu’s wè! Kàdi ùvwa mulamībwe kùdī bukolè bwā Nzambi. Kāvwa ùvwala bilāmbā byā nshìngū wa nkoolò abi to; mùvwā muntu kampānda mwambe makèèlèlā dilòòlò awu, Mwanèètū Parnell anyī umwe wa ku bóbò. Kāvwa mulwate cinkūtū cileepa, ne byònsò abi to. Wàkapatukila mu cipèèlà mudjìngile cipese cinène cyā ciseba, cyā kale cyā mukòòkò. Ànu mūngāmbi ne, pāmwāpa. . . Twètū bitu bikèngela kwowa māyī ku ditūkū dyònsò edi, ne pāmwāpa yèyè kāvwa wōwa māyī kasangu kāmwe mu ngondo yīsātū anyī yīnaayi to, lwā mu cipèèlà mwāmwa. Ncyēna mumanyè to. Kāvwa wa bātāmba kutāngila to. Kāvwa ne cyambilu to. Kāākayaku mu bimenga kampānda binène bwā kwenza tūmpanyè tunène to. Wākiiimana kuntu kwāka pa nsenga yā ku mwelelu wā Yadènè aku, bitoci bimushiikidila mu binū, ne kwambayè ne: “Nwènū lukóngò lwā nyokā yā ntòoka nwé, nganyī wānūdimwiji bwā

kunyeema ciiji cicolè cilwalwà?” Hmm. Ki pààkapwekeshiibwà myaba mitumbùke mpòpò apu, nwamònu’s, ne myaba mipwekèle kubàndishiibwayì. Uh-huh. Èyowà’s, mukalenge.

<sup>85</sup> Pashiishe, katanci aka anyi, bàvwa batèkèmène ne Maasiyà ùvwa mwà kutùluka ne Banjèlò ne bikwàbò, ne musòmbele lwà pa cipooyi mwaba awu ne ntempelu uvwàbò baMwibakile bwà kulwamu awu (mutùdi twibaka myaba minène menemene leelù ewu mu matùnga ne bikwàbò). Nwamònu anyi? Kàdi Wàkalwa díbà kaayi? Wàkacìnguluka umwe ne umwe wa ku nsunàngòngà ayi, dyònsò dyà ku malongolodi awu, ne kupwekela ku cikùmbi. Bòbò mbààkaMwenzeja nàнку.

<sup>86</sup> Ki cidiku leelù ewu aci’s. Bàdi bàMwenzeja bintu, bàmwenzeja bwà kucyènzayè, bamwenzeja bwà kwikala pankaci pàà bukwanàngumba, bwalu Mukenji Wèndè kawèna ùtwa ku cyà dingumba to. Mukenji Wèndè leelù ewu, muiyishiibwe kùdi bambi Bèndè, ùdi pankaci pàà màngumba bwalu màngumba mmaMwipàte. Bible ngudi mwambe nàнку. Yèyè ùvwa usanganyiibwa pambèlu, ùkookola, uteeta bwà kubwela (Nwamònu anyi?), mu èkèleeziyà Wèndè Yèyè mwine. Ki mwaba wùdi bwalu ngwòwò awu. Nwamònu’s, bìdi ànu byà mwomùmwe leelù ewu.

<sup>87</sup> Pa nàнку, nwavùlukaayi ne, cìdi cìmweka cinène kùdi muntu, ncikesè kumpàla kwà Nzambì. Mpindyewu, ki bwà cinyi kabyèna bikèngela bwà kwikala ne bilòngò byàbùngì to. Nèнку pàdi Nzambì ùlwa kàbìdì, pàdi Yesù ùlwa kàbìdì, nenùshìtukè, pa kumòna musukwidyanganyi mukèsè wa bilàmbà mu mùsèèsù awu. Uh-hum. S’nenùshìtukè’s, mulùmýàànà utu kàyì wàmbaku cintu nànsha cìmwè awu, kacya wàdilaminýina myanda yèndè misokome ne wènda ùnyunguluka kumpàla kwà Nzambì, mudìpwekeshe. S’nenùshìtukè. Necìshìtu- . . .

<sup>88</sup> Mwva muiyishe ànu àbìdì àdi panshì aa, ku cilumbulwidi . . . *Dishìtudiibwa ku Cilumbulwidi.* Kabyàkukemesha bwà kumòna mupànyishi wa maala à kapyà kuntwaku to, yèyè’s mmumanyè ne nkuyaayàye. Cyà bushùwà. Kabyàkushitula bwà kumòna mwena mafi, ngèndàmàsàndì, ne bikwàbò byònsò kuntwaku nànsha, abi kabyàkukèmesha to. Kàdi dishìtuka nedìikaleku, ne dyediibwa dyà màyi ku makàsa, bwà aba bàdi beela meeji ne bàvwa mwà kuya abu; uh-huh, èyowà’s, kàdi pashiishe kubèngiibwabò. Aba bàvwa bàmba ne: “Èè, anji indilabi kakesè tǔng, mamwànyì ùvwa wa mu èkèleeziyà ewu, tatwànyì ùvwa wa mu èkèleeziyà ewu, kakwànyì muntu mulùme ne kakwànyì muntu mukàji. Mémè’s ntu cidimba cyà mwòmò amu kacya bàndela.”

<sup>89</sup> “NguuMùkìlaayi apa, nwènu beena mudimu bàà bubì, Ncìvwa nànsha munùmanyè to.”

<sup>90</sup> Tàngilàayi mu matùkù pàvwà mukùlumpè mukèsè, Simèonà ewu, muntu uvwa kàyì mumanyike, kàyìkù ne luumu to, katwèna

bamanyè kantu nànsa kàmwè bwèndè mu Bible to. Kàdi Bible mmwambe ne: “Bàakamubuulwila kùdi Nyumà Mwîmpè,” (S’ki yêyè awu; s’ki bwalu mbwôbù abu.) “bwà ne kàvwa mufwànyine kufwà pàvwàye kàyì mumòne Kilistò wa—wa Mukalenge to.”

<sup>91</sup> Pashîishe tângilàayi numòne ne Yone Mubatiiji ùvwa nganyì, muntu wa mùshindù kampànda wà pabwèndè awu, muntu wa mwitu lwà mu meetu. Cyàkamubuuludiibwa. Wàkapatuka wènda ùyiisha Mukenji. Tângilàayi aci!

Anna mukèsè awu ùvwa nganyì?

<sup>92</sup> Virgo mutekète awu, Mariyà, mu—mu cimenga cyà Nazalèeta (cyà lonji ànu bu Jeffersonville) ne mwaba ùvwa mpèkaatù ne bintu byònsò bicyòkwèle, kàdi yêyè ùvwa mudilame mukezùke bwalu ùvwa mumanyè ne dîngà ditùkù kùvwa Maasiyà uvwa ne cyà kulwa. Nwamònu anyi?

<sup>93</sup> Yözefù, mukoonyi wa mabaya, ùkaavwa mufwishe mukàjèndè ne—ne ùvwa wèndela mwànà mukèsè wa bakàji ewu bwà kumusela. Nènku cìvwa mmu ngiikadilu awu mwàkalwà Nyumà Mwîmpè. Ne pashîishe bàà pa buloba kulwabo ne kunyangakajabu luumu lwèndè, bu mùdi ne “munsantu mubunguluki wa mu malaba, mwena mpenta.” Nwamònu’s, banyangakaja luumu lwèndè. “Mòna’s, aci, yêyè...mwànà awu’s kî mmulediibwe mu dibaka dinsantu to.” Nwamònu’s, bàvwa biitabuuja aci, ne bìvwa bimwèke ànu bu ne bìvwa nànkù. Kàdi Nzambi ùtu wenza nànkù bwà kufomija mèsù à beena meeji ne batàlame, ne kuCìbuulwila bânà bàdi baswè kuyiila.

<sup>94</sup> Ndi ntekemena ne kùdi ndambù wa nshindameenu bwà pangìikala mwà kulenga cintu kampànda paanyimà pàà katanci. Nènùleeje. Nudi numòna maanyì aa anyi? Mpindyewu, cîngánwàmbidi aci, nshindameenu, bwà kumòna ne kî mmuntu to, n’Nzambi, nêmfunkunè ku cyòci eci. Èyo.

<sup>95</sup> Mpindyewu: “Bànda mwaba ewu,” ke cìvwa Diyì adi. Nènku pàakakangulaye yêyè kuumvwa mpungi udila, ne pashîishe dyàkamwe Yone ùvwa mu Nyumà—ùvwa mu Nyumà, nènku ànu ne cibweledi mu Nyumà dyàkamwe kubangaye kumòna bintu. Udi ubanga kumòna bintu paùdi ubwela mu Nyumà. Dyàmbedi bìkèngela ùbwele mu Nyumà. Kî mmwòmò anyi?

<sup>96</sup> Mpindyewu, amba tũng bu wêwè mwà kuya mu dinaya dyà ndundu, wàmba ne: “Ncyà bushùwà ne mêmè ntu munange ndundu.” Um-hum. Nènku wêwè kusòmbela mu nkwasà yà kumpàla ayi, ànu lwà mu katàndà kàà bukalenge amu nènku mwikale munkaci mwà kubandila baa Yankees anyi baa Bulldogs, bwònsò banùdi bamanyè abu, munkaci mwà kunaya. Kàdi bóbò bwònsò munkaci mwà dinaya dyà mikùkùkù mwaba awu.

<sup>97</sup> Kàdi bàà ku lwèbè luseke bàmba kwobeshiibwa, nènku dyàkamwe Babe Ruth wa cyena leelù utaayisha makòndò à

katunga mùshindù *ewu* ne wàmba ne: “Udi mumòne kwàka nàka anyi?” Tudi ne bantu bàsàtù bàdì boobeshe. “Yööö!” Kàdi mmumutuute muye kule kwà kàyì umweneka to; utuula cifulu cyèndè ne utwàdija kudyèla kapeepa; ùpweka mutàngile ku kazùbù kàà kumpàla ne ùkènzakana, balùmyàànà bwònsò abu bamungwile; uya ku kazùbù kiibìdì, ùlabulangana ku cyanza ne munàyi mwibìdì wa ku cimanu awu; wàsa lwendu, wàsa lwendu mu cinyànyà walukila pa kaaba kèndè, winamija wèndè. . . Mòna’s, ekelekèle! Ekelekèle! Mbila mikolè kàayi, ditumpika kaayi, mikunda kaayi, mbila ya ne: “Hòloolò!” Mòna’s, bàvwà bafwànyine. . .

<sup>98</sup> Ntuku mubàmòne cyà bushùwa bangata. . . Nudi bavùluke cifulu cyà kale cyà lutanda cyà makàkà aci anyi? Ngàakaya ku dinaya dyà ndundu ditùkù kampànda kàdi kumòna mwabilaayi kampànda mobeshe kandundu kàà cikùmà. Nènku mwabilaayi ùvwa musòmbe mumpàla mwànyì ne cifulu cyà makàkà awu, kusalukaye bikolè byà kacya; kukwàta cifulu cyèndè ne kucipulumuna ucipwekesha, kudyenzela nshingu wa nkoolu mùshindù *ewu* mpàvwa kaalusongo kàaci katùuke kaye. Mòna’s, yèyè’s ùvwa upicila mu cikondo cyà dicyònkomoka! Yèyè—yèyè ukaavwa mupàtùke mu yèyè kacìyi mumanyè cìvwàye wènza to. Ànu udyela udikuma ne wela mbila ne wela mikunda ne utumpika. Èè, mpindyewu, nudi bamanyè cìndì mèmè ngeela meeji, ncyà bushùwà ne yèyè ùvwa ne. . . yèyè ùvwa munan- . . . ùvwa. . . ùvwa munange ndundu. Yèyè ùvwa munangi wa ndundu wa dipòkò, ànu mùtu munangi wa mfwanka anyi munangi wa cicyampa amu.

<sup>99</sup> Mèmè ntu munangi wa Yesù. Èyowà’s. Ntu ànu munange aci’s. Ntu. . . Wèwè mufike ku diikala munangi wa Yesù, udi umòna’s, munangi wa cintu kampànda.

<sup>100</sup> Dìbà adi nudikù mwà kudifwànyikijila mwabilaayi awu wàmba ne: “Kaa, cyà bushùwà, mèmè’s ndi munangi wa ndundu.” Kàdi baa ku luseke lwèndè bàmba kwobeshiibwa, nènku bamumòna ùlwa wòbesha mùshindù awu, yèyè ùkènzakana ne: “Èyowà’s, ngeela meeji ne aci’s cìvwa ànu cìmpè pààci’s.” Uh-huh. Wa bwalu, wàmba “mùdiye munange ndundu.”

“Kaa, yèyè’s ùdi cintu kampànda!”

<sup>101</sup> Udi mufwànyine kwamba ne: “Mòna’s, kwèna muciswe to, kí mmwòmò anyi? Kùdi cintu kampànda cipampalamuke mu wèwè amu!” Munangi yònsò mwìmpè wa ndundu *ewu* mmufwànyine kwamba ne: “Ncinyi cìdi kacìyi cyènda bìmpè ne mulumyana wàwà’s? Cintu kampànda cipampalamuke mu yèyè amu. Mutàngilaayi numòne mùdiye musòmbe mwaba awu.” Huh! Aci’s cìdi ànu. . .

<sup>102</sup> Sàkidilàayi ibìdì ku ibìdì mpindyewu bwà nùmvwa, nwamònu’s. Kaa, paudì munangi wa Yesù, ne umvwa mùdì

Nyumà Mwîmpè ùkùbweja Méyì awu, díbà adi cintu kampànda cìdì cìkobola mu wèwè amu! Kaa, udi upátuka mu wèwè's!

<sup>103</sup> Ndi ntèkemena ne muntu ewu ùdi ùmfwilakù luse, mmusòmbe lwà pabwípì apa. Muntu munène mule, wa nsukì mifìike udi musòmbe kaaba aka, uvwa mwimane mwaba awu dilòlò kampànda mu cibambalu amu, kàdi muntu kampànda kwambaye cintu kampànda cyà... dyambulwisha, nudi bamanyè's, cyenze bu civwa cimubènèshe mùshindù kampànda. Kàdi nsongàalùme mukwàte ne byà luse awu ùvwa mupicile mu cikondo cyà bwalu bukòlè, ndi mumanyè ne—ne mukàjèndè wàakamushiya ne kumufùnda ku tubàdi bwà kushipa dibàkà ne bwalu yèyè ùvwa munange Mukalenge Yesù. Ncyà bushùwà. Ki muntu kampànda kwambaye cintu kampànda bwà Yesù, nudi bamanyè's, yèyè ùvwa ànu bu umwe wa ku banangi abu's. Ne yèyè ùvwa muye ku mvità ne mwashìbwe pambidi pònsò, ne bikwàbò byònsò, mwànà wa balùme awu's; mèmè kumumvwila luse. Kwalukilayè kumbèlu ne... bânà bèndè ne mukàjèndè. Pashìshe yèyè—yèyè wàkalaya Mukalenge ne neàMukwàcile mudimu, nènku Mukalenge mmwenze ànu ùbanga kumubènèsha ne yèyè pèndè kuditèeka mu bulongame ne Nzambì, mukàjèndè kumukùdimukilaye, kumufùndaye bwà kushipa nendè dibàkà ne kumba kumushiya. Kumushiyaye musòmbe pambèlu mu mashika. Kàdi yèyè ùcivwa ànu munangi's.

<sup>104</sup> Nènku pààkiimanaye mwaba awu dilòlò kampànda ne muntu mukwàbò wàmba cintu kampànda bwà Yesù, cintu kampànda, mùshindù ùvwaYe munène, mùshindù awu, kwambaye ne: “Kaa, Butùmbi's wè!” Kukùpaye mabòkò èndè kàdi's ki cyanza cyèndè civunga aci kutùbulabi cimanu mùshindù awu. Kàvwa mumanyè ne mmwenze nàнку to. Cyanza cyèndè civunga aci ki kushààla kacya cyàkàlama mu cimanu. Yèyè ne: “Mwanèètù Bill, nèmfute bwà kucìlongolwèsha.” Ngeela meeji ne Mwanèètù Wood wàkalwa ne kwaluja dibaya adi, kupingaja dibaya dikwàbò. Kabyàkatùtùcisha to, Mwanèètù Ben, tudi ànu—tudi ànu ne disànkà dyà ne wèwè ùtu munangi. Nwamònu anyì?

<sup>105</sup> Pàdi Nyumà Mwîmpè ùkwenzela cintu kampànda, kwena ànu mwà kushààla mupuwe to, kùdi cintu kampànda cìdì citùtuka mwaba awu. Amen. Yöyöyò! Èyowà's, cintu kampànda cìdì cikutwà byanza, wèwè munangi wa Kilistò awu. Pàdi munange Mukalenge, cintu kampànda cìdì ànu cìdyela, cìbàkula, ciikale ne nzala ne nyòòtà, Yesù wàkamba ne: “Bàà disànkà ng'abu, bwalu bòbò nebùùjiibwè. Mbàà disànkà pàdìbu ànu mene ne nyòòtà, nànsha wèwè muMupetè anyi kùyì mwanjì kupeta to.” Mbanganyì bàdiku baswè Nzambì mutàmbedìle? Èyo. Èè, cìdì cyenza ne ùjingè Nzambì mutàmbedìle aci, udi mubènèshìibwè ànu bwà kwikala nàнку. Nànsha kùyì naaCì to, ucidi ànu mubènèshìibwè. “Ne bàà disànkà ng'aba bàdi ne

nzala ne nyòòtà.” Udi mubènèshìibwe ànu bwà kwikala ne nzala ne nyòòtà. Bwalu udi naaCì dijinga, udi mubènèshìibwe. Bwalu kùdi bantu bààbùngì bàdì kabàyi bàCìswe to.

<sup>106</sup> Nudi bavùlùke diyishi dyànyì dyà dilòlò adi anyi? Nwamònu’s, byenzè bu mukùtakane awu, wàkashààla mulame kashèètè kàdi mwimanshe màtápishì awu. Nwamònu anyi? Kwangaciku kashèètè aku to, angàta Dipà adi. Èyo.

*Mpindyewu, dyàkàmwè. . . mu nyumà: nènku, mònaayi, nkwasà wa butùmbi. . . mutèèka mu dyulu, ne kampànda musòmbe pa nkwasà wa butùmbi.*

<sup>107</sup> Mpindyewu, mònaayi, pashìishe ndambù, anyi, tudi bacìpete makèlèlè dilòlò awu, ngeela meeji, ne pa Nkwasa wa butùmbi ewu pàvwà. . . Tudi tujandula ne dyàmbedi kakùvwakù cintu nànsha cimwè pa Nkwasa wa butùmbi apu to, nènku mpindyewu kùdi Muntu kampànda pa Nkwasa wa butùmbi pa nànkù bìvwa bileeja ne Yesù ùvwa mulwè ne Èkèleeziyà Wendè mubànde mu Butùmbi ne musòmbe pa Nkwasa Wendè Sungasunga wa butùmbi. “Musòmbe pa Nkwasa wa butùmbi,” aci’s mpaanyimà pàà cikondo cyà Èkèleeziyà. Mpindyewu, mpindyewu, tudi baswè kufika ku cyòci aci paanyimà pàà katanci.

<sup>108</sup> Mpindyewu, wèwè udi wamba ne: “Èè, nkwasà Wendè wa butùmbi ùdi penyì leelù ewu?” Mpindyewu, Mwanèètù Neville, mèmè mupangilè kwamba aci, ùnkonkè paanyimà pàà katanci ne: “Nkwasa Wendè wa butùmbi ùdi penyì leelù ewu.” Ngeela meeji ne nèmfikè too ne kwòkò aku. “Nkwasa Wendè wa butùmbi ùdi penyì mpindyewu piikalaYe kàyi pa Nkwasa Wendè wa butùmbi awu mpindyewu?”

Yèyè kèna pa Nkwasa Wendè wa butùmbi mpindyewu to. To, mukalenge.

<sup>109</sup> Èyo, mpindyewu:

*Nènku ewu ùvwa musòmbe awu ùvwa ne cya kwikala ne mmwènekèlu wa. . . yaspà ne. . . dibwe dya sardwànè: ne kùvwa mwanzankòngòlò munyùngùlùkile nkwasà wa butùmbi eku ne eku, mu cimfwànyì. . . ku mèsù bu mùdi diikala dyà màyi à matàmbà.*

<sup>110</sup> Mpindyewu, twàngatàayi mpindyewu mvensà mwi3, bwà kubanga. Ne pa nànkù “yaspà,” ewu Ùvwa musòmbe pa Nkwasa wa butùmbi awu ùvwa ne cyà kufwànangana. . . Mu ngaakwilù mukwàbò, panùdi nuMutàngila, Yèyè ùvwa mu bulenga bwà dikèma, bulenga bwà dikèma! Kaa, ndi muswè kuMumòna. Kàdi nwènù?

<sup>111</sup> Dìngà ditùkù. . . Ndi mvùluka Mwanèètù wa bakàji Cadle, Mwanèètù wa bakàji Howard Cadle, ngeela meeji ne bààbùngì bàà kunùdi mbamuvùlùke. Mvwa nsanganyiibwa dyamwàmwa dyà mùsèèsù wàwa, ne mukàjàànyì udi musòmbe mwab’awu mpindyewu ùdi ùvùluka ne ùvwa ne mashika, mu cibambalu



amu. Kādi mvwa mujuukile kuulu, ne mvwa ne kakesè, kàà kale . . . kàvwa nkaadicyùwà kaa mu meetu mwaba awu kiikale ne . . . tuvwa twoshela dyâmpà dyètù mu mfuulù, mu lubungulu amu. Nènku mèmè . . . kùvwa mashika makolè ne lupeepèle lutuuta, mu movù wa mashika, nêjè panshì, eku lupeepèlè lumòngane ne kubwelela ku mpeepu yà mishi aku, nènku ncìvwakù nkòòkeshā mwà kuteemesha cintu aci to, nànsha bwà kupandisha mwoyi wànyì. Nènku nkààvwa mutàcishiibwa ngamba kutaayika bwa bwalu abu. Ki mème kusakidilamu ndambù wa nkùnyi, kujìmakù cyākàbìdì. Billy eku mashika àmba kuya nendè ne mukàjàànyì ne mashika, mvwa ndwangana bwà kuteemesha kapyà. Ki kwenzekabi ne nkangule cisanji ne (tusunsa tukesè kumpàla, ne cikaavwa cibange kukwate luuya, citeeme), ne Mwanèètù wa bakàjì Cadle ùvwa wimba ne: “Pàngààyà mu Buloba abu, ku mwelelu wà kule awu, ndi muswe kumòna Yesù. Kàdi wèwè?” Kaa, ekèlekèle!

112 Mèmè kusòmbela ànu panshì apu lwà munkacìnkacì mwà nzùbu amu kàdi kushààla musòmbè ànu mwaba awu e kukutulangana ne mwadi’s. S’ndi bamanye musòmbèleye wimba, ùpweka, ùpatula díyi dyèndè dishèeme dìdì bu nyuunyi wa mbònkimbò adi. Ndi muswè kumuuvwa pàngààsabukà kuya dyàmwàmwa; wàmba ne: “Ndi muswè kumòna Yesù. Kàdi wèwè?”

113 Mèmè kudyambidila ne: “Éyì Nzambì wa yààya, èyowà’s, ndi muswè kuMumòna dīngà ditùkù. Pìikala bilòngò byònsò bimana kupita, ndi muswè kumòna Yesù.” Mùnyi . . . Bwà kuMumòna pa Nkwasa Wendè wa butùmbi, bulenga Bwèndè, bulenga Bwèndè! Nènku bu mèmè . . . Kaa, ndi muswè kwimana mwaba wàkiimanà Yone, bwà ngaamòna ànu mwà kwimana ne kuMubandila.

114 Mwab’ewu kukaadi cikondo, lwà kwìnshi eku . . . mu cikondo cyà bupika. Ndi ngàmba bwalu ebu bwà balunda bàànyì bàà bafìike bàdì mwab’ewu mu dīndà emu. Kwakadi muntu mununu wa bafìike, kàdi ùvwa . . . ùvwa uya ku mwaba kampànda wa mukèsè, kùvwàye ne ciibidilu cyà kuya.

115 Nènku byòbi ebi bìvwa pa ciibidilu byenzeka mu Kentucky mwàmwa, batwilangana bìmba. Pàmwàpa Maman Cox ne bakwàbò bàdì mwà kuvùluka cikondo cìvwàbo ne ciibidilu cyà kuya ne kwimba misambu, nudi bamanyè’s, baya ku nzùbu yà bantu bìmba cisanji cyà orgue, bisùmbù byà bansonga ne bwònsò bìmba. Bìvwa byenzeka pa ciibidilu apa ku Utica eku, ne eku ne eku mu myaba yà mu ditùnga emu. Mpīndyewu bàdì ne kàlàngì kàà wiskì, mwaba kampànda mu difestò dyà maja à bidùndadùndà.

116 Kàdi, cikondo aci, bàvwa bìmba miyengà. Ùmwè wa ku misangu yà dimba dya kale dyà miyenga edi, kùvwa mwanèètù mukulumpè, wa bafìike wàkasungidìibwa. Ki Mukalenge

kumubiikila bwà kuyiishaye, kàdi ditùkù dyàkalondà yéyè kuya eku ne eku wàmbila bapika bàvwà mu madimi abu. Yéyè ne: “Mukalenge mmusùngile makèlèlè dilòlò awu ne mumbiikile bwà kuyiisha bânà bèètù.”

117 Ki ndekeelu wa byònsò bwalu kufika ku maci à mwena mpàta anyi mwena budimi abu. Kumubiikilaye, kwamba ne: “Sambo, ndi nkukeba, bwelela muneemu.” Yéyè ne: “Bwela mu birò byànyi emu.”

Yéyè ne: “Èyowà’s, mukalenge,” kuyaye tamakatamaka too ne ku birò.

118 Yéyè ne: “Cìndi ngumvwa wenda utangalaja munkaci mwà bapika ncinyi eci, munkaci mwà bantu bàdi kuntu kwàka, beena mudimu bàanyi, bapika bàanyi, ne Mukalenge mukuvwije mudishikàmìne?”

119 Yéyè ne: “Èyowà’s, mukalenge.” Yéyè ne: “Mfùmù, mèmè’s ndi mupika webè.” Yéyè ne: “Ngàkasùmbiibwa ku mfranga yèbè, kàdi . . .” Yéyè ne: “Kàdi mùshindù ùdi Nzambi mùmpe budishikaminyi makèlèlè dilòlò awu, Yesù mmumvwije mudishikàmìne ku nsòmbelu wa mpèkaatù ne bundù, ne nsòmbelu wa lufù. Mmumvwije mudishikàmìne.”

Yéyè ne: “Sambo, ngwambilamu menemene anyi ngudingà’s?”

Yéyè ne: “Ndi ngàmbilamù.”

120 Yéyè ne: “Ndi muumvwe bàmba ne neùtwadije kuyiisha cisàmbà cyèbè—cyèbè eku ne eku mwaba ewu mu madimi emu ne bikwàbò.”

121 Yéyè ne: “Èyowà’s, mukalenge!” Yéyè ne: “S’ki cìndi ndumbila bwà kwenza ncyòci aci, nkuyiisha kwà Èvànjeeliyò ewu kùdi cisàmbà cyànyi.”

Yéyè ne: “Sambo, ngwambilemu anyi’s ngudingà’?”

Yéyè ne: “Ndi ngàmbilamù.”

122 Yéyè ne: “Lwàkù, lwà tuye neebè ku—ku tubàdi, mèmè pàanyi nènkpèèshè budiikadidi bwèbè. Udi mudiikàdile kùndi, ne udi mudiikàdile kùyikù kàbidi mupika to. Mvwa mukusùmbe, ndi wanyi mèmè, ne ndi nkushiya mudiikàdile bwà wamòna mwà kuyiisha Èvànjeeliyò kùdi cisàmbà cyèbè.” Kupwekaye ne kwelaye cyàlà ku budishikaminyi, anyi dijikula patòoke, ki yéyè kuvwijiibwa mudiikàdile. Kàcivwa kàbidi mwà kusùmbishiibwa bu mupika to. Ùvwa muntu mudishikàmìne bwà kuyiishaye Èvànjeeliyò.

123 Wàkayiisha munkaci mwà bânà bààbò munda mwà bidimu. Batòoke bààbùngì bààkakùdimuna mucìma ku mudimu wèndè wa bwambi. Dìngà ditùkù dìbà dyà lufù lwà mukùlumpè awu kulwadi. Yéyè ukaavwa muyiishe munda mwà bidimu makumi àsàtù anyi makumi ànaayi, anyi bipite apu. Nènku

pààkakumbana díbà dyà kufwàye, ùkaavwa mulààle mu cibambalu amu, ne bânà baabo bààbúngì bàà batòòke bàkaavwa badisangishe mu cibambalu amu bamunyùngùlùkile ki kwelabò meeji ne ùkaavwa muyè munda mwà mèbà matwè bu ku àbìdì anyì àsàtù. Pashiishe ndekeelu wa byònsò pàakatàbulukàye ne kukenzakanaye mu cibambalu amu, kwambaye. . .

“Sambo, uvwa penyi?”

Yèyè ne: “Kaa, ndi mwalukile cyàkàbìdì apa anyì? Ndi mwalukile cyàkàbìdì anyì?”

Kwambabo ne: “Bwalu bùdì cinyì, Sambo?”

Yèyè ne: “Kaa, nkàvwa musabuke muyè mu Buloba bukwàbò mwàmwa.”

Bòbò ne: “Twàmbilaaku byà mwômù’s.”

124 Yèyè ne: “Èè, ndi ànu mubwele’s, mu Bwikadi Bwèndè.” Ki yèyè ne: “Pàmvwà mwimane mwaba awu,” yèyè ne, “kulwaku Mwanjèlò, wàmba ne, ‘Dìna dyèbè n’Sambo *Kampànda* anyì?”

Yèyè ne: “Èyowà’s, mukalenge, s’mmwômò’s.”

Yèyè ne: “Bwela.”

“Mèmè kubwela munda, ne kuMutàngila musòmbe mwaba awu.”

125 Yèyè ne: “Sambo, vwilà kùneeku mpindyewu, paanyimà pàà wèwè mumanè kuMumòna, ndi muswè bwà ùlwe mwab’ewu, tudi baswè kukupà muzàbì wèbè, tudi baswè kukupà lunkòmbè lwèbè, tudi baswè kukupèèsha cifulu cyèbè cyà butùmbi.”

Sambo kwamba ne: “Kungambidiku bwà nkombe, bifulu byà butùmbi, ne mìzàbì to.”

Yèyè ne: “Kàdi udi mupete difutu, tudi baswè kukupà difutu dyèbè.”

126 Yèyè ne: “Kuntèèlediku byà . . .bwà bwalu bwànyì . . .bwà bwalu bwà mafutu to.” Yèyè ne: “Ndekelaayi ngiikale ànu mwimane bwà kuMubandila munda mwà bidimu cinunu. Ki cìikalà dyànyì difutu aci.”

127 Ngeela meeji ne ki mùshindù awu utùdì bafwànyine kudyumvwa bwònsò ne: “Ndekelaayi ànu ngiikale mwimane mMubandila.” Kaa, nebinkèngelè bwà mèmè kwikala ne mubidi mushilàngàne ne ùndì naawu mpindyewu ewu, kalanjilanji kònsò kàà buntu bwèbè ànu bwà kuMubandila.

128 Ki Yone awu mwimàne e kuMumònayè musòmbe pa Nkwasa wa butùmbi, ne Yèyè “ùvwa mufwànàngàne ne dibwe dyà yaspà ne dyà sardwànè.” Mpindyewu, bintu byònsò ne mwàkù wònsò ewu ùdì ne dyumvwija kampànda mu Bible. Mpindyewu: “dibwe dyà yaspà ne sardwànè.”

129 Mpindyewu, bu nwènù mwà kumòna, bìdì binwàngana ne mikwàbò Mifundu. Mu bitùpà byà kale byà Mifundu, Yèyè ùvwa

Alpha, Omega, Yèyè ngùvwa Mbangilu ne Ndekeelu, Yèyè ùvwa wa Kumpàla ne wa Ndekeelu, Yèyè ùvwa Taatu, Mwànà, ne Nyumà Mwímpè. Yèyè ùvwa “byònsò mu byònsò” byungwija mu Yèyè. Maatàayi 17 ùdi ùleeja ne Yèyè. . . kuulu ku Mukùnà wà Dikùdimuka dyà mpàla, byònsò bivwa bidisangishe mu Yèyè.

<sup>130</sup> Mpindyewu, “yaspà” ùvwa—ùvwa dibwe, ne “sardwànè” ùvwa ndibwe. (Mpindyewu, netùkafikè ku meekala àwù paanyimà pàà katanci.) Mpindyewu, ndi muswè bwà numòne ne yònsò wa ku bankambwa pàvwàbo bàlediibwa, èyowà's, muntu yònsò, ùdi ne dibwe dyà dilediibwa. Dyànyi mémè, bàtu bandle mu ngondo mwinayi, ndibwe dyà mbongo. Ne ngondo mishiilèshihilàngàne yitu yileeja mabwe mashiilèshihilàngàne. Èè, bankambwà bàvwa cintu cimwècimwè aci. Musangu wònsò wùvwà nkambwà, pàvwàye ulediibwa, ùvwa ùt-. . . ùvwa ne dibwe dyà dilediibwa.

<sup>131</sup> Nènku ànu bwà kwimanyina kaaba aka bwà katanci kakesè cyanààna. Pàvwà baamaamù bàà beena Ebèlù abu. . . Lekèlè nkuleejeku Dìyi dyà Nzambì, mulunda wanyi, bwà diitabuuja dyèbè dyàmòna mwà kwibakiibwa bushùwà mu Dìyi dyà Nzambì. Dìbà dyònsò, baamaamù bàà beena Ebèlù abu, pàvwabo pa cici, bàdinyenga bwà kulela, bwà kule. . . kulela bàna aba, mèyi miine àvwàye ùpatula mu dilela dyèndè ngàvwà àpèèsha muntu awu (mwànà wa mu dibòkò ùvwa mulela kùdi mukàjì awu) dìnà dyèndè, ne àmushikika bilondèshile myaba mu Pàlèstinà mwaba wikalàye ku dilwa dyà Mukalenge. Bisaamà byà pa kulela mu maamù ewu! Byenzè bu, *Efàlàyimà* mbwena kwamba ne “ku mwelelu wà mbù.” Nwamònu anyi? Nènku Efàlàyimà wàkapèèshiiibwa cyèndè citùpà cyà buloba ku mwelelu wà mbù. Nènku, kwamba ne, *Yudà* ùvwa ùmvwija. . . Ncyèna mumanyè cidì mwàkù awu wùmvwija to, kàdi ndi mufwànyine kuwùpeta. Mpindyewu, nwamònu's, ki mwaba ùndì nciyi ne dìbà, dyà tuntu twà tutùpà etu, bwà kwangulula tuntu atu to. Kàdi pashiishe kwalukila, ne *Yudà*, kwònsò kùdi Yudà ùmvwija aku, ki mwaba wèndè mumutèèka munkaci mwà bàna bàà Izàlèlèlè.

<sup>132</sup> Nènku angàtaayi ku Genèsè 48 ne 49, nenùsangane muntwamu ne Yakòbò, pàvwàye ùpunga ne lufù, mweyèmène pa mulangala wèndè, mushààla mpofò, wàkambila bàna abu bilondèshile myaba yìvwàbo bafwànyine kwikala ku nshiikidilu kwà buloba. Nènku mbatèèkiibwe ànumu bilondèshile myaba patùdi twakulangana apa kacya ànu bàalukila mu buloba bwàbò. Wàkambila Yòzefù ne: “Wèwè udi mwonjì wa mvinyò wa bimuma ku cimanu,” nwamònu's, “ku ciinà cyà màyi,” màyi. Kutungunukayè. Kwambayè ne: “Udi mweyèmène Mukalenge Nzambì. Udi muvwije ntafu webè—webè ne bukòlè” (Etats-Unis. Nwamònu anyi?) “mu Mukalenge, kàdi dīngà ditùkù mwonji wà mvinyò awu ùvwa wàlukila ku cimanu aku.” Nènku's ki yèyè awukù, ànu mwaba awu mene mpindyewu. Ànu menemene

cyàkambàye kukaadi bindimu byàmba kutwà ku binunu bisàtù, munkaci mwà kwalukila. Kwambila Efalàyimà ne yèyè ùvwa mujiike makàsà èndè mu maanyi, ne Efalàyimà wàkashikikiibwa ànu mu mwaba ùvwa biina binène byà maanyi bisanganyiibwa. Ànu menemene.

<sup>133</sup> Byàkamba bantu abu abi, cìvwà pa bantu bàà cìfwàkà abu ncinyi's? Nzambi wàngata tulanjilangi twàbò atu ne ùkwacila mudimu mu bôbò's!

<sup>134</sup> Bivwa bimwèke ànu bu ne pàvwà Bukalenge bwalàbàlè bwà beena Loomò bubàmwàngalaje, pàvwà bakwàbò bàbàmwàngalaje, pàakakinyiibwàbo kùdi Hitler apu, misangu binunu dikumi kuvudija ku binunu, wàkakòka lupeepèlè kubèèla mu mijilu ne kufwàbo, nuvwa mwà kumòna mibidi yàbò milembèlèle pa mpangu yàbò ne yà bàna bààbò bàà mu mabòkò ne bikwàbò byònsò, ne mifùbà...kàdi kwangata mifùbà yàbò ayi ne kwenza naayi manga à bufukà. Kubapatula ànu kuntwaku ne bàbàtwa lupeepèlè alu, bàbèèla mu màkaadikà. Pashiishe bàpàtuka, dìbà dìdìbo bàpàtuka adi, nànsha mene ku ntwadijilu aku, bàvwa bimba ne: "Maasiyà neàlwe ne twètù netùnwe cyàkàbìdi mashi à tumuma twà mvinyò." Pàakayàbo, bènda bàpùnga ne lufù, beena Yudà abu, bàpàtuka buludi kuntwaku, bamanyè ne mu ndambù mukèsè wa mìkùma mwoyi wàbò newikale mumane kuya. Nènku mu dipweka amu bàvwa mwà kuya, bènda bimba ne: "Netùmòne Maasiyà àbìdi àdi panshì aa." Kaa, ekèlekèle! Bènza bufukà ne mifùbà yàbò's.

<sup>135</sup> Bààbùngì bàà ku nwènù bàsàlaayi bàdì mwab'ewu nudi bamanyè ciine aci ne bacimòne. Ngàakiimana pa myaba yàkabòòshelabo ayi ne bikwàbò byònsò, kwòkò aku, kùdi Hitler ne bôbò abu. Kàdi bàndishàayi mèsù kùdi Stalin ne Russie ne bwònsò abu, mbenzè cintu cìmwècìmwè aci. Ncyà bushùwà. Kàdi beena Yudà abu, bwalu bwàbò bùvwa cinyi? Bààkenzejiibwa ku bukolè bwà kupingana mu buloba bwàbò. Ki mwómò amu mùdìbo bàsanganyiibwa.

<sup>136</sup> Mpindyewu, mvwa ne mukàbà wa bindidìmbì munène awu, *Tusunsa Tùsàtù Kumpàlà kwà Mundankulù*. Pàakabwelà beena Yudà abu, bàvwa bàbàkonka, bàmba ne: "Bwà cinyi bunùdì nwalukidila, bwà kukafwìla mu buloba bwènù anyi?"

<sup>137</sup> Yèyè ne: "Tudi balwe bwà kumòna Maasiyà." Amen. Hmm! Tukaadi ku cikondo cyà nshìikidilu.

<sup>138</sup> Yònsò wa ku bàna abu pààkalediibwàbo, bàvwa ne dibwe dyà dilediibwa. Nènku pàvwà Aalònà, mwakwidi munène kumutù kwà yònsò wa ku bàna abu awu, ùvwa ne cibwikilu cyà pa cyàdi, ku nkanzu wendè. Ki cìndì muswè kwanji kushààla mwindija ànu katanci kakesè, bwà kubwela mu mvensà mwi6 ewu, bwalu aci cìdi citwala cìmfwànyì cyònsò cyà Dipungila Dikùlùkulu too ne mwómò amu. Yònsò...nkwasà yònsò ne

byònsò byà mu Dipungila Dikùlùkulu abi bivwa citembelu cyà bivwà bimòna mu Dyulu, byenzela muntu.

<sup>139</sup> Nènku's ki cibwikilu cyà pa cyàdi cyà Aalònà eci, yèyè ùvwa mwakwidi munène. Mònaayi, dibwe dyà dileediibwa dyà cisàmbà ne cisàmbà cyònsò òvwa dileeejiibwemù. Ùmwè, dibwe dyà dileediibwa, mmutèèke dibwe dyèndèmu; cisàmbà cyà Efalàyimà, cisàmbà cyà Maanàsè, cisàmbà cyà Gaadà, cisàmbà cyà Benyàminà, byònsò abi bivwa bileeejiibwemu. Nènku mùshindù awu ki ùdi... Pashùshe bàdi bàngata mabwe à dileediibwa awu, mabwe malenga awu, baàkùdika ku dikunji mùshindù ewu. Nènku mupròfetà yèyè mwambe cipròfetà, ne nànsha cyùmvwika cimpè anyi cibi, bàvwa bàya nendè too ne ku Ulìmà-Tuumimà ewu ne bamulekela wàmba cipròfetà cyèndè aci; Bukènkè bunsantu bòbò bupàtukemu ne bubange kupenyèsha mabwe awu cyàpàmwè, cìvwa n'Nzambi uvwa wandamuna. Cìvwa mbwà cisàmbà cijimà, byònsò abi, cisàmbà ne cisàmbà cyònsò.

<sup>140</sup> Mpindyewu, pa wòwò aa, dibwe dyà kumpàla. Dyà kumpàla, mbanganyi bàdi bamanyè ne mwànà wa kumpàla ùvwa nganyi? Dìnà dyèndè òvwa nganyi? Luubènà. Èyo. Wa ndekeelu ùvwa nganyi? Benyàminà. Ncyà bushùwà. Dibwe dyà dileediibwa dyà Luubènà òvwa "yaspà," dibwe dyà dileediibwa dyà Benyàminà òvwa "sardwàne." Bìvwa bìkèngela kumwekayè bu "Luubènà ne Benyàminà," Wa Kumpàla ne wa Ndekeelu, Ewu Wàkadikù, Udikù Awu, ne Wàlwa Awu, Yèyè ùvwa Alpha (A) mu màleetà à cyena Ngelikà, Omega (Z) mu màleetà à cyena Ngelikà. Yèyè nguvwa wa Kumpàla, wa Ndekeelu, Yèyè ùvwaku kuumukila ku Benyàminà too ne ku Luubènà, kuumukila ku Luubènà too ne ku Benyàminà. Kaa, ekèlekèle! Ki Yèyè awu ne: "Ùmweka bu dibwe dyà sardwànè ne bu dibwe dyà yaspà." Ùvwa musòmbe pa Nkwasa wa butùmbi ewu!

<sup>141</sup> Mmunyi munùdiku nwénù bwònsò baswè kuMumòna musòmbe pa Butùmbi Bwèndè? Tubuululàayi mu Bwàkabuulwibwà 21:10, lukasalukasa, bwà tuMutàpèku ànu dîsù mwab'ewu. Èyo, 21:10 too ne ku 11.

*Nènku wàkaya naanyi kule mu nyumà ku mukùnà munène ne mutùmbùke, ne kundeeja cimenga cinène aci, Yèlusàlèmà wa cijila, upweka ùfùmìna mu dyulu kùdì Nzambi,*

*Mwikàle ne butùmbi bwà Nzambi:... Mwikàle ne butùmbi bwà Nzambi: ne makènkè èndè àvwa mafwànàngàne ne dibwe dyà mushinga mukolè mutàmbe, nànsha mùvwà... yaspà..., ànu ditòoke zeezeeze bu ntàlatalà;*

<sup>142</sup> "Bukènkè Bwèndè." Bukènkè! Bukènkè abu nganyi? "Ne Cimenga aci kacìvwa cikèngela dîbà to, bwalu Mwànà wa mùkòòkò ki Bukènkè bwàci."

143 Dibwe dyà “yaspà, sardwànè” adi. Butùmbi bwà Nzambi n’Yesù Kilistò, Butùmbi bwà Yesù Kilistò ng’Èkèleeziyà Wendè. Ne Yèyè nguvwa Wa Kumpàla. Yèyè ùvwa cinyi? Yèyè ùvwa Mbangilu wa cikondo, Yèyè ngudi Ndekeelu wa cikondo. Yèyè nguvwa wa Kumpàla wa bankambwa, Yèyè ki wa Ndekeelu wa bankambwa. Yèyè nguvwa Èkèleeziyà uvwa mu . . . Yèyè nguvwa Nyumà uvwa mu Èkèleeziyà wa Efèsò awu—awu, Yèyè ùdi Nyumà wa Èkèleeziyà mu Laòdikiyà. Yèyè ki wa Kumpàla ne wa Ndekeelu, A ne ku Z, wa Kumpàla, wa Ndekeelu, Ewu Wàkadiku ne Wálwa Awu, Muji ne Mùtòlokù wà Davìdi, Mùtootò wà mu Dindà, Mbata wa mu Cibanda, Rose wa Shalònà! Kaa, kùdi nkàmà yìnaayi ne byà mu njila yà myanzu mu Bible yidì yìMukumbanyina. Anji elàayibi ànu meeji ku bwalu abu, cìvwàYe’s! Kàdi nànsha nàнку Yèyè ùvwa Mukalenge Yesù mupwekele wàkalediibwa mu cidilù cyà nyama bwà butùmbi bwà Nzambi awu’s.

144 Cintu kanà cyònsò cìdi cidipwekèshe eci, cìtàngilaayi bímpè bwalu ncyà bushùwà. Cintu kàna cyònsò cìdi cinène eci’s ncyà madileeki, nàнку kanùkùtùmikù ntema to; nwamònu’s, s’ndipatangana ànu ne lupeepèlè nàka, kàdi kamwèna cyà nsongo to. Eyo.

145 Mpindyewu ne: “Ùvwa mufwànàngane ne dibwe dyà yaspà ne dyà sardwànè.” Twalukilàayibi. Nudi ne . . .? Tudikù ne dîbà ndambu, kî mmwômò anyi? Tucìdi ne tusunsa tutwè ku makùmi ànaayi. Tùmonàayibi, twàlukilàayibi ku Yèhezèkèlè 1. Alùkilaayi mu Bible ku Dipungila Dikùlukulu, ku Yèhezèkèlè, nènku túbalaàyi kaaba aka kàvwà Yèhezèkèlè muMumòne, yèyè pèndè. Nènku fwanyikijàayaaku Mifùndu eyi mpindyewu bwà numòne mwaba utùdi. Yèhezèkèlè nshapità 1, èyo, mpindyewu túbalaayibi bwà katancì kakesè. Mpindyewu nèmbalè mvensà yitaanu yà kumpàla ayi, ne pashiishe netùbale, ndi mufunde mwaba ewu, kuumukila ku 26 too ne ku 28. Kàdi tubalàayaaku mvensà yitaanu yà kumpàla ayi mpindyewu yà nshapità wa 1 wa Yèhezèkèlè, mupròfeta. Eyo:

Nènku byàkenzeka mu cidimu cyà makùmi àsàtù, ne mu ngondo mwinâyì, mu ditùkù diitaanu dyà ngondo, . . . Mwua munkaci mwà bapika—munkaci mwà bapika lwà ku musùlù wà Kebâ, . . . (Mmwômò anyi, Kebâ? K-e-b-â, Kebâ.) . . . nènku *maulu àkunzuluka, ki mème kumòna cikèènà-kumòna cyà Nzambi.*

Nènku mu . . . (Mpindyewu, tàngilàayi.) . . . *Mu ditùkù diitànù dyà ngondo, mbwena kwamba ne ngondo wakakwàciibwa mfùmù Yehoyàkimà ku bupika,*

*Dìyì dyà MUKALENGÈ dyàkalwa patòòke kùdi Yèhezèkelè mwakwidì, mwànà wa Buzi, mu buloba*

*bwà . . . Beena Kasàdà ku musulù wà Kebà; ne cyanza cyà MUKALENGE cívwa . . . pambidi pèndè.*

*Kì mèmè kutàngila, nènku, mònaayi, mvunde wàkapatukila ku nord, . . .*

146 Tàngilàayi mupròfetà ewu, bidimu nkàmà yìtaanu ne makùmi citèemà ne bitaanu kumpàlà kwà dilwa dyà Kilistò, nudi numòna mùdi cikèèná-kumòna cyèndè cikùmbanangana ne Yone:

*. . . mvunde wàkapatukila ku nord, divuba dinène, . . . kapyà kàdivungulula kòkò nkaayaku, ne dibàlakana adi divwa didinyungùluke, ne lwà munkaci mwàkù amu mùvwa diikala dyà màyi à matàmbà dyà ditàmbe kutwila, lwà munkaci mwà kapyà.*

*Kàbidi lwà munkaci mwàkù amu kulwamù cimfwànyì cyà bifùkùbwa bìnaayi bìdi ne mwoyi. Nènku kì mmwènekelu wabò nyéyè ewu; bàvwa ne cimfwànyì cyà . . . muntu.*

147 Mònaayi, diikala dyà Nyumà wa Nzambì divwà kumutù kwà cimfwànyì cyà Bifùkùbwa bìnaayi ebi aci, divwa dyà màyi à matàmbà dyà ditàmbe kutwila. Diikala dyà màyi à matàmbà dyà ditàmbe kutwila's nkàlaabi-bu-màyi à matàmbà. Mpindyewu, tàngilàayi: "diikala dyà kàlaabi-bu-màyi à matàmbà," *diikala dyà màyi à matàmbà dyà ditàmbe kutwila*, kaa, Yéyè ùdi umwèumwè awu makèèlèlè . . . WàkaDibuulula kùdi Yèhezèkèlè; munkaci mwà cikèèná-kumòna cyà Yèhezèkèlè, Bukènkè bwàkamònaye bùlwa kumutù kwà Bifùkùbwa bìnaayi bìdi ne mwoyi ebi bùvwa bwà diikala dyà kàlaabi-bu-màyi à matàmbà. PààkalwaYe kùdi Yone, Wàkamwenekela mu *diikala dyà màyi à matàmbà* didi kàbidi "kàlaabi-bu-màyi à matàmbà." Ùdi ùlwa mpindyewu kùdi mubuuludi mu diikala dyà kàlaabi-bu-màyi à matàmbà. Yéyè ùdi ùlwa kutùdi mu diikala dyà kàlaabi-bu-màyi à matàmbà, Bukènkè! Endelaayi mu Bukènkè, Yéyè ùdi Bukènkè.

148 Tùyaayi ku mvensà wa 26 mpindyewu, bwà twamòna mwà kubala too ne ku wa 28. Mvensà wa 26:

*Nènku pamutù pàà maul- . . .*

Kaa, panwàlukila kumbèlu, ndi muswè bwà nùfundè cyòci aci ne nùbalè kantu ne kantu kàaci. Bwà kulaminyinaku díbà:

*Nènku pamutù pàà maulu àvwa lwà kumutù kwà mitù yàbì kùvwa cimfwànyì cyà dibwe, diikale ne mmwènekelu wa dibwe dyà sardwànè: ne pa cimfwànyì cyà nkwasà wa butùmbi pàvwa cimfwànyì cyà mmwènekelu wa muntu kumutù kwà . . . yéyè awu.*

149 Awu ùvwa m'Mwànà wa muntu, nwamònu's, Kilistò. Mpindyewu tàngilàayi numòne mùvwàYe, mùvwaYe muvwàle kaaba aka:



*Ki mêmè kumòna bu meekala à mâyi à matàmbà à matàmbe kutwìla, (tàngilàayi, mu nyungulukilu wa Mwànà wa muntu ewu) bu mmwènekeli wa kapyà kanyungulukile munda mwàku amu—kanyungulukile munda mwàku amu, kubangila ànu lwà mu mmwènekeli wa cifukà cyèndè. . .*

150 Tèèlejàayi! Ikàlaayi bàà nyumà, umvwâyi bîmpè, ne mu myoyi yènù nwènù biine mwab'ewu. Ndi nnulòmba mu Dîna dyà Yesù, lamàayi eci bwènù nwènù nkaayenù! Kàdi nwavùlukaayi ànu mùdici cyùle tètè ne mabènesha's wè!

151 “Ndi mb- . . .” Tùbangaayi cyàkàbìdi mu mvensà wa 27. Tèèlejàayi, muntu ne muntu! Umvwâyi bîmpè menemene mpindyewu!

*Ki mème kumòna diikala dyà mâyi à matàmbà dyà ditàmbe kutwìla (aci's ki kàlaabi-bu-mâyi à matàmbà aku), kenze bu kapyà eku ne eku. . . kakànyùngùlukile, . . .*

Kapyà kanyùngulukile kàà mâyi à matàmbà à lubìshibishi aku. Mpindyewu:

*. . . kuumukila ànu mu mmwènekeli wa cifukà cyèndè kubanda, (Kuumukila mu cifukà cyèndè kubanda.) ne kuumukila mu mmwènekeli wa cifukà cyèndè. . . kupweka, mêmè kumòna byenze bu mmwènekeli wa kapyà, ne bùwva bùbàlakanà eku ne eku. (Kapyà eku ne eku.)*

*Bu mmwènekeli wa ntafu ne mu diikala dyà mu matàkù à mvùla, ki mùwva mmwènekeli wa dibàlakanà òwva dimunyùnguluke eku ne eku adi. Eci cìwva mmwènekeli ne cimfwànyì ne butùmbi bwà MUKALENGE. Nènku pangààkacimòna, mêmè kutwà mpàla panshi, ne mêmè kuumwva òyì dyà muntu dyàkula.*

152 Tàngilàayi! Nudi pabwîpì anyi? Tèèlejàayi! Lamàayi eci mpindyewu, vùlukàayi ànu ne, mbwà kunùfikisha ku dimanya. (Gene, udi mwà kwimanyika mukàbà wà mèyi ewu.) Tèèlejàayi! (To, kabyèna bikèngela bwà mêmè kuwimanyikila apu to, kakwena bwalu to. Ndi muswè kwamba ne kulama ànu mukàbà wà mèyi; kuwànyishila ànu Èkèleeziyà ewu.) Mònaayi eci! Mpindyewu, bwà nwamòna mwà kumanya ne diikala dyà Bukènkè didi kùdì Mukalenge, ne Bukènkè bwà Mukalenge bùdì bùlondà Mukalenge, ne bùdì ànu mùdì Mukalenge, mbwà diikala dyà mâyi à matàmbà dyà ditàmbe kutwìla, dyà kàlaabi-bu-mâyi à matàmbà. S'ki diikala òimwèðimwè dyà Bukènkè bùdì neetù leelù ewu abu, ànu mùdì beena maalù à mamanya baBùkwate fòtò, bwà kàlaabi-bu-mâyi à matàmbà, bwà mâyi à matàmbà à matàmbe kutwìla abu.

153 Pàncìvwa mwànà mukesè, ne mêmè kuBùmòna bwà musangu wànyì wà kumpàla, nudi bavùluke, beena kale bàdi

mwaba ewu abu's. Mvwa misangu yônsò ànu nnwambila bangabanga ne kukwàtabò fôtô wetù mwena diinà ewu ne: "Bùvwa bwà kàlaabi-bu-mâyì à matàmbà, ciine aci's ki màyi à matàmbà à matàmbe kutwìla." Mpindyewu, bwà kunumanyisha ne Nyumà wa Mukalenge. . .

<sup>154</sup> Wàkamba, pààkacimònàye mu cifùkà cyà Cifùkiibwà cidi ne mwoyi cyàkadì ciimane mu bwikadi bwèndè ne: "Kuumukila mu cifùkà cyèndè kubànda cìvwa bu kapyà, Bukênkè kuumukila mu cifùkà cyèndè kupweka, cìvwa cibwikidija ne Bukênkè. Ne mu nyùngulukilu mwônsò amu mùvwa meekala àbùngì mafwànàngàne ne mwanzankòngòlò." Ncyà bushùwà anyi?

<sup>155</sup> Ndi muswe bwà nuvùluke ne, Nzambi ùcidi ànuku mu meekala àmwèàmwè awu: "kuumukila mu cifùkà kubànda, kapyà, diikala dyà màyi à matàmbà dyà ditàmbe kutwìla," difwatulula kùdi cyamu cyà fôtô cyà bindidimbi binyunga anyi ne cyamu cyà fôtô cyà meekala, "diikala dyà màyi à matàmbà dyà ditàmbe kutwìla kuumukila mu cifùkà kubànda, kuumukila mu cifùkà kupweka, ne mu nseke yônsò, meekala àbùngì bu mùdi àdi mu mwanzankòngòlò mu dyulu paanyimà pàà mvùla." Yesù Kilistò umwèumwè awu makèèlèlè, leelù, too ne kashidi! Nyumà Mwîmpè ùcidi ànu mu bukole Bwèndè, ùcidi ànu mu Èkèleeziyà Wèndè mu matùkù à ndekeelu aa. Ki bwalu mbwòbù abu's. Kì mmémè to, mvwa ànu mwimane mwaba awu, kàdi cìvwa mfôtô uvwa mukwàcìibwe. Ndi muswè bwà nùtangilè cyôci aci, ànu menemene cyàkamònà Yèhezèkèlè aci's. Meekala àmwèàmwè awu, mùshindù ùmwèumwè awu, ne dyenza maalu mùshindù ùmwèumwè awu, ne dyela nsesè mùshindù ùmwèumwè awu, wà bwena wà Bifùkiibwà bìdi ne mwoyi abi's. Ncinyi aci? Bifùkiibwà bìdi ne mwoyi bìdi bìleeja Èkèleeziyà udi ne mwoyi, Èkèleeziyà udi ne mwoyi ku bukole ne dibìikà dyà ku lufù dyà Kilistò awu. Meekala àmwèàmwè à màyi à matàmbà matàmbe kutwìla awu mmacìbwikidije kuumukila ànu mu cifùkà kubànda, kuumukila mu cifùkà kupweka.

<sup>156</sup> Kakùcyèna kàbìdì byà dicinka to, maalu à mamanya mmakwàte maafôtô! Tàngilàayi meekala ààbì awu, tàngilàayi ànu meekala à kapyà munda amu. Nwamònu anyi? Mwanzankòngòlò ànu pa wòwù. Tàngilàayi diikala dyà kàlaabi kàà màyi à matàmbà edi. Mpindyewu, ku *eci* cyamu cyà fôtô, cìvwa ànu ncyamu cyètù cyà mukwaci wa fôtô cyà buludi eci. Ku *eci* cyamu cyà fôtô cìvwa cyà meekala, fôtô yà meekala's, yà meekala à Kodachrome. Tàngilàayi meekala à màyi à matàmbà àdimu awu's. Ngìkalapù mwà kucìfikisha ku bukênkè mwaba kampànda unùdi mwà kucimònà lwà mu ndekeelu mwàmwa's. Nudi mwà kumòna mpindyewu anyi? "Byenze bu mwanzankòngòlò," tàngilàayi mishoonyi yìdì yìtwa paanyimà ne kumpàla bu mwanzankòngòlò ayi, mushoonyi ne mushoonyi wònsò ne diikala dishiilàngàne. Netùbwele mu cyôci aci mu tusunsa tukesè emu, mmeekala awu ncinyi ne àdi àleeja cinyi?

157 Kaa! Aci's cidi ànu citùpisha mwoyi wànyì ùdì mukwàte bikole ne byà luse ewu ne disànkà. Ne pa kumanya ne mu ditùkù ditùdì ne mwoyi edi, dìdì Kilistò...pàdì myaba mikwàbò yònsò eyi luntekà, mwaba mukwàbò wònsò. Ngeela meeji ne: “Bwà cinyi ncyena mwa kucìlondehangana? Bwà cinyi ncyena mwa kufikisha bàà pa buloba ku diCimòna's?” Bàà pa buloba kabàvwa balongolwela kuCimòna to. Bàà pa buloba kabààkuCimòna to, bòbò kabààkuCimònakù to! Kàdi Èkèleeziyà ùdì munkaci mwa kupeta dinyùkushiibwa dyà ditàmbe bukole dikaadiYeku mupeta kacya!

158 Mu miine matùkù awu kabàvwa mwà kuCikwàta fòtò to. Mpindyewu bàdì mwà kukwàta bwalu bàdì ne byamu byà mishindù's. Aba bàdì bateeta bwà kwangata byamu bwà kuvila Nzambì abu, ki bàdì baalukila bwà kujaadika ne Nzambì ùdikù. Ncyà bushùwà ne: “Diikala dyà màyi à matàmbà.” Mpindyewu, vùlukàayi ne, kí mmèmè ùtu mucikwàtàkaje to, ndi nnubadilaci ànu buludi mu Bible. Tàbàlelàayi pàndì mbala, ne nutàngile, ne numòne ne Cidi m'Mukalenge Nzambì umwèumwè awu, kawkwèna dishiilangana to. Tàngilàayi mvensà wa 27:

*Nènku ngàakamòna . . . diikala dyà màyi à matàmbà  
ditàmbe kutwila, bu mu mmwènekèlu wa kapyà . . .*

159 Nwamònu's, cyenze bu ndimì yà kapyà yilàkuka. Nwamònu anyi? Meekala à màyi à matàmbà à matàmbe kutwila àfùmina mu kapyà. Nudi nucimòna mpindyewu anyi? Diikala dyà màyi à matàmbà dyà ditàmbe kutwila, s'ki meekala à màyi à matàmbà à matàmbe kutwila aa àfùmina mu kapyà. Lwà kwinshì eku mbàmba ne:

*Ne mmwènekèlu bu wa ntafu, anyi mwanzankòngòlò,  
mu matùkù à paanyimà pàà mvùla, . . .  
mwanzankòngòlò, mu matùkù à paanyimà pàà  
mvùla, . . .*

160 Nènku kùvwa—kùvwa “Cifùkìbwà cidi ne mwoyi.” Cìvwa Yone muleeje mpàla aci, Èkèleeziyà mujimà, mwangàciibwe muulu. Mvwa munwàmbile. Muntu umwèpelè kaaba aka mu cikèènà-kumòna ùdì mwà kuleeja Mubidi mujimà wà Kilistò, mubwikila! Mpindyewu, tàngilàayi:

*Nènku ngàakamòna . . . diikala dyà màyi à matàmbà  
dyà ditàmbe kutwila, bu mmwènekèlu wa kapyà . . .  
dimunyungùlùkile, ne mmwènekèlu . . . kuumukila ku  
mmwènekèlu wà cifùkà cyèndè kubànda kuulu, ne  
kuumukila ku mmwènekèlu wa cifùkà cyèndè kupweka  
kwinshì, mèmè kumòna byenze bu mmwènekèlu wa  
kapyà, . . .*

161 Tàngilàayi, tàngilàayi mùdì kapyà kàtàngalaka. Kapàtukila mu cinyi? Mwanzankòngòlò, meekala mwandamutekète awu. Mpindyewu, tàngilàayi, kùdì ànu meekala mwandamutekète

*mwômò amu menemene, ne mwanzankôngòlò ùdi ne meekala mwandamutekète.*

*. . .mémè kumòna byenze bu ne civwa mmwènekeli wa kapyà, ne kàvwa ne dibalakana dikànyungulukile eku ne eku.*

*Bu mùdì mmwènekeli wa ntafu kampànda udi mu mavuba mu ditùkù dyà mvùla, kì mùvwa mmwènekeli wa dibàlakana lwà mu nyùngulukilu amu. (Bunyùngulukile Nkwasa wa butùmbi wa Nzambi, nwamònu's.) Eci civwa mmwènekeli wa difwànangana dyà butùmbi bwà MUKALENGE.*

<sup>162</sup> Kì mMukalenge to, mpindyewu, *butùmbi bwà* Mukalenge. Butùmbi bwà Mukalenge bubwikidije Èkèleeziyà Wendè bwalu Yèyè ùdi mu Èkèleeziyà Wendè! Amen! Kaa, cidi cimweka cikùtākàne bwà cibùlangènyi, kàdi mùshindù ùdìCi cinène bwà aba bàdi biitabuuja. Uh-huh.

*. . .Eci civwa mmwènekeli ne difwànangana dyà butùmbi bwà MUKALENGE. Nènku pangàakacimòna, mémè kupòna mutwè mpàla panshì, kì mémè kuumvwa dîyi dyakula . . .*

<sup>163</sup> Mpindyewu ùdi ùtùngunuka ne wamba civwà cikèènà-kumòna aci cyùmvwija, bu mutùdì katùyì ne dībà dyà kubwelamù mu dindà emu to.

<sup>164</sup> Mpindyewu, mònaayi mùdì Mukalenge mu luse Lwèndè lunène ùtùpèèsha bintu ebi.

<sup>165</sup> Mpindyewu twàngatàayi mukwàbò. Yèhezèkèlè ne Yone bùbìdì bwàbò bààkaMumòna mu bwalu-busokoka bwà meekala Èndè ne Bukènkè, ne kuBùbìkilabo ne “ndiikala dyà màyi à matàmbà dyà ditàmbe kutwila.” Yone paanyimà . . .Nwènu bàdi bafùnda . . .nudi nufùnda Mifùndu's, Yone wa Kumpàla 1:5 too ne ku 7. Yone, pashìishe (ne yèyè ùvwa mu cisanga cyà Paatèmò bidimu bitwè ku bisàtù pàakafùndaye Mukàndà apu), pààkaalukilàyè, muntu mukùlakàji wa bidimu biipacila ku makumi citèemà, mu Yone wa Kumpàla 1:5 ne 7, mmwambè ne: “Nzambi ùdi Bukènkè.” Yone wàkenza dilabula, wàkaMumòna ne wàkamanya ne Yèyè ùvwa Bukènkè, Bukènkè, Bukènkè bwà Cyendèlèlè; kì mbukènkè bwà mu cibwàshìbwàshì to, kì mbukènkè bwà mwèndù to, bukènkè bwà nzembu, anyì bukènkè bwà dībà to, kàdi Bukènkè bwà Cyendèlèlè! Kaa, mùshindù mwinè wùndì muMunangè's wè. “Nzambi ùdi Bukènkè.”

<sup>166</sup> Mònaayi, netùtwàdijilule mpindyewu bwà kumòna mwaba utùkaadi. Tucìdi mu mvensa mwi3, kì mmwômò anyi? NetùMupetè anyi? Ndi ntèkemena. Èyo:

*. . .yèyè . . .ùvwa ne mmwènekeli bu dibwe dyà yaspà ne dyà sardwanè: ne kùvwa mwanzankôngòlò . . . munyungulukile nkwasa wa butùmbi awu,*

*mufwànàngane ne diikala dyà mâyi à matàmbà.*  
(Dyà kàlaabi-bu-mâyi à matàmbà.)

167 Mpindyewu, “mwanzankòngòlò,” nudi numòna ne cìvwa m’mwanzankòngòlò. Twàlukilàayi bi mu Genèsè 9 bwà tujandule, mu Genèsè 9:13. Nènku netùsangane kaaba aka “mwanzankòngòlò,” pààkamwènekà mwanzankòngòlò bwà nzanzanza. Genèsè nshapità wa 9, nènku netùbangile ku mvensa wa 13, Genèsè 9:13. Nwènù bwònsò nudi baswè Cyòcì eci anyi? Kaa, ndi muCìnange! Ncyèna ànu muCiswe to, ndi muCìnange! Tàngilàayi:

*Nènteeki bulelèlè ntafu wanyi mu mavuba, ne neikale bu cimanyinu (Tàngilàayi’s!), cimanyinu cyà cipungidi pankaci pàanyi mémè ne buloba.*

168 Cinyi? “Pankaci Pàanyi ne Noà anyi”? To. “Pankaci Pàanyi ne buloba.”

*Nènku nebyènzekè, pangààtwàla divuba pamutù pàa buloba, ne ntafu awu neàmweneshiibwe mu mavuba:*

*Nènku nèm̀vùlukè cipungidi cyanyi, cidi—cidi pankaci pàanyi neenù . . .*

169 Mpindyewu Yèyè ùdi wàlukila ku cipungidi Cyèndè pankaci pàabò, kàdi cipungidi cyà mwanzankòngòlò . . . Nwamònu’s, cipungidi cìvwa mmwoyi bwà Noà, bwà ne Yèyè wàkamupàndula, kàdi cipungidi cyàkenzà Nzambì ne Yèyè mwine cìvwa mwanzankòngòlò, bwà ne Yèyè kàvwa mwà . . . Mpindyewu, nènùleejè cìvwa cipungidi cyà Noà ne Nzambì, mu katanci kakesè emu. Kàdi eci kì cipungidi cyà Nzambì Yèyè mwine ncyòcì eci ne Yèyè mwine, amen, mwanzankòngòlò.

170 Mpindyewu, tudi tujandula dìbà adi ne *cipungidi* cidi “cimanyinu,” cimanyinu. Nzambì mmwambe ne cìvwa “cimanyinu” mwab’ewu, kì mmwòmò anyi? Nwamònu anyi?

*Mémè . . . kutèèka wanyi . . . ndi mutèèke bulelèlè ntafu wanyi mu mavuba, (Aci’s mpaanyimà pàa dibutudiibwa dyà buloba, bunyangakaja kùdi mâyi; mubidi wònsò, pa kuumusha Noà—Noà, wàkabutudiibwa.) nènku necìikalè bu cimanyinu cyà cipungidi pankaci pàanyi mémè ne buloba.*

171 Kì nne “Mémè ne bàà pa buloba to”. *Bàà pa buloba* cidi “kosmos.” Nwamònu anyi? Kàdi eci cidi “pankaci Pàanyi ne buloba.” Nzambì wàkamba ne: “Mémè ngwakenza buloba abu. Nènku ndi mutambe kubuyoobesha bibyàbìbì, mu mùshindù wa ne ndi mubukudimune munda ne paanyimà ne kubùtaayisha tupesetupese. Nènku—nènku kabìvwa bìkèngela bwà mémè—mémè—mémè—mémè kwikala mucyènzè to, pàmwàpa.” Yèyè ne: “Ngààlu—ngààlu kuumvwa mene ne luse, cìvwa cintu cibi be.”

172 Nudi nwela meeji ne neciikalè cinyi pàalwaYe mu cijji Cyèndè mpindyewu? Ditèèke mu bulongame, mulunda wanyi ngènzàmpèkààtù.

Kaa, ikàlà utàngila ne mwindile lùmònù  
luwíkala mwà kumòna alu;  
Yèyè ùlwalwa cyàkàbìdì.

Nudi nwitabuuja aci anyi?

Yèyè ùlwalwa cyàkàbìdì.

Ndi munange aci, kàdi nwènu?

Kaa, udi muswà kubadiibwa bu umwe wa ku  
balwishi Bèndè anyi?

Ncyèna mufwànyine kwitaba bwà kwikala aci to. Udi mufwànyine kucyènza anyi? To, mukalenge. Kwikala mulwishi wa ulwis- . . . anyi, kwikala mulwishi Wendè, kwikala Nendè ki kùdi kufwànyine kwikala kwîmpè. Kàdi kulwishangana Nendè!

Kwikadi ne katòba munda to, ikàlà mutàngile  
ne mwindile lùmònù luwíkala ne cyà kumòna  
alu,  
Ùlwalwa cyàkàbìdì. (Hmm!)

173 Mpindyewu, cipungidi, cimanyinu cyà cinyi? Cimanyinu cyà cinyi? Cyà mulàmbù ùdì mwitàbiibwè. Mpindyewu angàtaku Genèsè 8:20 ne 22. Mpindyewu, Genèsè 8:20 ne 22, èyo, ànu luseke lukwàbò menemene lwà dibeji alu ke kùdiye.

*Nènku Noà wàkaasa cyoshelu bwà MUKALENGE; ne wàkangata . . . nyama yònsò mukezùke, ne . . . nyuunyì yònsò mukezùke, ne kulàmbula mìlàmbù yà dyòsha pa cyoshelu apu.*

*Nènku MUKALENGE kuumvwaye mupùùyà wà dipembu dîmpè; ne MUKALENGE kwambaYè mu mwoyi wèndè ne: Ncyàkwela kàbìdì buloba mulawu nànsha (kwela buloba mulawu) nànsha kakesè bwà bwalu bwà muntu; bwalu didifwanyikijila dyà mu mwoyi wèndè ndibì kacya ànu ku bwànà bwèndè; anyi ncyàkushipaku kàbìdì cintu cyònsò cidì ne mwoyi, bu mùndì mwenze emu to.*

174 Nènku mpindyewu tudi mwà kubala mvensà wa ndekeelu:

*Nènku . . . Pàcidì buloba buciikaleku, cikondo dyà dimiinu ne dinowa, . . . mashika ne luuya, . . . muvù wà luuya ne wà mashika, . . . muunya ne bufùkù kabyàkujikaku to. (Cipungidi.)*

175 Cintu cimwècimwè cyàkamònà Yone aci: Yesù, cipungidi ciitàbiibwe cyà Nzambi cinyùngulukile mu mauu. Ne mu nyùngulukilu Wendè amu mwikàle mwanzankòngòlò lwà ku Nkwasa wa butùmbi aku, ùmweka bu mùdi Bukènkè bwà diikala dyà màyi à matàmbà, lubishibishi lwà màyi à matàmbà mu

nyungulukilu wa Nkwasa wa butũmbi. Butũmbi kùdì Nzambi's wè!

176 Tàngilàayi's! Wà Noà mmwenza nangananga... mwanzankòngòlò wà Noa mmwenza nangananga ne meekala mwandamutekète. Muntu kàna yònsò ewu's mmumanyè ne mwanzankòngòlò ùdì ne meekala mwandamutekète. Mpindyewu, meekala aa ki èpì's? Dikünze, dyà maanyimaanyi, dyà bleu mukünzùbile, to, dikünze—dikünze, dyà maanyimaanyi... dyà mâyi à matàmbà, dyà bleu, dyà bleu wa mufiike fitùtuu, ne dyà bleu wa mukünzùbile. Awu's ki meekala à mwanzankòngòlò's. Mpindyewu, tudì ne cintu cyà ndòndò kaaba aka, nènku ne bikèngelè ànu bwà mfike ku dilenga myaba yààci minène bwalu dîbà dîkaadi dyènda dipita bikolè. Mpindyewu, nwavùlukaayi ne, dyà maanyimaanyi, anyi, dikünze, dyà maanyimaanyi, dyà kàlaabi, dyà mâyi à matàmbà, dyà bleu, dyà bleu wa mufiike fitùtuu, ne dyà bleu wa mukünzùbile.

177 Mpindyewu, bu nwênù mwà kumòna, mwandamutekète. Tàngilàayi. Myanzankòngòlò mwandamutekète... meekala mwandamutekète, ndi muswè kwamba ne, mwanzankòngòlò wà meekala mwandamutekète. Mbwena kwamba ne ntafu mwandamutekète's! Ntafu mwandamutekète, èkèleeziyà mwandamutekète yileeja makènke mwandamutekète, bukènke ne bukènke bwònsò buvungila mu bukwàbò. Wàkabanga ne dikünze, dikünze. Paanyimà pàà dikünze kulwaku dyà maanyimaanyi, didì dileejiibwa dyà dikünze adi. Paanyimà pàà dyà maanyimaanyi kùvwa... paanyimà—paanyimà pàà dyà maanyimaanyi kulwaku dyà kàlaabi, didì diikale dikünze ne dyà maanyimaanyi masambakaja pàmwè, ki bidì byenza dyà kàlaabi. Pashiishe dyà mâyi à matàmbà. Dyà mâyi à matàmbà ne dyà bleu bidì byenza difiike. Pashiishe kùlwa dyà bleu mufiike fitùtuu. Nènku pashiishe ku dyà bleu wa mufiike fitùtuu aku kulwalwa dyà bleu wa mukünzùbile, udi mwikale citùpà cyà bleu. Àlèluuyàh! Kanwènaayikù numòna anyi? Nzambi, mu mwanzankòngòlò Wèndè wà meekala mwandamutekète awu, cipungidi Cyèndè cyàkènzàYe aci, cipungidi cyà ne ku Bikondo Mwandamutekète byà Èkèleeziyà, meekala mwandamutekète awu, Yèyè ùvwa mwà kusùngila buloba.

178 CivwaYe mufwànyine kwenza ncinyi? Vùlukàayi ne, Yèyè mmucyènzè ne buloba, diikala Dyèndè adi. Kàdì tàngilàayi mpindyewu. Ànu mwanzankòngòlò ewu, mu bucyàmà bwàwu, ùdì ànu (mu mmwènekèlu wa ntafu) ubwikidija citùpà cimwè cyà buloba. Ki cyònsò civwà mwanzankòngòlò wà meekala wà Noà awu mubwikila... ànu, ànu cyàbibidì cimwè cyà buloba. Ùvwa mu mmwènekèlu wa ntafu, ki cyònsò cinùdì mwà kumòna aci's. Kàdì pààkaMumòna Yone mu diikala Dyèndè dyà mâyi à matàmbà adi, Ùvwa munyungulukile Nkwasa wa butũmbi mujimà wa Nzambi awu. Cyàbibidì

cikwàbò kacitu cyanji kwambiibwaku to. Wàkabwikidija... Ùvwà ànu... buloba mbwenze ànu ntafu, ùdi ànu cyàbibidi cìmwè cyàbò; s'ki bikondo byà èkèleeziyà abi's.

<sup>179</sup> Kàdi pààkaMumòna Yone mu diikala dyà mâyi à matàmbà matàmbe kutwila, diikala dyà mâyi à matàmbà matàmbe kutwila, kunyungulukilaYe ne kubwikidija bu kafulu kàà bukènkè. Kafulu kàà bukènkè! Kafulu kàà diikala dyà mâyi à matàmbà à matambè kutwila, Bùvwa bunyungulukile buumùntù Bwèndè! Nwamònu anyi? Diikala òmwèpelè, Nzambi umwepelè kumutù kwà byònsò, ne kùdi bwònsò, ne mu bwònsò, kàdi kùdi Bikondo Mwandamutekète byà Èkèleeziyà.

<sup>180</sup> Tàngilàayi dibwe dinène dyà mbonga. Bàvwa ne ciibidilu cyà ku apeta... nudi mwà kuàpeta mu Àfrikè malekelela mu mìsèèsù. Kùdìdìngi kùlami nànsha òmwèpelè to, bwalu kí ndisonga to. Wèwè ne didi kadiyi disonga to, nebàkwelèlèdi mu bùlokò ànu buludi, ne bàkukosela bùlokò bwà matùkù èbè wònsò à mwoyi bwalu udi mudilame. Wèwè mudipete, ùkadifile ànu paùdi udipeta apu.

<sup>181</sup> Mpindyewu, bàdi bàngata mbongò ewu...Kaa, s'ncintu cicolè's. Ngàakamòna cyamu cisongi cinène cyà tonne makumi ànaayi ciimanyika mùshindù *ewu*, bàvwa bapongolwelamu mabwe à bleu awu, ciàsonga wònsò, civingutula nsàkàlàbwà ayi yishààla ànu butù, kàdi kacivwaku mwà kuvinga mbongò to. Cisongi cyà tonne makumi ànaayi aci cilembèlèle pa ndungilu kampànda, lwà kuulu *eku*, cinyunguluka cikudimuka eku ne eku ciikale ne nkàtà minène yà manungumanungu mùshindù awu, yìvwà ànu yizaaza nsàkàlàbwà ayi tupesetupese; kàdi mbongò yèyè ùvwa ùpicilamù, unyungisha mene ne cyamu cyà tonne makumi ànaayi aci. Kaa! Pàvwàci cizaaza ne cipwekela mu kasengelu, cisenga citùma mu tusengelu tukwàbò, cisampulula nènku ndekeelu wa byònsò ciya cyambula kùdi mulongo wà makaadikà.

<sup>182</sup> Mulombodi wa Mines minène yà Mbongò yà mu Kimberley awu ùvwa umwe wa ku baawisiyè bàanyi kuntwaku mu mulongo, mwanèètù wa balùme wa mupwekèle menemene, wa bupolè.

<sup>183</sup> Nènku pashiishe lwà kuulu kwà mâyi aku bu mu bule bwà mètre umwe, mwaba uvwawu afùkukila awu, kùdi, Cosmoline ngudibo batèeke muntwamu. (Nudi bamanye's, nutu nubikila cintakanyi aci ne ncinyi—ncinyi apa's? Kùdi... Meda, citùdi naaci mu nzàbà mu kazùbu kàà mudimu aci ncinyi? Vaseline!) Nènku tudi twela Vaseline awu, wìpacila mu bule bwà cyàlà cijima, ùbanda too ne pa mibàngùbangu apa. Nènku ùdi ùpweka, kàdi mònaayi, dìbà dyònsò didi nsàkàlàbwà ayi yìbanda, yìdi yìbungulukila mu Vaseline awu amu; kàdi pàdi mbongò ùpicilapu, ùdi ulamata. Mbongò yèyè mmùme ne ùdi ulamata ku aci. Mèmè kubàmòna bàyàngula, too ne yà mikesè menemene ayi,



ne bàyítapulula ne mànetà à mèsù. Ki mèmè kubàkonka cìvwàbò bacyenzela's, kwambabò ne bàdi bayisumbisha ku Àmèrikè bwà kwenzabo tushìngi twà kwimbisha naatu diskè twà Victrola ne bikwàbò; katwèna tùpeluka to, nwamònu's.

<sup>184</sup> Kàdi mabwe manène à mbongò awu, mpindyewu, ki wówò awu, ànu bunène bwà ndundu umwepelè munène. Kàdi pàdi . . . Bàdi baàngata ne bàngata màshinyi à nzembu bwà kuàsonga, ne benza mbongò wa musonga. Pashiishe pàdibo bamusonga, mbwà kuleeja meekala à kapyà à bujitu bwèndè, nènku yéyè neàleeje meekala mwandamutekète, kàbidi's.

Kaa, mùshindù mwine ùvwa Yesù . . .

<sup>185</sup> Kaa, udi mufwànyine kwikala ne mfranga yàbùngì, udi mufwànyine kwikala ne milongolongo yà màshinyi à Cadillac, udi mufwànyine kwikala mpaasàtà wa nzùbu munène kampànda wa dilamina bitàlù anyi kàtèdralè kàà mùshindù kampànda, udi mufwànyine kwikala mwèpiskòpò anyi mwèpiskòpò mutàmbidile, kàdi, kaa, mwanètù, paùdi upeta Cilengà aci, Mbongò awu, muntu ùdi ùsùmbisha bubanji bwèndè bwònsò bùdiye naabù abu, ùbùshya, ne bikwàbò byònsò.

<sup>186</sup> Tàngilàayi virgo mukùtakàne awu. Kaa, cyàkenzaye ncinyi? Byàkakèngela bwà kusùmbishaye cintu kampànda bwà kusùmbaye Maanyi. Byàkakèngela bwà yéyè kusùmbisha cinyi? Twitabàayi yèndè yà kale ne màngumba ne bikwàbò abi. Yéyè wàkasùmbisha byònsò bìvwàye naabi bwà kupetaye Kilistò, Kilistò, Cilengà cinène aci. Yesù, mubidi awu. . . [Katùpà kàà mukàbà wa mèyi munda mutupù—Muf.] . . .? . . . Ndi ne ticket wa kuya mu Dyulu pààlwà kàwulù, dimwè dyà ku maadindà à mîdimà aa. Kaa, dibènesha kaayi's wè!

Kaa, nkwaka awu ngwa mushinga mukolè  
Udi umvwijà mutòòke bu nêjè;  
Ncyèna mumanyè mukwàbò mpokolo to,  
Ànu Mashi à Yesù.

<sup>187</sup> Kakwèna luumù, kakwèna bintu binène, cintu nànsha cìmwè, kakwèna mabanji, cintu—cintu nànsha cìmwè, mpèshaayi mèmè ànu Nkwaka wa mushinga mukolè awu. Bwalu's mbutuuke!

Ncyèna mulwe ne cintu nànsha cìmwè mu  
mabòkò àànyì to,  
Ndi ànu nkùlama ku Nkùrusè Webè.

<sup>188</sup> Cilengà cinène aci! Cìvwa ncinyi? Cìvwa cipwàngàne. Ùkaavwa ne bidimu makumi àsàtù ne bisàtù ne citùpà pààkaMupicishilà Nzambi mu cìshinyi cinène cyà ditondoka aci, pààkayàYe naaDì kuntwaku ne kubanga kuDisonga. WàkaDìkosa, WàkaDìboza, WàkaDìzaaza.

*. . . wàkatàpiibwa mpùtà bwà dishipa dyètù dyà  
mikenji, . . . muzaajùbwe bwà bubì bwètù: dimyooka*

*dyà ditalala dyètù dyàkapòna pambidi pèndè; ne ku mibùndabùndà yèndè twàkondopiibwa.*

<sup>189</sup> Nzambì wàkenzela Muntu mupwàngàne awu cinyi? Kùdi ànu umwe wabò pa buloba, ànu umwèpelè pa buloba, ne ùwva n'Yéyè! Ki Nzambì kuMusongayè mwaba ewu: “Wàkatàpiibwa mpùtà bwà dishipa dyètù dyà mikenji.” Bwalu mumvwà ngènzàmpèkààtù, Wàkalekela Bukènkè bwà mwanzankòngòlò wa Bikondo Byèndè Mwandamutekète byà Èkèleeziyà bubàlakana pambidi pàànyì, bwà kumanya ne Wàkatàpiibwa mpùtà bwà dishipa dyànyì dyà mikenji.

<sup>190</sup> Ki mwanzankòngòlò wènu wà meekala mwandamutekète awu ngwòwò awu's. “Wàkazaajiibwa bwà bubì bwètù, dinyooka dyà ditalala dyètù dyàkapòna pambidi Pèndè, ku mibùndabùndà Yèndè twàkondopiibwa.” Nzambì wàkaMukòsa, ne kuMuzaaza, ne kuMubòza, ne kuMukòsa, bwà Wàmòna mwà kuleeja ku mpùtà Yèndè yìdì yìpùnga ne lufù ayi, difwidiibwa dyà luse ku mpèkaatù, disànkà, ditalala, mwoyi mule, bwìmpè, bupolè, kalolo. Nyumà mwandamutekète yà Nzambì ayi ki mamuma mwandamutekète à Nyumà àvwà ne cyà kulwa kuleejiibwa mu cisàmbà Cyèndè. Wàkazaajiibwa, kusongiibwa ne kufwimbiibwa, bwà Bukènkè bwà Nzambì bùdi bùkenkela mu mubidi wa Muntu umwèpelè awu abu bwàfwànyina kupikula buloba bujimà; “Nèmbandishiibwè pa buloba, Nènkokè bantu bwònsò kùNdi.” Tàngilàayi mwanzankòngòlò wa meekala awu pàdiwo àdileeja apu's.

<sup>191</sup> Kàdi pààkaMumòna Yone mwab'ewu, cìwva ncinyi? Ditùkù dyà kupikula dikaavwa dijike. Bwalu bukaavwa butùùke, ki yèyè kuMumònaye mu ngiikadilù Wendè wa kale wa ku cibangidilu awu, diikala dyà màyi à matàmbà ditàmbe kutwila. Kaciyi ànu cyàbìbìdì cimwè cyà buloba to, cidi ànu mwà. . . dìbà, didi ànu mwà kukenkesha cyàbìbìdì cimwè cyà buloba musangu ùmwè, nwamònu's, pàdìbu bunyuguluka apu. Kàdi pààkaMumòna Yone, Ùwva musòmbe ne mmwènekèlu wa dibwe dyà yaspà ne dyà sardwànè, meekala à màyi à matàmbà matàmbe kutwila awu; wèwè musambakaje àbìdì awu pàmwe, udi upeta diikala dyà màyi à matàmbà dyà ditàmbe kutwila adi. “Ne diikala dyà màyi à matàmbà dyà ditàmbe kutwila adi dinyungulukile Nkwasa wa butùmbi!” Kaa, ekèlekèle! Kaa, ndi—ndi nkwabwila ne, ànu. . .tudi bafwànyine kutùngunuka ànu ne kuya.

<sup>192</sup> Nyumà Mwandamutekète, meekala mwandamutekète, bikondo mwandamutekète byà èkèleeziyà, bambi mwandamutekète, makènkè mwandamutekète, byònsò bìdì mu mwandamutekète. Nzambì mmupwàngàne mu “mwandamutekète.” Nzambì wàkakwàta mudimu matùkù àsambòmbò; ditùkù dyà mwandamutekète, Wàkiikisha. Buloba nebwikalèku bidimu binunu bisambòmbò, ne cinunu cyà mwandamutekète m'Bukalenge bwà bidimu cinunu.

193 Mònaayi, *mu cyàbibìdì cyà cijèngù*, “cyàbibìdì cimwè kacyèna ànu cimanyiibwe to.” Mpindyewu, ncyà bushùwà ne bintu ebi bìdì bìleeja cintu kampànda.

194 Mpindyewu, mu Ekèsòdè 23:13 ne mu Ebèlù 6:12, Nzambi wàkenza cipungidi ne Yèyè mwinè ne wàkadicipila ku Yèyè mwinè. Ebèlù :13 ùdi ùtwàmbila, anyi 9, :13, ne: “Wàkadicipila ku Yèyè mwinè.” Kakùvwa mutàmbe bunène bwà kudicipilaku to pàakambilàYe Abraham ne Izàkà ne, mwaba awu Yèyè ùvwa mwambile Abraham ne Ùvwa mwà kwenza nendè cipungidi, cipungidi cyà kashidi. Nzambi. . .

195 Cipungidi cìtu misangu yònsò cyenzela ànu ku mucipu, pa nàнку kakwèna muntu nànsha umwe. . . Udi udicipila ku muntu kampànda udi munène mukutàmbe wèwè; udi udicipila ku mamwèbè, udicipila ku ditùngà dyèbè, udicipila ku cintu kampànda, udicipila ku Nzambi. Kàdi kwèna mwà kudicipa pàdìku kakùyì muntu kampànda munène mukutàmbe wèwè to.

196 Ne kakùvwa muntu nànsha umwe mutàmbe Nzambi to, pa nàнку Wàkadicipila ku Yèyè mwinè, ku Yèyè mwinè. Amen! Ùdicipila ku Yèyè mwinè ne Ùvwa mwà kushìndika cipungidi eci. Amen. Kaa! Yoyöyò! Wàkadicipilakù, Yèyè ùvwa mwà “kulaminyina Dimiinu dyà Abraham.” Dimiinu dyà Abraham kùdì bàà Bisàmbà byà bendè ncinyi? Dibàtiza dyà Nyumà Mwímpè, Dimiinu dyà Abraham. Wàkadicipila ku Yèyè mwinè ne: “Nèmbàbìishè, muntu ne muntu, ku lufù. Nèmbàpèeshè Mwoyi wà Cyendèlèlè ne kubàluja pa buloba apa.” Citùdì mwà kuditàci-. . . kwela meeji pa bwalu abu ncinyi?

197 Pa nàнку tudi tuMumòna mu cijèngù cyà màyi à matàmbà, diikala dyà kàlaabi kabwicidile. Diikala dyà lubìshibishi edi, màyi à matàmbà àdì àleeja cinyi? Mwoyi. Màyi à matàmbà mbwena kwamba ne mbubìshì bwà kashidi, ùshààla dībà dyònsò ànu mubìshì, s’ki mwoyi awu. Cìdì cyùmvwija cinyi? Ne Nzambi wàkalaya, bu mwàkenzàYe mucipù mu Genèsè amu, ne Yèyè “kàvwakù mufwànyine. . .” (Kutèèka mwanzankòngòlò mu dyulu.) mùdìYe “kàyìkù mufwànyine kàbìdì kubùtula buloba ebu ku màyi to.” Yèyè ùdi wenzà kàbìdì mucipù Wèndè ne ùdicipa kùdì Yèyè mwinè ne Yèyè neàjuule Dimiinu dyònsò dyà Abraham, ne buloba ebu nebùpìcile ku dinyukishiibwa dyà bilumbulwidi byònsò. Netwàkule bwà bilumbulwidi abi mu maleesònà àcilwalwà kumpàla eku, netùnùleeje mwaba wikala buloba ebu mwà kubyola ne kwalukila ku difùkuka dyà volcan, ne kutaayika mu tupesetupese, ne kukùdimikiibwabu ne bikwàbò byònsò. Kàdi Yèyè wàkadicipila ku Yèyè mwine ne Kàakubùbùtulakù to, kàdi Yèyè neàbùlandàkaje cyàkàbìdì ne neàteeke bàna Bèndè pa buloba bwà Bukalenge bwà bidimu cinunu abu. Kaa, ekèlekèle!

Ndi mwindile dilwa dyà ditùkù dyà disànkà  
dyà Bukalenge bwà bidimu cinunu adi,

Dyàlwà Mukalenge wetù mubènèshìibwe  
awu bwà kubàkula Mukàj'Èndè-musèla udi  
mwindile;

Kaa! Mwoyi wànyì wùdi wùjinga wàmba  
kufwà, wùdila bwà ditùkù dyà disùngidiibwa  
mu kalolo adi,

Dyàlwà cyàkàbìdi Musùngidi wetù pa buloba.

<sup>198</sup> Kaa, mùshindù mwine utùdi tujinga kumòna Ditùkù adi's  
wè, Yèyè wàkalaya ne Bukalenge bunène bwà bidimu cinunu  
bùvwa mwà kulwa. Kàbìdi cingà cintu, cìvwa cyenza ne Yikale  
munyunguluka, Yèyè's Nzambì mulami wa cipungidi. Yèyè  
neàlame cipungidi Cyèndè's!

<sup>199</sup> Mpindyewu twàngatàayi mvensà udi ulonda awu, nànsha  
bìshi. Ekèlekèle, tudi baswe kwangataku mukwàbò kàbìdi, ne  
tucìdi ànu ne tusunsa tutwè ku dikumi, dikumi ne tùtaanu  
bwà kucyènza. Nwàcyòku anyì? Nudi baswè kutùngunuka anyì?  
[Disangisha dìdi dyàmba ne: "Amen."—Muf.] Èyo, twàngatàayi  
mvensa mwi4:

*Ne lwà mu nyùngulukilu wa nkwàsa wà butùmbi  
amu mùvwa nkwasa makùmi àbìdi ne yinaayi: ne  
pa nkwasa ayi ngàkamòna bakùlù makùmi àbìdi ne  
bànaayi basòmbe, bavwàle bivwàlù bitòòke; nènku  
bàvwa bavwale bifulu byà butùmbi bya ngòlò ku mitù  
yàbò.*

<sup>200</sup> Tudi mwà kupanga kuya ne kundekeelu kwà mvensa  
awu. Èè, túbangàayi. Mvensa mwi4, tàngilàayi mpindyewu,  
pààkaMumòna Yone, diikala dyà màyi à matàmbà dyà  
ditwile adi diMunyùngùlùkile, twamònu meekala ònsò  
awu, myanzankòngòlò, ne bikwàbò, ne byònsò bivwabi abi.  
Mpindyewu, mu mvensa mwi4, cintu cyà kumpàla cidiye  
wàkula mwab'ewu, ku mvensà mwi4 ew- . . .

*Ne lwà mu nyùngulukilu wa nkwasa wa butùmbi . . .*

<sup>201</sup> Tàngilàayi! Ncimfwànyì cilenga be kaaba aka, kacìnùpìci to,  
"Nkwasa wa butùmbi."

<sup>202</sup> Nudi bamanyè's, twàlukilàayi kùdì Mòsà. Mòsà . . . Katwèna  
ne dībà dyà kubyùmbula to, pa nàнку angàtaayi ànu cìndì  
ngàmba aci. Mòsà, pààkamupèèshàbo cikèènà-kumòna pa  
Mukùnà wà Sinàayi . . .

<sup>203</sup> Ndi muswè bwà numòne ne eci kacìcìvwa kàbìdi Nkwasa  
wa ngàsà to. Mwaba awu, mashi àkaavwa mamanè kuya, ne  
mulàmbù ùkaavwa mwalùkile cyàkàbìdi ne bàvwa biitabìibwe,  
ne mashi kàvwa pa nkwasa wa ngàsà to. Nàнку cìvwa  
mpindyewu nkwasa wa cilumbulwidi bwalu mikungulu ne  
mìpenyi bìvwa bipàtukilamù. Neyà bushùwà anyì?

<sup>204</sup> Vùlukàayi ne, cìvwa bu Mukùnà wà Sinàayi. Pààkaya Mòsà  
pa Mukùnà wà Sinàayi apu, cyàkenzeka ncinyi? Mikungulu,

mipenyi. Nànsha ngombe anyi kânà kàà ngombe anyi mùkòòkò, anyi ní nganyi ní nganyi, mulenge mene mukùnà awu, ùdi ne cyà kufwà. Bible mmwámbe ne: “Dikanka dyà buloba dyàkadi dinène dyà kacya mu mùshindù wa ne nànsha Mòsà mwine wàkaciina.” Ki Mòs-...Yèyè ne: “Kopola bìsabaatà byèbè mwaba ewu, udi usanganyiibwa mu malaba à Cijila.” Yoshùwà mulwanganyi munène wa mvità awu, ùvwa ne cyà kusabwisha bânà ne kwabanya bumpyànyi bwàbò, ùvwa ànu mwà kubànda citùpà cyà njila pa mukùnà apu.

<sup>205</sup> Ki Mòsà udi mwimane pààpa wàwa ne meekala à àpodya à Nzambi ne mikenyi ne yà diikala dyà màyi à matàmbà matwile mamunyungùlukile, ùbandila mèyi matùma awu àfundiibwa. Mwimàne mu Bwikadi bwà Nzambi, Diyì adi diikàle dyàndamuna ne: “Mòsà, udi penyi? Kopola bìsabaatà byèbè, s’udi mu buloba bwà Cijila.”

<sup>206</sup> Nkwasa wa cilumbulwidi, ki cìvwàci mpindyewu, cintu nànsha cimwè kacìvwaku mwà kwimana mwaba awu to ànu bapikùdiibwe. Ngènzàmpèkààtù kàvwakù mwà kuseemenakù to nànsha kakesè (kwàmanyi kujika), nkwasa wa cilumbulwidi. Eyo.

<sup>207</sup> Mpindyewu, Mòsà wàkenza bintu pa buloba, wàkenza tabernacle, bifwànàngane ne bintu byàkamònàye mu Dyulu abi. Tudi bamanyè nànkù, kî mmwòmò anyi? Tudi tusangana ne Pòlò wàkenza cintu cimwècimwè aci. Úvwa ne cyà kwikala ne...Ebèlù 9:23, uvwa Mòsà mwenze maalù ànu menemene mwàkenzaye yèyè amu. Nènku Pòlò mu cikèènà-kumòna cyèndè pààkabàndàye mu Dyulu (pààkalongeshàye Mukàndà munène wa Ebèlù awu apu), ùvwa ne cyà kwikala mumòna mu cikèènà-kumòna cyèndè cintu cimwècimwè cyàkamòna Mòsà aci, bwalu mmwambe ne (wàkalongesha Mukàndà mulenga wà dikèma wà Ebèlù awu), mùshindù ùvwa bwena Kilistò bwikàle mubidi wà bwalu wà Dipungila Dikulukulu. Yèyè ùvwa mulongeshi munène, Mò-...Pòlò awu’s. Mpindyewu, ki cìvwà Nkwasa Wendè wa butùmbi *dìbà adi*. Pashùshe mu... .

<sup>208</sup> Twànjààyibi ànu...Kakwèna dikwàcisha to, ncyèna mwà...nkaavwa muswe kulekela bwalu ebu, kàdi ncyèna ànu mwà kubulekela to. Mboodi wa kufùndila ùdi penyi? Nuvwa bamuumùshe anyi? Údi paanyimà anyi, Doc? Èè, pàmwàpa ndi mwà kunufikisha ku dicimwèna mwaba ewu. Ndi—ndi... Mpindyewu, angàtaayi crayons yènù ne mabèji, bwalu ndi muswè kwambaku cintu kampànda mwab’ewu. Mvwa—mvwa musòmbe mu dindà emu pàvwa cintu kampànda cilwa kùndi. Mpindyewu nènkwambilè cingààkenzà, bu nwènù mwà kumòna, ndi mucizòle lwà paanyimà apa. Nwamònu anyi? Kucizola ànu buludi ànu mùvwà Nyumà mucimpèèshè, nwamònu’s, kuzola mwab’ewu cìvwàci ne cyà kwikala. Kàdi ndi—ndi muswè kwambakù cintu kampànda mwab’ewu mene.

209 Mpindyewu, Nzambi, pàdiYe ùtèèkiibwa mu nkwaswa wa butumbi apu, Yèyè ùdi dībà adi Mulumbulwishi. Ncyà bushùwà anyi? Nzuji ùdi ùlumbulwisha dībà kaayi? Pàdiye ùlwa ku nkwaswa wendè wa cilumbulwidi, nkwaswa wa butumbi. Mpindyewu, ndi muswè bwà numòne mùshindù wàkenjiibwa Dipungila Dikùlùkulu, mùshindù ùvwa mbàlandà yà pabwipi ne Nkwaswa Wendè wa butumbi awu myenjiibwe, ne mùvwà Yone mumòne kaaba aka. Katwàkufikakù mu dindà emu to, mu cyònsò aci. Kàdi mùshindù mwine wàkamònà Yone mbàlandà yimwèyimwè yà diseemena kùdiYe, ne cìvwà diseemena ku mbàlandà Yèndè. Mpindyewu, kaa, ndi munangepu eci.

210 Mpindyewu, mu Dipungila Dikùlùkulu, kùvwà cìvwà cìbiikidiibwà ne “disangisha aci,” kùvwà bantu badìsangìshe. Cintu cyà kumpàla, kumpàla kwà kubwelabò, disangisha, bwà kubweladi mwòmò amu, bìvwà bikèngela bwà kulwabò mwinshì mwà mashi meela panshì, mbàlandà yà pambèlu ayi. Dyàmbedi bàvwa bàlwa ku màyi à ditàpulula, kùvwà ngombe wa lukùngùlù mukùnze ùshipiibwa ne wènjiibwa màyi à ditàpulula. Ke ngènzàmpèkààtù nyèyè awu udi ulwa utèeleja Dìyi.

211 Mùshindù awu ki wàkatwàdiibwà laabi munène wa beena Yudà ewu ànu kùdi Mukalenge, pàakangumvwayè nyiisha pa cyòci aci mu . . . ku Tulsa. Ku Tulsa, ki cìvwàku. Tuvwa ku Tulsa, mu Oklahoma. Ki kulwaye kuntwaku, ànu bu mubandidi. Ki kulondaye disangisha adi, kwambaye ne: “Ndi mumanyè!” Yèyè ne . . . Yèyè ewu ki umwe wa ku baalaabi mwandamutekète bàà batàmbe kumanyika bàà pa buloba abu. Ki kulwaye mwaba awu, kwambaye ne: “Ndi muswè kumòna cidi beena Kilstò bàà Kantu-ku-byanza abu bàba . . . Babàbiikila ne: ‘Beena Mpenta.’ Ndi muswè kuyakù, kusòmbela panshì, kutèeleja.”

212 Nènku pàakandombola Mukalenge bwà mèmè kwakula pa mulàmbù wà ngombe wa lukùngùlù mukùnze awu, paanyimà pàà disangisha yèyè kutwilangana ne bàmwè bàà ku bânà bèètù bàà balùme abu kuntu kwàka, kwambayè ne: “Ndi muswè kutwilangana ne muntu awu. Ndi mumanyè ne kèna nànsha ne kàlaasà kalonga to kàdi . . .” Yèyè ne: “Mèmè ndi laabi wa beena Yudà udi mumanyè mùshindù yònsò mishìlèshìlàngàne yà diseemena ne bintu byà mùshindù awu abi,” yèyè ne: “Kacya bandela ncìtu mwanji kumòna aci to.” Yèyè ne: “Ncìtu mwanji kucimònaku to.”

213 Nènku mpindyewu yèyè ùdi laabi wa beena Mpenta, muujiibwe tètè ne Nyumà Mwìmpè, ùya myaba yònsò, ùyiisha Èvànjeeliyò. “Laabi mwena Mpenta,” mùdiye ùdìbiikila. Wàkaya ku Cilàala-beenyi cyà mu Washington Youree, ditukù adi patwàkatwilanganà pàmwè kwà Mwanètètù Jack, ki inàbànzà awu kumumanyayè, kwambayè ne: “Laabi,” yèyè ne, “tudi ne mwaba mulenga bwèbè wèwè, kàdi” yèyè ne: “katwènamù ne téléviziyò to.”

214 Yèyè ne: “Bintu abi bidi ‘ifernoviziyò,’ byelàayi pambèlu! Ncyèna muciswemù to, nànsha bishi; bu cyòci mwómù, mvwa mufwànyine kunwenzeja bwà kucyèla pambèlu.”

Yèyè ne: “Laabi!”

Yèyè ne: “Mémè ndi laabi wa beena Mpenta.” Àlèluuyàh!

215 Yèyè ne: “Mpindyewu, pawàya mu Izalèèla, Mwanèètù Branham, ndi muswè kuya neebè.” Yèyè ne: “Tudi mwà kucitwadila cisambà cyètù.”

216 Mémè ne: “Kí mpindyewu to, Laabi, mpindyewu to. Kí mpindyewu to, kí ndìbà mene to, anji indìlábì kakesè.”

217 Mpindyewu, mònayyi myaba yà cijila eyi. Mpindyewu, paùdi ubwela mu mbàlandà, cyà kumpàla’s mbàlandà, mbàlandà yà pambèlu ayi. Cìvwà cilondà cìvwa ncyoshelu, kùvwàbo bàlambula milàmbù, cyoshelu cyà cyamù cyà kabanda. Pashiishe pambèlu pàa cyoshelu cyà cyamù cyà kabanda aci, kùvwa cilàmbà cikùdika cìvwà cikùdika mwab’ewu cìvwà cibweja mu Mwaba mutàmbe cijila; mwómò amu mùvwa nkwaswa wa ngàsà, mwómò amu mùvwa Bakèlùbà. Kì cìndi muswè kuleeja mu dileesònà dyètù didi dilonà, Bakèlùbà abu biikàle bàbwikila ne mundidimbì nkwaswa wa ngàsà. Kaa, ekèlekèle! Ndi . . . Tudi mwà kushàala ànupù ngondo ewu mujimà, nwamònu’s, pa Mukèlùbà awu.

218 Mpindyewu, mpindyewu mònayyi pàvwàbo bàbwelamù. Disangisha divwa mwà kulwa *mwaba awu*; baakwidi bàvwa mwà kwimana *apa*; kàdi ànu mwakwidi mutàmbe bunène ki uvwa mwà kubwela *muntwamu*, musangu ùmwè ku cidimu, ùyamu ne mashi.

219 Nènku bìvwa bikèngela ikalè muvwale mùshindù kampànda, cìvwalu kampànda; bìvwa bikèngela kwikalayè ne ngonga ne grenade, aka kalondangane ne kakwàbò. Nènku pàvwàye wènda, bìvwa bikèngela bwà yèyè kwenda mu mùshindù kampànda. Pàvwàye wènda apu, tùvwa tùdila ne: “Wa cijila, wa cijila, wa cijila, kùdi Mukalenge. Wa cijila, wa cijila, wa cijila, kùdi Mukalenge,” tungonga atu ne grenades ayi bìdila pàmwè ne: “Wa cijila, wa cijila, wa cijila!” Bwà cinyi? Yèyè ùvwa wènda useemena pabwìpi ne Nzambi, mwikàle ne mashi à cipungidi mu cyanza cyèndè, wènda uya kumpàla Kwèndè, mwambùle mashi.

220 Mwela maanyi (Kaa, ekèlekèle!) ne mánanshi kampànda. Bilàmbà byèndè bìvwa ne cyà kwikala byenza kùdi byanza byùle tètè ne Nyumà Mwimpè, byanza bijidila ki bìvwa byenza bilàmbà abi’s. Rose wa Shalònà, maanyi à dilaabiibwa, kuàpòngolwela pa mutù wèndè apu, àvwa àpweka too ne ku mwedi wèndè ne pashiishe àpweka àmwangalaja mwaba wèndè awu manànanshi à bukalenge; grenade ne kangonga; mwambule mashi à mwànà wa mùkòòkò uvwa kàyì mwenze bwalu to; nènku kàvwa mwà kudidìnga kuseemena ku cibwikilu lwà pambèlu to, ùvwa mufwànyine kufwila ànu mwaba awu, mwaba ùvwaye

mwimanyine awu's. Pa nanku bivwa bikengela bwà yèyè kuya, wènda wènda mùshindù kampànda ne: "Wa cijila, wa cijila, wa cijila, kùdi Mukalenge. Wa cijila, wa cijila, wa cijila," (ùseemena kùdi Nzambi) "kùdi Mukalenge. Wa cijila, wa cijila, wa cijila!"

<sup>221</sup> Ki kuyaye kuntwaku ne kulàmbùlayè mashi ku nkwaswa wa ngàsà aku, musangu ùmwè ku cidimu. Nènkù pàvwàye mwômò amu apu, ùvwa ne dyèsè dyà kumòna Butùmbi bwà Shekinàh; pàvwà Dikunji dyà Kapyà, Bukènkè bwà màyi à matàmbà butàmbe kutwila abu bupweka, bwàkalombola kupàtula bânà bàà Izàlèlèlè abu. Bwàkuuja mene ntempèlù ne mwìshì mu mùshindù wà ne muntu nànsha umwe kàvwakù mwà kuBùmòna to. Butùmbi bwà Mukalenge kutùùluka too ne mùvwàmù muujiibwa ne mìshì. Nènkù wàkabwelamù Yèyè mwine, kubwelaYe paanyimà pàà cibwikilu ne kusòmba pa nkwaswa wa ngàsà mu Mwaba mutàmbe cijila. "Mwaba mutàmbe cijila," mùdìbo bàwùbiikila, Mwaba mutàmbe cijila. Nènkù bivwa bikengela bwà yèyè kwikala muvwàle mùshindù kampànda, wènda mùshindù kampànda, mwediibwe maanyì mu mùshindù kampànda. Yèyè ùvwa muntu wa pabwèndè bwà kubwelayè muntwamu. Mùshindù mwine ùvwa disangisha ne cyà kwikala òmwalakana's wè!

<sup>222</sup> Kàdi pààkafwà Yesù, cilàmbà-cikùdika cyà mu ntempèlù cyàkapandika. Kabiciyi ànu mwakwidi munène to, kàdi "ewu yònsò udi muswè" ùdi mwà kupeta dilaabiibwa òmwèdimwè dyà Butùmbi bwà Shekinàh adi ne kwenda lwendu lwà cijila ne: "Wa cijila, wa cijila, wa cijila, kùdi Mukalenge," ne kuseemena mu Bwikadi mene bwà Nzambi, ku Mashì à Yesù Kilistò kumpàlà kwèndè. Ùya nendè ne: "Mukalenge Yesù, s'ki mubèèdi ewu mudyadije kaaba aka, s'mmwanèètù wa balùme. Ùdi pa bulààlu bwà lufù patùdi twakulangana apa, bwà kufwà. Nyèwù nseemena Kùdi ne: 'Wa cijila, wa cijila, kùdi Mukalenge.'"

"Bwà cinyi?"

"Bu mwakwidi munène."

"Bwà cinyi?"

"Pa kaaba kàà mwanèètù. 'Wa cijila, wa cijila, wa cijila, kùdi Mukalenge.'"

<sup>223</sup> Ki bwalu mbwòbù abu's! Lwendu lwèbè lwà ku ditùkù ne ku ditùkù, dyakula dyèbè dyà ku ditùkù ne ku ditùkù, diditwàlà dyèbè dyà ku ditùkù ne ku ditùkù, mwoyi wèbè, musùukà wèbè, ne byònsò: "Wa cijila, wa cijila, wa cijila, kùdi Mukalenge." Kakùyì miji yà bululu to, cintu cikwàbò nànsha cìmwè to, "Wa cijila, wa cijila, wa cijila, kùdi Mukalenge. Wa cijila, wa cijila, wa cijila, kùdi Mukalenge," bu mutùdi tubanga kuseemena pa kaaba kàà mwanèètù. Ewu yònsò udi muswè ùdi mwà kulwa, mulaaba maanyì, ne Mashì kumpàlà kwèndè, Mashì àdyanjidila kumpàlà kwèndè, imba "Wa cijila, wa cijila, wa cijila, kùdi Mukalenge."



224 Mpindyewu, awu's ùvwa mbàlandà wa pambèlu, mwaba wà cijila. Ne Mwaba mutàmbe cijila, ùvwa mmwaba wa cijila wa Nzambi pa buloba. Tàngilàayi, cìvwa cìfwànyikijila pa cyà ku Dyulu. Mpindyewu, netwàlukilè cyàkàbidì buludì ku Mufundu wùm>wùm>wè ewu. Kaa, patùdì tulonga Bwàkabuulwibwà apa, tudì mwà kwalukila buludì cyàkàbidì ku cyòci eci. Nwamònu anyì?

225 Mpindyewu yèyè. . . Yone, Yone mmwimanyine penyì? Ku mbàlandà. Twānjìbi kubalakù ànu ndambù kaaba aka bwà nwamòna mwà kuumvwa cimfwànyì aci:

*Ne ku nkwasà wa butùmbi kùvwa kùpàtuka mikenyi. . . mikungulu. . . mèyì: ne kùvwa myèndù mwandamutekète yà kapyà (Indilaayi too ne patwàfikà ku cyòci aci!) miikàle yiteema kapyà kumpàlà kwà nkwasà wa butùmbi, yìdi miikàle Nyumà mwandamutekète yà Nzambi.*

226 Miikàle yìleeja Bukènkè bwà Nzambi mu Èkèleeziyà, buludì bùfùmina ku Nkwasa wa butùmbi wa Nzambi, kì nku sèminèrè kampànda to, kì nkùdì mwepiskòpò kampànda to, kàdi ku Nkwasa wa butùmbi wa Nzambi, ku dibuulula dyà bukolè bwà dibìikà Dyèndè dyà ku lufù, uMuvwija umwèumwè awu makèèlèlè too ne kashidi; mìtootò mwandamutekète ayi miimane mwaba awu yìleeja Bukènkè abu, Bukènkè bwà Shekinàh, buumukila ku Butùmbi bwà Shekinàh bwà mu Mwaba mutàmbe cijila awu. Myèndù mwandamutekète yiteema kapyà, misòmbesha ku lusongo lwà bitèèkedi byà myèndù ebi, mwikàle ùleeja Bukènkè Bwèndè, meekala Èndè, à bukolè Bwèndè bwa dibìikà Dyèndè dyà ku lufù, ùbwela buludì mu Èkèleeziyà. Amen! Hmm!

*Ne kumpàlà kwà nkwasà wa butùmbi. . . kùvwa mbù wa lumwènu mufwànàngàne ne ntàlatalà: ne munkaci mwà nkwasà wa butùmbi, ne lwà mu nyungulukilu wa nkwasà wa butùmbi, mùvwa bifùkùbwà binaayi byùle tèntè ne mèsù kumpàlà ne paanyimà.*

227 Nènku ùdi ùtùngunuka ne ùbanga kufila cyòci eci. . . nyama eyi, cintu cìmwècimwè cyàkamòna Yèhezèkèlè aci; balami abu. . . umwe bu muntu, umwe bu nyama wa ntambwe, ne umwe bu mukanku. Cìvwa ncinyì? Mpindyewu, tàngilàayi, patwàbabweja ne kuleeja Ntambwe wa Cisàmbà cyà Yudà awu ne bakwàbò bashiilèshiiàngàne bwònsò bàà mu bisàmbà byàbò, bàvwà bàsòmba pa bimanu binaayi abu, ne bàvwa bàlama nkwasà wa ngàsà ewu. Kaa, ncimfwànyì kaayi's wè! Kaa, ndi ànu. . . Kùdi matùkù manène kumpàla eku.

228 Ànu mutùvwà babimòne, mpindyewu, cìvwa n'Nkwasa wa butùmbi wa Nzambi mu Dyulu, Mòsà wàkaMufwànyikija pa buloba, cìvwa n'Nkwasa wa butùmbi wa Nzambi bwalu nkwasà Wèndè wa cilumbulwidi ùvwa muleejìbwe pa buloba apa

mu Mwaba mutàmbe cijila awu. Nzambi... Izalèèlà mujimà wàkalwa ku mwaba ùmwèpelè awu bwà kupeta luse, bwalu Nzambi ùvwa ùtuutakeena ànu mwinshi mwà mashi meela panshì.

<sup>229</sup> Mpindyewu, tèèlejàayi ne ntèmà. Pashiishe Butùmbi bwà Shekinàh kujuukabu mu nkwaswa wa ngàsà awu dīngà ditùkù, ki Bwòbù kusòmbabù mu mukwàbò Tabernacle (Amen!), Ewu nùnkù: “Taatu kèèna ulumbulwisha muntu nànsha umwe to kàdi Yèyè mmufile dilumbulwisha dyònsò kùdì Mwànà.” Nkwasa wa Cilumbulwidi wa Nzambi. Yóyóyò! “Nwènu baakule bibi Bwànyì, nenùfwidiibwe luse,” baakule bwà mukwàbò—mukwàbò ulwàlwa Awu, mukwàbò Nkwasa wa Ngàsà. “Akula... wèwè mwakùle bibi bwà Mwànà wa muntu, Mémè nènkufulwìlè luse; kàdi dīngà ditùkù Nyumà Mwìmpè neálwe bwà kusòmbela mu myoyi yà bantu, dīyì dimwèpelè dībì bwèndè Yèyè kadyàkufwidiibwaku luse to.”

<sup>230</sup> Cidi citungunuka ne kutàmbe kulwa cyà dīsù dikolè ne dīsù dikolè dyà menemene dībà dyònsò, cilumbulwidi, bwalu lutùlù lwà Nzambi lùdi lwenda ànu lushèèkeleka, pàdīYe uteata bwà kufikisha bangenzàmpèkàatù ku dilwa kùdīYe bwà kupungishiibwa. Dyàmbedi, Yèyè ùvwa mu maulu kuulu ne ùkenkeshila mu mitootò. Cībīdī, Yèyè ùvwa pa buloba munkaci mwà kukenkeshila mu Butùmbi bwà Shekinàh. Pashiishe, Wàkalwa ne wàkavwijiibwa mubidi ne wàkasòmbela munkaci mwètù, lutùlù Lwèndè lucidi ànu lwenda lushèèkeleka. Pashiishe Yèyè wàkapikula muntu ku Mashi Èndè, wàkabwela mu Èkèleeziyà Wèndè mu mmwènekèlu wa Nyumà Mwìmpè, ne kwakula bibi bwà Aci s’nkujike, bwalu mbutùùke.

<sup>231</sup> Mpindyewu nudi mwà kumòna kùdì dinyùkùshiibwa dilwa. Kabèèna bàfika ku dyumvwa cikondo citùdì to. Bantu kabèèna mwà kuumvwa cidīCi cyùmvwija to.

<sup>232</sup> Mpindyewu, Nkwasa wa butùmbi wa kumpàla ùvwa mu Dyulu, nkwaswa wa cilumbulwidi. Nkwasa wa butùmbi mwibidì ùvwa mu Kilistò. Nkwasa wa butùmbi mwisàtù ùdi mu muntu.

<sup>233</sup> Mpindyewu, ngànji kwangata kaacintu kakesè kàndi muzòle kaaba aka aka. Netwènze... Mvw’á kwikalaku nànsha ne mboodi, bwà ngaamòna mwà kutàmbe kunumvwijaci menemene. Netwangate mbàlandà ayi kàdi kuyizola, kuyeela ànu mu mulongo wa cijengu, anyì mùshindù ewu, anyì ewu nùnkù’s. Mpindyewu netwàngatè... Ngeela meeji ne, mùshindù ewu pàmwàpa ngùdì mufwànyine kwikala mutàmbe bwìmpè, netwàngatè ne kwenza mbàlandà ayi.

<sup>234</sup> Mpindyewu, muntu ncinyi? Yèyè ùdi kampànda pàsàtù; mubidi, musùukà, ne nyumà. Mbanganyì bàdì bamanyè nànkù? Tàngilàayi diseemena dyà Nzambi. Mwoyi wèndè ncinyi? Nudi bavùlùke mukenji wànyì wà ne: *Nzambi Wàkasungula Mwoyi wà Muntu bu Kàleyi Kèndè* anyi? Dyabùlù ngwàkasungula mutù

wèndè bu kàleyi kèndè kàà bukòntononyi; nwamònu's, yèyè ùdi ùmufikisha ku dimòna maalu, ùtàngidila mu mèsù èndè amu. Kàdi mu cyòci aci. . . munda mwà mwoyi wèndè Nzambi ùdi ùmufikisha ku diitabuuja bintu bìdiye kàyì mwà kumòna to. Kì mmwòmò anyi? Nwamònu's, Nzambi ùdi pa mwoyi wèndè, mu mwoyi wà muntu ke mùdi Nkwasa wa butùmbi wa Nzambi. Nwacyũmvù anyi? Muntu! Nzambi mmwènze mwoyi wà muntu Nkwasa Wendè wa butùmbi.

<sup>235</sup> Mpindyewu, tàngilàayi. Citùpà cyà kumpalà cyà muntu ncinyi? Citùpà cyà kumpalà cyà muntu m'*mubidi*. Citùpà cidi cilonà m'*musũũkà* wèndè, cidi ngiikàdilù wa nyumà wèndè udi umufikisha ku diikala cidiye aci. Yèyè ùdi ùsemena mpindyewu. Mpindyewu, citùpà ciisàtù cyà muntu n'*nyumà* wèndè, ne nyumà wèndè awu ùdi munkàcinkàci wa mwoyi wèndè, ne munkàcinkàci wa mwoyi ke mùdi Nzambi ùlwa kushikika Nkwasa wa butùmbi.

<sup>236</sup> Nudi bavùluke ne, àbìdi àdi panshì aa, bi—bibèjibeji bìvwa bifila mu Chicago kukaadi bidimu bitwè ku bìnaayi, pàvwa mwena kwitabuuja wa kale awu. . . mwena bupidyà wa kale's we, mwikale ne ciibidilu cyà kwamba ne Nzambi wàkenza cilema ku Solomo pàakambàYe ne: “Ànu mùdi muntu wela meeji mu mwoyi wèndè amu.” Yèyè ne: “Kakwèna byeledi byà meeji mu mwoyi byà kwelelaku meeji to. Mmunyi mùdiyekù mufwànyine kwela meeji ne mwoyi wèndè? S' bikèngela bwà. . . S' ùvwa ùswa kwamba mutù wèndè.”

<sup>237</sup> Bu ne Nzambi ùvwa ne meeji à kwamba mutù wèndè, nùнку's mMwambe ne: “mutù wèndè.”

<sup>238</sup> Bu Mòsà, kàdi bu ne Mòsà. . . bu ne Nzambi mmwàmbe ne: “Mòsà, umusha bisàbaatà byèbè, wèwè's udi mu buloba bwà Cijila”; yèyè ne: “Èè, bwà cinyi nciyikù mwà kuumusha ànu cifulu cyànyi, s' bidi ànu byà mwomùmwè”? Yèyè mmwambe ne: “bisàbaatà.” Yèyè kàvwa mwambe ne: “cifulu” to, ùvwa mwambe ne: “bisàbaatà.”

<sup>239</sup> Nènku pàakambaYe ne: “Nyingalalaayi, nubatiijiibwè mu Dìna dyà Yesù Kilistò,” Kàvwa ùswa kwamba ne “Taatu, Mwànà, ne Nyumà Mwimpè to”. Ùvwa ùswa kwamba ànu menemene cyàkambaYe aci.

<sup>240</sup> PàakambaYe ne: “Udi ne cyà kulediibwa cyàkàbìdi,” Yèyè kàakamba ne: “*Bivwa mwà kwikala bìmpè bu wèwè mwà kwikala nànu to.*”

<sup>241</sup> Yèyè ne: “Bimanyinu ebi *nebifilè* aba bàdi bìitabuuja,” Yèyè kàakambakù ne: “*Pàmwàpa* nebiikalè mwà kufila to.”

<sup>242</sup> Yèyè ùdi wàmba cidiYe muswè kwamba! Ne Yèyè ùdi Nzambi ne Kèna mwà kuCyàluja to. Yèyè mmumanye cidi cipwàngàne ki bwà cinyi Ùdi ùCyènza mùshindù awu, nènku s'ki mùshindù ùdiYe—ùdiYe muswè bwà Cyòci kwikala awu. Nènku bikèngela ùkafike ku Cyòci aci. Ki n'Yèyè upweka ku lungényi lwèbè to,

bikèngela wêwè ùkafike ku Mmwènenu Wendè. Ki dishìlangana ndyòdi adi.

243 Mpindyewu, mpindyewu, mu ndongolwelu wa mubidi ewu, musùukà . . . Mpindyewu, nwènù bangate mwàku ewu *musùukà* ne bawùkenkète, newùnwàmbilè mu—mu nkòngamyàkù wa Bible anyi wa Webster, yònsò wa ku yôyi ne, cidi “ngiikàdìlù wa nyumà.”

244 Mpindyewu, muntu nyêyè ewu, mutùtù twamba, John Doe *nyêyè ewu*. Eyo, John Doe. Kàdi Sam Doe *nyêyè ewu*. Eyo. Mpindyewu, John Doe mmuntu, mubidi, mwanààbù ne Sam Doe. Mpindyewu, John nnyumà, musùukà, mubidi; ne Sam Doe ùdi pèndè cintu cimwècimwè aci (mubidi, musùukà, nyumà) mùdiye pèndè amu, mubidi, musùukà, nyumà. Mpindyewu, muntu *ewu* mmubi, wa lwonji, wìbila, wìba, ushima, wènda masandi, cintu cibì kanà cyònsò cidiye mwà kwenza aci; kàdi *ewu* muntu yêyè mmùle tètè ne dinanga, ditalala, disànkà. Bùbidi bwàbò bàdi ne musùukà, mubidi, ne nyumà. Èè, dishìlangana didi penyi? Muntu *ewu* ùdi mwà kwalukila cyànyimà kwamba ne: “Ndi mvùluka maman wanyi, Ndi mvùluka bintu bitùdi benzè patùcivwà bânà bàà nsongàalùme apu”; bwònsò bàbidi bàdi mwà kucyènza. Bùbidi bwàbò bàdi ne nyumà, bùbidi bwàbò bàdi ne misùukà, bùbidi bwàbò bàdi ne mubidi.

245 Kàdi ngiikadilu wa nyumà wa muntu *ewu's* mmubi; ngiikadilu wa nyumà wa *ewu* muntu's mmwimpè. Nwamònu anyi? Pa nàнку ngiikadilu wa nyumà ki musùukà wà muntu. Nwamònu anyi? Pa nàнку, mpindyewu, Nzambì ùdi ùteeta kubwela mu cinyi? Nyumà ne mwoyi wà muntu. Mwaba wùdi nyumà ùsanganyiibwa mu mwoyi.

246 Nudi bamanyè's, ne maalu à mamanya mmambè (bu mùmvwà nciyi mujikijekù aci to), ne muntu kàvwa mufwànyine kwela meeji ne mwoyi wèndè to. Nènku maalu à mamanya àbangì kujandula ne kùdi kaacibambalu kakesè mu mwoyi wà muntu (kì mmu mwoyi wà nyama to, kàdi mu mwoyi wà muntu), kamwena nànsha kabùlù kàà mashi to, anyi cintu nànsha cimwè. Bòbò kwamba ne: “Cidi ne cyà kwikala mwaba ùdi musùukà usòmbela's, anyi nyumà.” Bàlekèlaayi ànu—bàlekèlaayi ànu cyanààna, bòbò nebàngatè bintu byàbò byà bukùtākane abi ne nebàjaadikè Nzambì. Ncyà bushùwà. Nzambì ùtu ànu ùfikisha bukùtākane ku diMufidila bujaadiki.

247 Mpindyewu, ki cyòci aci, cyena-bwalu cinène mu cibèjibeji. Mwànà wa bakàji mukesè wa Mwanèètù Boze kwambaye ne: “Mwanèètù Branham, udi mumanye cyùvwà wamba ditùkù adi aci anyi?” Yêyè ne: “Tàngila, tàngila, maalu à mamanya àkaadi mamane kujandula.”

248 Mémè ne: “Èè, Nzambì àbèneshiibwè! Ndi muswè kupeta aci, mwanèètù wa bakàji, ndi muswè—ndi muswè kupeta aci.”

249 Musuùkà wa muntu ke ngiikàdìlù wa nyumà, ne nyumà mmusòmbèle mu mwoyi wà muntu.

250 Mpindyewu, mpindyewu, mbàlandà yà pambèlu ncinỳì? Aci's mmubidi. Nwamònu anyì? Ki cintu cyà kumpalà kùdi ufika, mmubidi. Bikèngela bwà wèwè kwòsha aci dyàmbedi. Udi ne cyà, kutàmba mubidi awu. “Ncyèna—ncyèna mudyumvwe bu udi mwà kjuuka kuya mu èkèleeziyà to, njila yidi ne busenù bwà dikèma. Ndi—ndi . . . Kùdi luuya lukolè be. Kaa, disangisha dyà leelù, ncyèna mumanyè to.” Ki mubidi ngwòwò awu. Èyo. Mpindyewu, bikèngela wòshè ne ùtàmbe cyòci aci, bikèngela bwà Nzambi àcitàmbè.

251 Musangu wàlondà wàlwàYe, bikèngela Àbwelè mu musuùkà, ki ngiikàdìlù nyèyè awu. “Kaa, ba-Jones nebàmbè cinyì bwànyì mèmè's? Kaa, èkèlekèle! Nudi bamanyè's, èkèleeziyà wanyì neàngeele pambèlu mèmè—mèmè mwà kwenza cintu cyà mùshindù awu. Nwamònu anyì?” Kàdi bikèngela ùpìte aci.

252 Nènku paùdi upita aci, dîbà adi Yèyè ùdi ubwela mu mwoyi ne mwómò amu ki mùdiYe ùshikama mu nkwaswa wa butùmbi. Ki Nyumà Mwîmpè awu munda mwèbè's. Yesù wàkamba ne: “Mbipticùbwe ne bàkuswike dibwe dyà mpelu mu nshingù ne bakwinyije mu kandondo-nkidi kàà mbù, pamutù pàà kulendwisha mene umwe wa ku bakesè bàdi baNgítàbùùje aba.” Kanùbenzèdi bibi to; ànu mene kubàlèndwisha, ànu kubàbìndulula pa cintu kampànda nàka. S'bìvwa kwikala bitàmbe bwîmpè bwà wèwè kwikala mufwile mu màyi, anyì kùyiku nànsha mulediùbwe pa buloba to, pamutù pàà kutwàla cilèndwishi kùdi umwe. Ki cìvwaYe muswè kwamba anyì? Ùdiku mwà kushima anyì? Bàpostòlò mbààkacyàmbà anyì? To, to. Yesù ngwàkaCyàmbà! Yesù wàkamba ne: “Wèwè ànu mulèndwishe umwe wa kùdìbo, bakesè bàdi baNgítàbùùje aba.”

“Bimanyinu ebi nebifilè aba bàdi bìitabuuja!”

253 Muntu kampànda munène, wa katankù wàmba ne: “Kaa, mèmè's ndi muMwitàbùùje! Àlèluuyàh!”

254 “Kacya ukààdikù mwakule mu myakulu, mwandamune myakulu, mwipate badémòns, mumòne bikèènà-kumòna, ne bikwàbò, bu mwàkalayàYe anyì?”

“To, ditùkù àdi's dikaadi dipite.” Yèyè kî mmwena kwitabuuja to, mmwena kwitabuuja wa budingìbudingì.

255 Yesù wàkamba, mèyi à ndekeelu àkambàYe ne: “Bimanyinu ebi nebifilè bàdi bìitabuuja, pa buloba bujimà ne kùdi cìfùkìlbwà cyònsò.” Ncyà bushùwà. “Nebifilè mwena kwitabuuja too ne pàNgààlukilà.” Awu m'Mèyi à ndekeelu àkambàYe. Mbanganyì bàdi bamanyè aci? Bible, Maako 16.

Mpindyewu, nwamònu's, yèyè mmwena kwitabuuja wa budingìbudingì.

256 Kàdi paùdi usangana mwena kwitabuuja udi witabuuja cyà bushùwà, ne bimanyinu biikale bilonda, ne umòna didipwekesha cyà nsòmbelu wendè, kî mmutentudyanganyi, mumanyè bîmpè ne mmwena Kilistò, mulelèlè, muntu mushuwashùwàlè, shààla wèwè ànu kacya wàpùwa. Cintu cidì cikèngela bwà wèwè kwenza, nkudisanga nendè buludi, kukutula lwendu, bwalu udi munkaci mwà kwenda ubanda ne cibeeba cyà Mfùmù.

257 Mpindyewu, cidì cyènzekà ncinyi? Tàngilàayi eci. Mbàlandà yà pambèlu: cìvwa ncikondo cyà Luther, patùdi tubanga mu Mubidi wà Èkéleeziyà wa bàà Bisàmbà byà bendè.

258 Nwavùlukaayi ne, bàvwa mbeena Yudà too ne bu ku cikondo cyà—cyà cidimu 606 paanyimà pàà lufù lwà Yesù pààkafikaci mu Twatilà, pàmwè ne bwònsò's bàvwa bakudimune mucimà bàà beena Yudà. Kàdi paanyimà pàà beena Yudà, mbikuupuke mwab'ewu mu beena Yudà ne bàà Bisàmbà byà bendè bwònsò (kàdi beena Yudà batàmbe kupita búngi). Kàdi pàdibi bìkafika mu cikondo cyà bàà Bisàmbà byà bendè cyà bushùwà, kulwilabi elu luseke, nwamònu's, Martin Luther, John Wesley, ne bakwàbò. Nwamònu anyi?

259 Mpindyewu, tàngilàayi bisàtù byà ndekeelu ebi paanyimà pàà Cikondo cyà Mídimà, kufika ku Cikondo cyà Pankaci ne kuya kwà nàka. Pàdi bwalu abu búlwa, tàngilàayi mbàlandà yà pambèlu eyi. Nwamònu's: mubidi, musùùkà, nyumà. Nwamònu anyi? Mbàlandà yà pambèlu ayi, mubidi. Mwaba wa cijila: Ba-Nazaréens, ba-Pèlerins de la Sainteté, ba-Méthodistes Badishikàmìne. Nwamònu anyi? Ne pashìshe Mwaba mutàmbe cijila: kwalukila mu beena Mpenta, mwàkabangàye ku cibangidilu amu, nwamònu's, kwalukila ku cibangidilu.

260 Mpindyewu, panwikala nucizola, ndi muswè kuleeja tùmwè tuntu. Mpindyewu, kùdi biibi bitaanu bidì bibweja mu mubidi, bidì bikontonona mubidi. Nudi bamanyè aci. Kabyènamu anyi? Ki byumvwilu bitaanu mbyòbì abi. Mbyumvwilu búngi kaayi bidì bikòntononà mubidi ewu? Bitaanu: lumònò, lulabulu, lulengu, lununku, luumvu. Ncyà bushùwà anyi? Ki mubidi ngwòwò awu, mbàlandà yà pambèlu, ki bintu byùdi kùyikù mwà kutèekela mwoyi to bwalu mbyà musunya.

261 Mbàlandà yà munda dìbà adi, tudi ne mbàlandà yà munda, yìdi ncyoshelu cidì cilondà. Ne cyoshelu cidì cilondà cidì cibwela, ne cidì cibwela ne—ne kondo kàà mwoyi, bifwànyikijilu, bivùlukilu, majinga, ne meeji à dinanga. Ki byumvwilu bitaanu bidì bikòntonona mbàlandà yà munda. Ki musùùkà ngwòwò awu. Byumvwilu byà meeji à dinanga, ki musùùkà, dinanga, ne bikwàbò. Nènku pashìshe cidì cilondà mu cipiminu eci emu, mùvwa kàbidì mwà kwikala bivùlukilu, ne kondo kàà mwoyi, ne luse, ne bikwàbò, ne—ne—ne didifwànyikijila. Udi usòmbela pashì udifwànyikijila bintu kampànda, cyùdi wenza ncinyi?

Kwēna ucyēnza mu mubidi wèbè to, byumvwilu byèbè kabyēna bidifwànyikijila to. Mbàlandà wa munda mwèbè amu awu.

<sup>262</sup> Ūdi ne biibi bisātù. Citùdi twenza ncinyi? Tudi tukosoloka mpindyewu, kaCìnùpiciku to. Ufumina mu mubidi, byumvwilu bitaanu; ku cìdì cilonda aci, musùùkà, mbàlandà yà munda; kàdi mpindyewu udi ubwela mu mwoyi. Nwamònu anyi?

<sup>263</sup> Mpindyewu, ki mwaba wunùdì nwēnù ba-Pèlerins de la Sainteté ne ba-Méthodistes bashàadile pa cyoshelu aci *kuntwaku*. Wamònu's, nwēnù nudi mu mbàlandà ayi. Nwēnù ba-Luthériens ne bakwàbò bàalùkile mu mubidi, bàalùkile kwàka ne byumvwilu bitaanu, cìdì dīsù mwà kumòna ne kuumvwa aci. Nwamònu anyi?

<sup>264</sup> Ki Pèlerin de la Sainteté ulwàlwa ewu mwine uvwa ànu mene Méthodiste Mudishikàmīne awu, ulwa ku mbàlandà yìdì yilonda ne witabuuja cijila, bwalu cìvwa cìbìikidiibwa ne mmwaba wà cijila ùvwà mulambu ùtèekiibwa.

<sup>265</sup> Kàdi musangu ùmwè ku cidimu ke ùvwà mwakwidi munène ubwela mu Mwaba mutàmbe cijila ùvwà mukàngiibwe. Kùvwa cikondo cyà ba-Luthériens; pashìshe cikondo cyà ba-Méthodistes; pashìshe cikondo *eci*, makénkè à Èkèleeziya ènda àlwa, àvwà mafwànangane ne ndongolwèlù wà muntu.

<sup>266</sup> Dìbà adi mmunyi—mmunyi mutùdì tubwela mu cyòci *eci*? Mpindyewu, vùlukàayi ne, kùvwa cibwikilu, cibwikilu kampànda cìdì cilembèlèle pankaci pàà mwaba wà cijila ne Mutàmbe cijila. Mu Mwaba mutàmbe cijila ki mùdì Kilistò ùlwa bwà kusòmba pa nkwaswa wa butùmbi wa mwoyi wèbè, Kilistò ùsòmba pa nkwaswa wa butùmbi. Ūdi ùpicila ku dibingishiibwa (Ncyà bushùwà anyi?); dijidiibwa; “Ne pashìshe ku. . .” (mâyi àmwè. . .ku èkèleeziya umwe. . .ku twitabàayi umwe. . .To!) “ku Nyumà umwe,” ànu kwòkò eku nkutùdì bwònsò babàtjijibwe mu Mubidi wùmwe wùdì Mubidi wà Kilistò. Ku cinyi? Nyumà Mwímpè.

<sup>267</sup> Nganyi udi ubwela? Méthodiste, Baptiste, Presbytérien, beena Mpenta, yònsò udi muswè awu. Cibwikilu aci, udi mumanyè cìdì ciine cibwikilu cìdì cibwikile mwoyi wèbè cìkupangisha bwà kuCimòna aci anyi? Udi mutèeleja anyi? Cibwikilu aci cìdì cìbìikidiibwa ne “budìswīle.” Udi mpindyewu upeta cimfwànyì aci anyi? Byumvwilu abi pambèlu *apu*, byumvwilu byà mubidi ne byumvwilu byà musùùkà, ne cibwikilu pankaci pàà cyòci aci ne mwaba wa cijila, mwaba Mutàmbe cijila. Ne mùshindù wùmwepelè wùdiku mwà kubwela mwómò amu ngwà kwikala ne budìswīle! “Bwalu ewu yònsò. . .” Cinyi? Ewu yònsò udi ulabulangana ku cyanza anyi? Ewu yònsò udi mwinyijijibwe mu mâyi anyi? Ewu yònsò udi ukashàala wa mu èkèleeziya anyi? Ewu yònsò udi ufila mukàndà wèndè anyi? Ewu yònsò udi wenza. . .? To! “Ewu yònsò *wáswà* kulwa dyàmwàmwà dyà cibwikilu awu.”

268 Kilistò alwe ku byumvwilu abi; ämbè ne “Èè, bivwa bikèngela mèmè kuya. Ncyèna muswè kuya mu iferno to, ki cintu cimwèpelè ncyóci aci. Nènkashààlè wa mu èkèleeziyà.” Èyo, wèwè Luthérien.

269 “Èè, nènkwambilè mudi bwalu, ndi ngiitabuuja ne bivwa bikèngela ngiikale ne nsòmbelu mushiilàngàne, ne mwànyì pàànyì mwònsò’s,” dijidiibwa ku cyoshelu. Èyo, wèwè Méthodiste.

270 Èyo, ne pashiishe ewu yònsò *wàswa* awu, àpitè cibwikilu cipanda aci. Kaa, butùmbi bwikalè kùdì Nzambì! Ndi ku luseke lukwàbò. Àlèluuyàh kùdì Dìna Dyèndè! Kaa, ekèlekèle! Ewu yònsò udi muswè, mulekele àpaasule, ridò yà diswa dyèndè yèyè mwine, nènku Nzambì àbwelè munda mwà mwoyi wèndè. Ki Kilistò udi pa nkwasu Wendè wa cilumbulwidi mu mwoyi wa muntu wàwa! Cidi ne cyà kwenzeka ncinyi?

271 Wèwè udi wamba ne: “Bikèngela mèmè. . . Kaa, ndi—ndi mwà kwenza minèkù yà bundù, kabyèna bìmpiisha to.” Bwà cinyi? Kabèèna ne cintu nànsha cimwè cidìYe mwà kupiisha to. Muntu nànsha Umwe kènamù bwà—bwà kucyumusha to. Muntu nànsha Umwe kènamù bwà—bwà kukupiisha to. “Èè, nènkwambilè’s,” mudi bakàjì bàmba’s, “mèmè ndi mwà kwikala ne nsuki mìpi, ncyèna nguumvwa dipiilà to.” Kabyèna bikèmesha to! Nwamònu anyi? “Kaa, ndi mwà kuvwàla tuntu twìpi. . . Ndi mwà kwenza *cikampànda*. Ndi. . .” Bantu abu kwambabò ne: “Kabyèna bintàcisha bwà kunwà bifwankà to, ne kabyèna bintàcisha bwà kunaya ndambù—ndambù wa twarta ne kunaya mibèlè to,” ne cyònsò cyènzènzàbo aci’s. “Kabyèna bintàcisha to.” Kàdi pààbò biikala ànu beena èkèleeziyà, nwamònu’s: “Kabyèna bintàcishaku bwà kwenza *cikampànda* eci to.” Bwà cinyi? Bwà cinyi? Kakwèna cintu nànsha cimwè mwaba awu bwà kukupiisha to.

272 Kàdi pàdi Kilistò ubwelamù, udi mufùke cyoshelu mu mwoyi wèbè ne mpèkaatù yèbè mmyumùshilbwe ku ditùkù ne ku ditùkù. Pòlò Munsantu munène awu, wàkamba ne: “Ndi mfwa ku ditùkù ne ku ditùkù. Nànsha mèmè ne mwoyi, kàdi kì *mmèmè* udi ne mwoyi to, Kilistò ngudi ne mwoyi munda mwànyì.” Ki cibwikilu cyà munda ncyóci aci. Kaa, mwanèètù wa balùme, mwanèètù wa bakàjì!

273 Tùlwijakaja, ndi mumanyè. . . Kaa, to, ndi. . . Ncyèna ànu mwà kucijikija to, ndi mupicishe díbà. Tùmonèbi, ngànjì ànu. . . To, mbìmpè ncicyènjì to. Nwamònu’s, ndi muswè kwangata bakùlù makumi àbìdì ne bànaayi, ne ndi mumanyè ne ndi munùlamè bwònsò bwà didyà dyènú dyà mundaamuunya. Netwikalè ànu. . . Tùmonèbi, ne. . . Mbanganyì bàdi bàmba ne twàngate bakùlù makumi àbìdì ne bànaayi? Ànu. . . [Disangisha dìdi dyàmba ne: “Amen.”—Muf.] Èyo, katanci kakesè cyanàànà. Èyo, katanci kakesè cyanàànà. “Bakùlù makumi àbìdì ne



bànaayi,” díbà adi, tùbàngàtaayi ne lùkàsà lwónsò mpindyewu, “mu nyungulukilu wa Nkwasa wa butùmbi amu, ne bàvwa makumi àbìdì ne . . . banyùngùlukile Nkwasa wa butùmbi.”

<sup>274</sup> Mpindyewu nudi numòna cìdì. . . Nkwasa wa butùmbi udi penyì mpindyewu? Mu mwoyi. Mu mwoyi wa nganyi? Wà bidimba byà Bikondo Mwandamutekète byà Èkèleeziyà, Kilistò! “Dìdìngèbi wàkule díyì dìbì bwà cyenzi cyàbò, s’udi mupiiishiibwe’s,” neùkadilumbùlwile mu Ditùkù dyà Cilumbulwidi. Nènku nganyi wàlumbulwisha buloba? Bansantu ki bàalumbulwishà buloba.

<sup>275</sup> Nganyi wàkamònà Danyèlè ùlwa ne binunu makumi kuvudija ku binunu dikumi awu? Bansantu. Mikàndà yàkabuuludiibwa, yà bangènzàmpèkààtù. Mukàndà mukwàbò wàkabuuludiibwa, ùvwa m’Mukàndà wa Mwoyi, bwà virgo mukùtākàne awu. Kaa, ekèlekèle, bōbō kabèenakù mwà kumòna aci anyi? Èkèleeziyà mukùtākàne, aba bàakapàtukà bwà kutwilangana ne Mubàki abu, bàakalekela Maanyi àjika mu myèndù yàbò abu; kabàakabwela mu Eci to, kabàakalekela Kilistò ùkontonona bwà Wàmòna mwà kwenza bishimà ne kwakula mu myakulu ne kwenza maalu à kùkema ne bikwàbò bwà kujaadika ne Yèyè ùvwa ne mwoyi mu Èkèleeziyà Wendè.

<sup>276</sup> Ambaayi tǔng bu ne Yesù wàkalwa pa buloba ne kwamba ne “Ndi Yesù, Ndi Mwànà wa Nzambì,” kàyi mwenzeku cintu nànsha cimwè to, Yèyè mmufwànyine kwamba ànu ne “Ndi—ndi mbànda apa nkashààla mwena èkèleeziyà?” Aci ncifwàanyine kwikala Mwànà wa Nzambì anyi?

<sup>277</sup> CyàkambaYe ncinyi? “Mémè ncìyì ngenza byenzi byà Taatù Wanyi to, nànkù kanùNgiitàbùùji to.”

<sup>278</sup> Kaa, ekèlekèle! Nudi numòna anyi? Nzambì ùdi ùDimanyisha, Yèyè utu munange kuDimanyisha. Yèyè ùdi Yèhowàh. Útu muswè kuDimanyisha. Kaa, ndi ne disànkà dyàbùngì bwà bwalu abu. Eyowà’s, mukalenge. MmuDimanyishe kùndì, ndi mumanyè ne Yèyè mmunwenzela pèènù mwomùmwè. Bàmwè bàà kunùdì nwènù bansonga nnucifumina ku dikudimuna micimà, kàdi kanwèna. . . kanwèna bafwànyine kuMumanya mu bukolè ne bintu binène mùdì beena Kilistò bàà kale bamumanyè to, kàdi nudi nwenda ànu nukakùfika. Nudi nwenda nubànda ne cibeeba cyà Mfùmù. Kanwikadi. . . Tùngunukàayi ànu ne kutàngilaku ne nukolesha ne mwènù pèènù mwónsò. Nyeemàayi lubilu, nyeemàayi lubilu, nyeemàayi lubilu ne mwènù mwónsò. Kanwimanyikù bwà kantu nànsha kàmwè to, tǔngunukàayi ànu ne kuya.

<sup>279</sup> Byenzè bu mùvwa Mwanèètù wa bakàji mukùlumpè mukwàte ne byà luse ewu Snelling ne ciibidilu cyà kwamba ne:

Ndi nyeema lubilu, nyeema lubilu, nyeema  
lubilu, ngáfumu ànu kudisabuka;

Nyeema lubilu, nyeema lubilu, nyeema lubilu,  
ngáfumu ànu ku disabuka;  
Nyeema lubilu, nyeema lubilu, nyeema lubilu,  
kùyiku mwà kutwà nyimà panshi to.

Musùukà mukulakaji mukwàte ne byà luse, nyèwù ùkaadi kwàka leelù ewu.

<sup>280</sup> Èyo, mpindyewu, ne kùvwa—kùvwa nkwasà yà butùmbi ne yìdikù, yìdiku makumi àbìd- . . . kùvwa nkwasà makumi àbìdì ne yìnaayi. Mpindyewu, mbùngì kaayi budiyi yenza, makumi àbìdì ne yìnaayi? Makumi àbìdì ne yìnaayi. Èyo:

*. . . nkwasà makùmi àbìdì ne yìnaayi: ne pa nkwasà ayi . . . pa nkwasà ayi ngákamòna bakùlù makùmi àbìdì ne bànaayi. . . (umwe pa nkwasà), bavwàle bilulù bitòòke; ne bàvwa ku mitù yàbò bààse bifulu byà butùmbi byà ngòlò.*

<sup>281</sup> Mpindyewu: “bakùlù makùmi àbìdì ne bànaayi.” Ndi muswè bwà nùmonè ne bóbò kabàvwa Banjèlò to. Banjèlò kî mbatèèdiibwemu to, Baakampànda bàà mu Dyulu kabèèna ne cyà dyenza ne bifulu byà butùmbi ne nkwasà yà butùmbi to. Nwamònu’s, bóbò kabèèna baswìkakaneku to, bóbò m’Banjelo, kacya kabàtukù bacimùne to. Bu nwènù mwà kumòna pashìshe ndambù, misambu yìvwàbo bimba ayi, ne bikwàbò, bìdì bijaadika ne kî mbóbò to. Nwamònu anyi? Bàvwa bimba musambu wà bupikudi; pa nàнку, Banjèlò kabèèna dijinga ne kupikudiibwa to. Nwamònu anyi? Èyo. Kàdi bàvwa bantu bapikula.

<sup>282</sup> Ncyèna . . . nwènù, Ncyakupetaku dîbà dyà kubakula eci to. Kàdi nwènù bàdì bàfùnda abu, panwìkala baswè kumanya ne bàvwa mbantu bapikula, angàtaayi Maatàayi 19:28, èyo, 19:28, Maatàayi, Bwàkabuulwibwà 3:21, pashìshe nwàngatè yôyi ayi, Bwàkabuulwibwà 20:4, Bwàkabuulwibwà 2:10, Peetèlò wa Kumpàla 5:2 ne 4, Timòtè Mwibìdì 4:8. Aci necinùmanyishè ne mbapikùdiibwe. Ndi muswè kuya mu cyòci aci mu dindà emu, nudi numòna’s. Nènku nudi bafwànyine ànu kucìkenketa munda mwà mbingu cyanààna, nudi numòna’s. Bóbò abu kabàvwa—bóbò kabàvwa Banjèlò to, kabàvwa Baakampànda bàà mu Dyulu to, bàvwa bantu bapikula. Nwamònu anyi? Nudi mwà kutàngila mìzàbì yàbo, mùshindù ùvwàbo bavwàle awu; nudi mwwà kutàngila kaaba kààbò, cìvwàbo naaci aci; nudi nutàngila misambu, cìvwàbo bimba aci; ne kumanya ne kabàvwa Banjèlò to. Hmm.

<sup>283</sup> Ndi ngumvwa bibì bwà kufika ku cyòci eci, kàdi tùbalàayikù mukwàbò Mufùndu. Nudi baswè anyi? Èyo. Twàlukilàayi ku Danyèlè 7, katancì kakesè cyanààna, paanyimà apa, mu Danyèlè 7, ne tùbalàayi ànu Mufùndu kaaba aka. Ndi muswè . . . nàнку eci necinwambùlwishè bikolè mu citùpà cyà diyiiisha cidì dishààle bwà mu dindà emu. Ndi mutwìshìibwe ne neci—necinùfikishè

ku didyumvwa bîmpè menemene paanyimà pàà nwênù babalè cyôcì eci ne bamòne eci, bamòne civwà Danyèlè, nshapìtá wa 7 wa Danyèlè, nènku túbangilàayi mpindyewu ku . . . Danyèlè 7, twàngataayi nshapì- . . . wa 9 mvensà wa 9. Mpindyewu, tèèlejàayi ne ntèmà yònsò mpindyewu ku bintu ebi:

Nènku . . . *Ngákatàngila* too ne *pààkatèèkibwa nkwasá yá butùmbi, ne Mukulumpile matùkù kusòmbaye, mwena bilàmbà bìwá bitòoke bu nêjè, ne mwena nsukì yà ku mutù kwèndè yìvwa bu . . . myòsà yà mùkòòkò mizekùke, ne nkwasá wèndè wa butùmbi ùvwa bu kapyà kalakuka,* (Nudi numòna kàbìdì, kwalukila ku kapyà kàà diikala dyà màyi à matamba ditambe kutwila.) *ne nkàtá yèndè bu kapyà kàdì kwosha.*

Ne . . . *Musùlù wà kapyà upatuka ne uya kumpàla kwèndè aku:* binunu kuvudija ku binunu bìwá *bìmukwàcìla mudìmu, ne binunu makumi kuvudija ku binunu dikumi* (Ki Bapikula bèènù bàlwalwà àbù's.) *kwìmanabo kumpàla kwèndè: ne cilumbulwidi kutwadija, ne mikàndà* (mikàndà, ku búngì) *yàkabuuludiibwa.*

<sup>284</sup> Mpindyewu, mònaayi, dilumbulwisha edi dyàkabanga. Nwamònu anyi? Mpindyewu, tàngilàayi. Danyèlè, pàakamònyè nkwasá yà butùmbi ku cilumbulwidi, yìvwa munda mutupù, wàkamòna “nkwasá yà butùmbi yènda yàdijìibwa, yìpweka yìfùmina mu Dyulu, Mukulumpile cikondo upweka ùfùmina mu Dyulu.” Kàdì pàakacimòná Yone, Nkwasa wa butùmbi awu ùkaavwa mumana kusòmbamu kùdì Yesù, ne nkwasá yà butùmbi bwà bayiidi ne bankambwà, bapikula, mìmanè kukùmbana. Nwamònu anyi? Danyèlè wàkacimòna bidimu nkàmà yìtaanu kumpàlà kwà cikondo cyà Kilistò. Ne pashìishe paanyimà pàà Kilistò, byènza bidimu binunu bìbìdì ne nkàmà yìtaanu, ne Yone mwikàle ne mwoyi mu cikondo cilwalwà, ne yèyè ùkaavwa mumane kumòna byònsò ebi byènzeka. Pààbì, Danyèlè kàakacimòna to, (Nwamònu anyi?) yèyè wàkamòna ànu Mukulumpile cikondo ùlwa; wàkaMumòna ùlwa. Kàdì pàakaMumòna Yone, Nkwasa wa butùmbi ùvwa musòmbamù, nwamònu's, nkwasá yà butùmbi yìvwa myadija kumpàla kwà Mukulumpile cikondo, ne Cilumbulwidi cyàkatwàdija. Kàdì pàakaMumòna Yone, bakùlù kabàvwa banji kwikala basungùdìibwe mu cikondo cyà Yone to . . . anyi cikondo cyà Danyèlè, kàdì bòbò bàkaavwa bamana kupikula ku cikondo cyà nshìikidilu . . . ? . . . Kaa ekèlekèle! Kaa, aci kacyèna . . . Yèyè kí mmulenga wa dikèma anyi?

<sup>285</sup> Pa nàнку, Danyèlè 7, yèyè . . . cyàkenzà Danyèlè ncinyi? Yèyè wàkadyànjàla kumòna Cilumbulwidi, kumòna nkwasá yà butùmbi ayi yìvwa munda mutupù. Nwamònu's, yìvwa ne cyà kwikala munda mutupù. Anu mùvwà Yone mu cikondo cyèndè,

paanyimà pàà Èkèleeziyà mwambwibwe, yivwa basòmbèlamu kùdi bakùlù bapikula. Hmm.

<sup>286</sup> *Mukùlù* mbwena kwamba cinyi? Nwènu bangàte mwâkù *mukùlù*, mêmè kupetaku bu...muumvwija wònsò àdi mafùnda aa, ndi ànu mpweka ne kwinsì. *Mukùlù* mbwena kwamba ne “mfùmù wa cimenga” anyi “mfùmù wa cisàmbà.” *Mukùlù*, “mfùmù wa cintu kampànda.” Byenze bu ne ndi—ndi mufwànyine kwikala...Mwanèètù Neville mpindyewu mene mmukùlù mutùmina èkèleeziyà ewu. Yèyè ùdi cinyi? Yèyè ùdi mfùmù wa mubidi wà pa kaaba ewu. Nwamònu anyi? Ne mulombodi wa cimenga ùvwa mwà kwikala mukùlù wa cimenga eci; nwamònu’s, mukùlù wa bimenga. Nudi bavùlùke mu bikondo byà Bible, bakùlù bàà cimenga aci anyi? *Mukùlù* mbwena kwamba ne “mfùmù wa cimenga” anyi “mfùmù wa cisàmbà.”

<sup>287</sup> Mpindyewu, bàvwa bùngì kaayi? Makùmi àbìdi ne bànaayi, bakùlù makùmi àbìdi ne bànaayi. Ncyà bushùwà anyi? Mpindyewu...Kaa, ekèlekèle! Ùvwa nganyi? Bàpostòlò dikumi ne bàbìdi ne bisàmbà dikumi ne bìbìdi byà Izalèlèlè, bankambwa dikumi ne bàbìdi abu. Kùdi...Mpindyewu, netùtùngunukè naaci buludì too ne patwàbwelà mu màleesònà makwàbò awu, ne kujaadika ciine aci ne ncyà bushùwà, pa nàнку nwènu, ndi ne disànkà bwà munùdi nuciifùnda mpindyewu. Nwamònu anyi? Bankambwà dikumi ne bàbìdi ne bisàmbà dikumi ne bìbìdi byà Izalèlèlè abi! Mpindyewu, tàngilàayi. Yesù ngwàkamba aci... .

<sup>288</sup> Peetèlò wàkakonka dǐngà ditùkù, kwamba ne: “Netùpetè cinyi? Tudi bashiye taatù, maamù, bayetù, mukàjèètù, bânà, ne bikwàbò byònsò, tudi balekele bintu byònsò.” Peetèlò kwambaye ne: “Tudi bashiye bakàjì bèètù, tudi bashiye bânà bèètù balela, tudi bashiye taatù wetù ne maamù, yètù nzùbu ne malaba, bwà kuKulonda.”

<sup>289</sup> Yèyè ne: “Bulelèlè, bulelèlè Ndi nzwàmbila ne, nwènu nenùsòmbe pa nkwasà yà butùmbi dikùmi ne yìbìdi nulumbulwisha bisàmbà dikùmi ne bìbìdi.” Ki bwalu mbwòbù abu’s, ki bapikula mbòbò abu, bakùlù bapikula abu.

<sup>290</sup> Tàngilàayi—tàngilàayi Davìdì wàkaleeja cimfwànyì cyà Kilistò. Nwamònu anyi? Pávwa Davìdì ne cyà kukòokeshà, cintu cyà kumpàla, ùvwa ne cikondo cyà cibi kumpàla kwà kubwelayè mu bukòokeshi. Nànsha nàнку ùvwa ne dilaabiibwa pambidi pèndè, èyowà’s, dilaabiibwa adi òvwa pambidi pèndè. Ki bantu bààbùngì kwelabo meeji ne “Yèyè ùvwa ànu muntu mupidyè diitabuuja ndambù, muntu mukèsè uvwa mushiilàngàne, ùteeta kusùnsula cintu kampànda.” Kàdi kùdi bàmwè bantu bàvwa bamanyè ne yèyè nguvwa ushààla mfùmù, bààkashààla ànu nendè. Mwanèètù, ndi muswè kwamba ne kwèna mufwànyine kubuumusha kùdiye to, pàvwàbò bènda baya apu.

291 Dìngà ditùkù kwimanayè pa mukùnà apu, kupwekeshaye mèsù panshi ne kumònayè cimenga cyèndè cikesè, cinanga aci cijìngìla kùdì mwena lukuna. Kì kwimanaye mwaba awu ne kuvùlukayè pàcivwaye mwánà mutekète, ùwva ne ciibidilu cyà kuya kuntwaku ne mikòòkò ne kunwa màyi awu, avwa mmàyi à cyà bushùwà. (Twākùlù pa bwalu abu mwab'ewu kì nkwanji kwenza ntàntà to, *Màyi a Mwoyi*.) Nènku's ki yèyè awu: "Anji elàâyibi meeji, ngàanwapu màyi à kuntwaku aku's."

292 Ne dijinga dyèndè dyà ditàmbe bukesè òwva ndiyi dituma kùdì muntu kàna yònsò uvwaye nendè awu. Mwanèètù, bàbìdì bàà ku bantu abu kupyabo myele yà mvità ne kulwanganabo mu ntàntà wa kilómèètà dikumi ne yinaayi yà beena Pelèshèète, bàsùnsulangana naabo ku dyàbalumè ne ku dyàbakàji, bwà kumupetela màyi à kunwà ku ciinà aci. Bàvwa bamanyè ne ùwva ne cyà kukòòkeshà. Èyowà's, mukalenge. Musangu kampànda, umwe wabò, bwà kumusungila, kutupika kubwela mu ciina ne kushebeya nyama wa ntambwe, ne byanza byètù ebi. Bàvwa balwanganyi bàà mvità. Nènku pàà—pààkabwelàye mu bukalenge, nudi bamanyè cyàkenzàye anyi? Yèyè wàkenza muntu ne muntu wa kùdìbo mukòòkeshi pa cimenga kampànda.

293 Nudi numòna Kilistò mwaba awu anyi? "Ewu udi ucimuna neàkòòkeshè cimenga." Bacimunyi's! Leelù ewu patùdì tumòna ne Yèyè ùdì ùbwela mu bukòòkeshi, Kilistò neàkòòkeshè pa buloba ebu. Allemagne, ne États-Unis, ne bwònsò bàdì ne cyà kukùluka, ditùnga ne ditùnga dyònsò didi ne cyà kukùluka. Makalenge à pa buloba ebu mmalwè makalenge à Nzambi wetù ne à Kilistò Wendè, ne Yèyè neàkòòkeshè ne neàbàkòòkeshà. Ncyà bushùwà.

294 Tudi bamanye ne Yèyè neàkòòkeshè, pa nànkù dijinga Dyèndè dyà ditàmbe bukesè adi ndiyi ditùtumina! "Yèyè muswè bwà mèmè mMuleeje mpàla mu kaaTombokutou kakesè menemene mùvwàku kamùyì nànsha meeyà makumi ataanu to, mwaba wùdì kawùyì cintu, anyi mu musumbà wa bantu bapèlè," ki dijinga ndyòdì adi. Amen!

295 "Kabyèna bikèngela bwà wèwè kupeta àbùngì menemene to, kabyèna bikèngela bwà wèwè kwenza *cikampànda* to, mmanyisheku ànu cyanààna ne Yèyè mmuswè kuya." Amen. Kwàjikì.

296 "Yèyè muswè bwà mèmè kwenza maalu mashìllàngàne, kwenza maalu mùshindù mushìllàngàne," bu mudi bàna bèètù bàà bakàji aba ne bikwàbò, "piikalaYe muswè bwà mèmè kwenza cintu kampànda, Nzambi àbèneshiibwè, ndyèsè bwànyì mèmè bwà kucyènzà." Kì bwalu mbwòbù abu's! Tudi bamanye ne Yèyè ùlwalwa mu bukolè, nànsha bàà pa buloba bàmba cinyi. "Byòbì bikèngela bwà mèmè kutèeka ku luseke bujitu bwònsò ne mpèkaatù yidi yinjìngila bipeepèlè nùnkù, ndekèlèku nyeemèku ne lutùlù lubilu lùdì lutèeka kumpàla kwànyì alu. Enzaku bwà

ntapè dîsù kùdì Mubangi ne Mujikiji wa Diitabuuja dyètù, Yesù Kilistò.” Ulwàlwa mu bukòlè awu’s!

<sup>297</sup> “Bakùlù” abu’s, bakùlù makùmi àbìdì ne bànaayi abu. Èyo. Dikùmi ne bàbìdì. . . Mu Bwàkabuulwibwà amu, mmutùdì tusangana eci. Mu Mukàndà wa Bwàkabuulwibwà, nshapità wa 21, tudì tusangana ne cimenga cyà Yèlusàlèmà cìvwa ne bishìmikidi dikùmi ne bibìdì. Ncyà bushùwà anyi? Ne yèyè ùvwa ne biibi dikumi ne bibìdì, bìvwa bisàtu ku luseke ne ku luseke lwònsò, bisatu kuvudija ku yìnaayi’s ndikumi ne bibìdì. Ànu menemene mùshindù ùvwa tabernacle musòmbe mu cipèèla, bwalu Yone wàkamba ànu menemene ne wàkamòna cintu ànu cìmwècìmwè cyàkamòna Mòsà pàvwàye kuntu kwàka aci, cintu cìmwècìmwè cyàkamòna Pòlò aci.

<sup>298</sup> Nènku mpindyewu tudì tumòna ne bishìmikidi dikumi ne bibìdì abi bìvwa mènà à bàpostòlò. Ne biibi dikùmi ne bibìdì abi bìvwa ne dìnà dyà cisàmbà cyònsò ku ciibi aci. Mùshindù mwinè wutùdì tutàngila cyòci aci ne tumòna bakùlù dikùmi ne bàbìdì abu, bisàmbà dikùmi ne bibìdì abi, bàpostòlò dikumi ne bàbìdì, bishìmikidi dikumi ne bibìdì, biibi dikumi ne bibìdì! Kaa, ekèlekèlè! Angataayi nomba yà Nzambi nènku kanwakucipangila mwaba nànsha ùmwè to, nebikumbanagane ànu mu byòbì myaba yònsò ku musangu ne ku musangu.

<sup>299</sup> Ki bwà cinyì, nudi numòna’s, tudì ne matùkù àsambòmbò mwàkakwàtà bàà pa buloba mudimu aa, ne tukàadi baseemène pabwìpì menemene ne ditùkù dyà mwandamutekète edi mpindyewu. Bidimu binunu bibìdì byà kumpàla, Nzambi wàkabùtula màyì. . . bàà pa buloba ne màyì. Bidimu binunu bibìdì biibìdì, Kilistò kulwaYè. Eci’s neidimu cyà 1961, ànu ku ciibi aku mene, ànu katanci kakesè cyanàànà. Kàdi tàngilàayi, Yesù wàkamba ne: “Mpindyewu, kacýàkuya ne ku ndekeelu kwà njila yònsò to,” Yèyè ne: “bwalu nebikèngelè bwà ngìpidijè mudimu. Mèmè ncìyi mwenzè nàku to, bòmbè bwà mùshindà nebùbutulè mubidi wònsò. Uh-huh. Bwà bwalu bwà Basungula, nèngìpidijè mudimu mu bwakàne. Kuwùkosa, citùpà cyà dibà.” Nwamònu’s, pashìishe ke Bukalenge bwà bidimu cinunu, Ditùkù dinène adi.

<sup>300</sup> Pàdì Èkèleeziyà mukwàte mudimu bwà kulwangana ne mpèkaatù munda mwà bidimu binunu bisambòmbò apu, ne cinunu cyà mwandamutekète’s m’Bukalenge bwà bidimu cinunu. Bu mwàkenzà Nzambi bidimu binunu bisambòmbò bwà kwibaka buloba, ne cinunu cyà mwandamutekète Wàkiikisha ku midimu Yèndè yònsò. Nènku Èkèleeziyà ùdì ùkwata mudimu ulwishangana ne mpèkaatù mu bidimu binunu bisambòmbò, kàdi cinunu cyà mwandamutekète Èkèleeziyà ùdì wikisha.

<sup>301</sup> Mizàbì mitòoke yìvwa pa bakùlù ki bwakàne bwà Bansantu. *Butòoke* mbwena kwamba ne “bwakàne.” Nènku bwalu bàvwa *bavwàdika mizàbì* bìvwa bileeja ne bàvwa “mbaakwidi

ne balumbulwishi,” bavwàle mizàbì mitòòke, bansaserdòsè, balumbulwishi, bapròfetà, ne bikwàbò; nwamònu’s, ki civwàbo aci. Bàvwa bavwàdika mizàbì mitòòke, bakùlù makùmi àbìdì ne bànaayi. Nekwikalè bakùlù makùmi àbìdì ne bànaayi. Nekwikalè dikùmi ne bàbìdì bàà kùdìbo bwà bisàmbà dikùmi ne bìbìdì byà Izalèèlà; bàpostòlò dikùmi ne bàbìdì bwà Èkèlèeziyà.

<sup>302</sup> Nènku mbasòmbe mu bulà bwà Mfùmù munène. Nwavùlukaayi ne, mbasòmbèle pambèlu apu, *bòbò* abu’s. Nènku ki Mukàjì-musela *ewu* ne Kìlistò basòmbe pa Nkwasa Wèndè wa butùmbi, ne Mukàjèndè musòmbe ku luseke Lwèndè, Èkèlèeziyà. Bakùlù makùmi àbìdì ne bànaayi...Batungu binunu lukàmà ne makùmi ànaayi ne bànaayi bàà mu ntempèlù abu munkacì mwà kuMukwàcìla mudimu. KùyaayeYi kwònsò, Mukàj’Èndè ùyaaya Nèndè. Kaa, kaa, ekèlekèlè! Mu Cikondo cinène cilwalwà aci, piikalà mpèkaatù yònsò ne difwànàngana dyà mpèkaatù dyònsò . . .

<sup>303</sup> Nzùbu yònsò minène, ne milenga yìdì bantu batàmbe kunanga leelù ewu eyi, mfrangà yònsò ne lukùka ne mpèkaatù yònsò ne bakàjì balenga ne balùme, ne cyònsò cìdìbo bàteeta kwenza mubidì wàbò aci, cintu kampànda anyì kansanga, bwà kwikalabò butèyì bwà dyabùlù kutùmayè misùukà yàbò mu iferno, newùbutukè ne wùbola, ne misàndà yà mu dikòbà neyìwùdyè. Nènku cintu cyà kumpàla, misàndà yà dikobà . . . cyònsò civwàbo bòbò aci necìbwelè ànu mu mudilu wà volcan bwà kwalukila cyònsò ànu ku butù bwà bòmbè ne—ne bwà volcan.

<sup>304</sup> Kàdì òmòwè dyà ku maadìndà aa, mulunda wanyì, òmòwè dyà ku dìndà edì, pààjikà byònsò abi, buloba nebùsàmpile cyàkàbìdì bu bilòngò. Mpàta mitòòkesha kùdì bilòngò ne dipembu dyà—dyà ku cilòngò cyà rose nebìsambakane ne bilòngò byà ku Muci wà Mwoyi, ne Kìlistò neàpingane mu dìndà kampànda. Piikalà nyuunyi minène, nkuci, yìsòmbela mu micì ne yìdìla yitèndakana, ne kakwàkwikala kàbìdì lufù ne tunynganyinga to. Kìlistò ne Bapikula Bèndè nebàalukile pa buloba; kabàyi bantu bakùlakàjì to, kàdì bàna bàà bitende bwà kashidì. Netwìmanè bafwànàngane Nèndè, katùyì tufwà to, dìbà ne mìtootò netùbitambè ku dikènka.

Ndi mu njila mutàngile ku Cimenga cilenga aci  
Cìdì Mukalenge wanyì mulongòlwèle Bèndè  
Sungasunga;

Mwikalà bapikula bwònsò bàà bikondo byònsò  
Mwà kwimba “Butùmbi!” banyùngulukile  
Nkwasa Mutòòke.

Míngà misangu ntu mpeta majiyà à Dyulu,  
Ne butùmbi kuulu bwà kutàngila:

Disànka kaayi diikalàku dìbà dingààmònà  
Musùngidi wanyì,  
Mu Cimenga cilenga cyà ngòlò aci!

Mùshindù mwine wúndi njinga kuMumòna's wè! Kaa, ndi muswè kuMumòna!

Ndi mu njila mutàngile ku Cimenga cilenga aci.

<sup>305</sup> Yone wàkacimòna, mu cisanga cyà Paatèmò, wènda ùpweka bu Mukàjì-musèla mulengejila bayèndè. Butùmbi bwàci mbùndi muswè kubandila, dîngà ditùkù.

Ndi muswè kuMumòna, ne kutàngila mpàla  
Wendè,  
Kwòkù aku bwà kwimba bwà kashidi ngàsà  
Wendè musùngidi;  
Mu misèèsù yà Butùmbi mbandishe dîyi  
dyànyi;  
Ntatu yònsò yàjiki, ndekeelu wa byònsò  
kumbèlu, bwà kusànka kashidi.

<sup>306</sup> Diselemuka dikesè ne difinunuka mu nêjè, luyà lukesè ne midimu mikolè yà ditùkù; ndi njinga ne mukàjàànyi ne Mabel babandeku kuneeku bwà kungiimbila musambu awu, bu mèmè—mèmè ne mùshindù ne: “Midimu mikolè yà mu njila kayààkwikala ne cidiyi yùmwija to, pàngààfikà ku ndekeelu wa lwendu.” Ncyà bushùwà.

<sup>307</sup> Ndi mvùluka dilòlò dîngààkuumukà mu èkèleeziyà bwà kubanga mudimu wà butangadiki, panùvwà nwènù bwònsò nudila myadi apu; muntu nànsha umwe wa ku bôbò abu kaciyènapu to, pàmwè ne bwònsò, pàmwàpa ndambù wà ku nwènù abu kaaba aka. Mwanèètù wa bakàjì ne Mwanèètù wa balume Spencer, ne pàmwàpa ba—bakesè menemene bàà bikondo byà kale bishààle, pàvwàbo badila myadi mwab'ewu. Kàdi pàakamba Nyumà Mwîmpè ne: “Udi ne cyà kuya!”

<sup>308</sup> Nènku ndi mvùluka disangisha dyànyi dyà kumpàla paanyimà pàà mèmè mumane kuya munda mwà ngondo, Meda kupwekaye ku Jonesboro kwàka, Becky ùvwa kànà kakesè menemene kàà mu dibòko, kupwekaye kuntwaku mu kàwulù kàà kale kàà Cottonbelt aku, kubàngatabi matùkù bwà kufika kuntwaku. Nènku mvwa mwimane pambèlu apu dîbà dyàkalwaye dilòlò adi. Twètù kuteeta bwà kufika ku dibàlaasà, bitùpà bisàtù kule, bampulushi bàvwa balame misèèsù ayi mùshindù awu. Misèèsù mene yìvwa mipàte patapata. Kwenzekabì ne, kupicilabò nàànyi mu misèèsù amu ne kunyunguluka bwà kufika pa mwaba awu. Meda kwambayè ne: “Mbalwè bwà kukuumvwa uyiisha anyi, Bill?”

<sup>309</sup> Mèmè ne: “To.” Pashìishe twètù kwimba ne:

Mbafùmine ku Esètè ne ku Wesètè,  
Mbafùmine ku buloba bwà kulekùlè,  
Bwà kwenza difestò ne wetù Mfùmù, bwà  
kudyà bu babiikidiìbwè Bèndè;



Mùshindù mwine ùdi beena lwendu aba  
 babènèshùibwe's wè!  
 Bàbandila mpàla Wendè mujidila  
 Ùkenka ne dinanga dyà Nzambi;  
 Baabanyanganyi babèenesha bàà ngàsà  
 Wendè,  
 Bwà kubàlakanabò bu mabwe à mushinga  
 mukolà à ku cifulu Cyèndè cyà butùmbi.

Kaa, Yesù ùlwalwa katààtaka,  
 Dìbà adi mateeta ètè neàjike.  
 Kaa, kàdi bu byòbì bìkèngela bwà Mukalenge  
 wetù kulwa pa dìbà edi  
 Ùlwila aba bàdi basùludiibwe ku bupika bwà  
 mpèkaatù?  
 Kaa, dìbà adi ncifwànyine kukutwàdila  
 disànka,  
 Anyi tunyinganyinga ne diteketa dikolè dyà mu  
 mabòko anyi?  
 Pàalwa Mukalenge wetù mu butùmbi,  
 Netùtuutakeene Nèndè muulu mu mpeepèlè.

<sup>310</sup> Amen! Kaa, ndi muMunange! Ncifwànyine kunutwàdila  
 tunyinganyinga ne dikènga dikolè, anyi ncifwànyine  
 kunùtwàdila disànka? Pàalwà Mukalenge wetù mu butùmbi,  
 netùtuutakeenà Nèndè muulu mu mpeepèlè. Ne meeji awu  
 mu mitù yètù, twìnyikàayi mitù yètù. Bu Mukalenge mwà  
 kwanyisha, nènjikijè disangisha edi musangu mukwàbò  
 kampànda.

<sup>311</sup> Taatù wetù wa mu Dyulu, kaa, nebàfùmine ku Esètè ne ku  
 Wesètè, nebàfùmine ku malaba à kulekùlè. Ndi ngeela meeji ku  
 Dyambwibwa dinène adi. Bantu bāndi muyiishe mu Àfrikè, mu  
 Inde, ne mu buloba bujimà, mùshindù wùngààmònà cyàkàbìdì  
 mpalà yàbò. Bààbùngì bààbò badila, bàlwa pabwìpì ne ndèkè, ne  
 bèeyemena ku mpangu ne bèèla mbila badila. Ndi ngeela meeji  
 dìbà dyàkapàtukàbo ne Pòlò musangu kampànda, kutwàbo binù  
 e kusambilabò. Yèyè ne: “Ndi mutwishùibwe ne muntu nànsha  
 umwe wa kunùdì. . . bààbùngì bèènù mwab’ewu kabàkumònakù  
 mpàla wanyì kàbìdì to.”

Kàdi nebàfùmine ku Esètè ne ku Wesètè,  
 Nebàfùmine ku malaba à kulekùlè,  
 Bwà kwenza difestò ne wetù Mfùmù, bwà  
 kudyà bu babiikidiibwè Bèndè;  
 Mùshindù mwine ùdi beena lwendu aba  
 babènèshùibwe's wè!  
 Bàbandila mpàla Wendè mujidila (mu butùmbi  
 bwà diikala ditàmbe kutwila dyà màyi à  
 matàmbà),  
 Ùkenka ne Bukènkè bwà Nzambi;

Kaciyi ànu bukênkè bwà mwêndù anyi bukênkè bwà kandeyi to, kàdi—kàdi Bukênkè bwà Nzambi.

Ûkenka ne Bukênkè bwà Nzambi;  
Baabanyanganyi babèenesha bàà ngàsà  
Wendè,  
Bwà kubàlakanabò bu mabwe à musinga  
mukolè à ku cifulu Cyèndè cyà butùmbi.

Éyi Nzambi!

Dikàlà dyà kapyà pàakalengàdi mupròfeta,  
Dìmuvwija mukezuke ne mwèndè mwònsò,  
Pàakamba Dìyi dyà Nzambi ne: “Watùyiila ke  
nganyi?”  
Dìbà adi kwandamunayè ne: “Mmémè ewu,  
ntùmaaku.”

<sup>312</sup> Kaa, tùmakù Mwanjèlò mu dindà emu, Bakèlùbà biikàle ne mapwâpwà àsambòmbò, mwàkabàmòná Yeshàayi amu, bàpaapala mu nzùbu, bèèla mbila ne: “Wa cijila, wa cijila, wa cijila, kùdi Mukalenge.” Ki Yeshàayi mupròfeta wa citende awu kwambayè ne: “Mémè ndi ne mishikù mibiipe, ne munkaci mwà bantu bakooyike, ne mèsù àanyi mmamòne Butùmbi bwà Mukalenge.” Makunji kunyukukawù mu ntempèlù. Ki Mwanjèlò kwangata nkàlà yà ku cyoshelu, ne kwangatayè dikàlà dyà kapyà ne kumutèekadi pa mishiku yèndè, kwambaye ne: “Ndi nkusukula mishikù yèbè. Mpindyewu amba cipròfeta, wèwè mwàna wa muntu.” Tumaaku Mwanjèlò mu dindà emu, Mukalenge, sukulaku mishikù yètù ku bintu bibi byònsò. Sukùlaku myoyi yètù, ne bwelàmu, Mukalenge. Sunsulakajaku diswa dyètù dyà nkàayetù. Bwà . . . diswa dyanyi (mu Wèwè) diikalè Diswa Dyèbè, Mukalenge. Kaa, enzaku Diswà Dyèbè mu mémè, Éyi Nzambi. Nèku enzaku ne mémè ne èkèleeziyà wanyi ne cisambà cyanyi twikale bèèbè, Éyi Mukalenge. Nyèwù tudilàmbula kùdi Wèwè.

<sup>313</sup> Nèku ànu mwàkamba mwedi wa kasàlà ne: Taatù:

Mpindyewu miliyò nyèyi yipùnga ne lufù mu  
mpèkaatù ne bundù,

Mu Àfrikè mwàmwa, mu Inde mwàmwa, mu nyùngùlukilu wa buloba bujimà, binunu ku dìbà, ne yilwa kutwilangana Neebè kayiyi miKumanye to.

Mpindyewu miliyò nyèyi yipùnga ne lufù mu  
mpèkaatù ne bundù,

Kàdi, Nzambi, cìdi cyàmba kutaayisha musùùkà wanyi mu tupese pàndi ngeelaku meeji.

Tèèlejà mwadi wàbò wà dibungama ne  
kànjabàla;  
Lwijàkàjà, mwanèètù, lwijàkàjà uye  
kabàkwacishaku;

Andāmùnàku ne lùkàsà lwònsò ne: “Mfùmù, mmèmè ewu.”

314 Enzaku nàнку, Mukalenge, enzaku nàнку cyàkàbìdì. Ndi mwenze bilema byà mishindù yònsò, Taatù, mu cidimu cyapici eci, ndi ndòmba bwà Wèwè kubimfwidilaku luse. Nèнку mu Cidimu Cipyacipyà eci, Mukalenge, ùndaabèku cyàkàbìdì maanyi. Nyeku kùdì mìliyò yìdì misòmbè mu mpèkaatù ne mu bundù ayi, miikale yipunga ne lufù, nkayitwádile dibuulula dinène dyà Bulelèlà Bwèbè edi, kubàtwádila dilaabiibwa dyà Nyumà Mwímpè; mu mùshindù wà ne mu ditùkù adi bààfwányina mwà kufumina ku Esètè ne ku Wesètè, bàbàlakana bu mabwe à mushinga mukolè ku Cifulu Cyèbè cyà butùmbi. Nkwàcishèku, Mukalenge, bwà kupweka ne kukebulula ne kubàjoomona mu buloba, mu manyaanu à pa buloba, manyaanu ne bukooya mùdìbo basòmbèle amu. Nèнку bàmonèku Nzambi wa Cijila udi ubafikisha ku dikezuka ne ku diikala ne nsòmbelu wa bwena Kilistò, mujidìibwe ne mukezuke kumpàla Kwèbè awu; bakoma nyima ku bubì, ku bisànkasanka byà mishindù yònsò byà pa buloba, ne batàngila kùdì Nzambi wa mwoyi, ne ùbàvwija minyàmpalà yà Bukalenge Bwèbè bwà ditùkù dinène adi.

315 Jidilàku kaèkèleeziyà kakesè aka mu dindà emu, Mukalenge. Jidilàku muntu yònsò kaaba aka ne Nyumà Webè, ne Nyumà Mwímpè àbwelèku munda mwà myoyi yàbò, muntu ne muntu wa kutùdì. Fila cyashima kùdì Nyumà munda mwà aba bakàadi ba- . . . bunzùlule myoyi yàbò ku budiswile bwàbò, bavile diswa dyàbò bóbò biine ne balwè bwà kumanya Diswa Dyèbè.

316 Bânà batekète abu, Mukalenge, bààbúngì bàà kùdìbo bàvwa ànu bânà bakesè bàà mu mabòko. Mùshindù mwine ùdì Wèwè ubengeleka mu mabòko Èbè's wè! Mùshindù ùtu maamù ucyùka mwanèndè mutekète, umukupula binsonji kwìsù ne—ne umupèèsha bintu byà pabwàbì bwalu mmunange. Kì mùshindù Údì munange bânà Bèèbè bakesè balediibwe cyàkàbìdì abu, Mukalenge. Kì mbanji kukumbana mwà kwenda to, kabèèna mene banji kukumbana mwà kwakula to. Cintu cimwèpelè cidìbo mwà kwenza cidi ànu kudila myadi ne kutàngila Maman. Éyi Nzambi, balameku mu mabòko Èbè, ne dinanga dyònsò, bu twànà twà mìkòòkò, ne ubàlomboleku too ne mwàkolàbo ne kukumbana mwà kwenda. Pashiishe ubàlombòle, Mukalenge, mu tujila twà mudimu. Enzaku nàнку.

317 Tùfwilèku luse ku mpèkaatù yètù, bu mutùdì tufwila aba bàdì bàtwènzela mpèkaatù abu luse. Kùtùlombòdiku mu diteeciibwa to, kàdì ùtùsúngilèku ku bubì. Bwalu Bukalenge m'Bwèbè, ne bukolè, ne butùmbi, kashidi, mu Dìnà dyà Yesù Kilistò. Amen.

318 Nzambi ànùbènèshè! Ndi mutwishìibwe ne Mukalenge mmunwenzeleku cintu kampànda mu dindà emu bwà

kunùfikisha ku dibangila Cidimu Cipyacìpyà pa cintu cìmwèpelè eci, cyà ne nudi banange Yesù Kilstò, ne dîngà ditùkù nudi baswè kuMumòna ne kuMunanga ne kusòmba Nendè kashidi. Ndiyinga dyànyì bwà ne nànsha umwe wa kunùdì kàjìminyiku to, bwà ne yònsò wa kunùdì asùngidiibwe ne újìibwe tètè ne Nyumà Mwimpè, ne àlamiibwe mu ditùkù dyà Dilwa Dyèndè adi, bwalu ndi ngiitabuuja ne dikaadi pabwìpì menemene.

Mpindyewu ndi ngààlujila Mwanèètù Neville bulombodi bwà disangisha. 

61-0101 Bwàkabuulwibwà, Nshapità Mwinâyì Citùpà II  
Branham Tabernacle  
Jeffersonville, Indiana États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyì dya bwena-cintu

Makenji ònsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)